

Lix Yehom Xbanuhomeb li Apóstol

Li Dios quixyechi'i li Santil Musik'ej reheb li ralal xc'ajol

¹ Sa' li xbən hu quintz'iba acuiq'uin, at Teófilo, quintz'iba retalil chixjunil li jo' q'uial quixc'ut ut quixbañu li Kacua' Jesús chalen nak quixtiquib lix c'anjal sa' ruchich'och' ² toj sa' li cutan nak quic'ame' sa' choxa. Nak toj maji' naxic sa' choxa, riq'uin xcuanyl li Santil Musik'ej, quixye reheb c'a'ru tento te'xbən lix apóstol li quixsiq'ueb ru. ³ Nak ac xrahobtesic ut ac xcamsic, quicuacli cui'chic chi yo'yo ut quixc'utbesi cui'chic rib chiruheb. Ca'c'al cutan quicuan sa' ruchich'och' ut nabal sut quixc'utbesi rib chiruheb re nak te'xnau chi tz'akal nak quicuacli cui'chic chi yo'yo. Quixch'olob xyalal chiruheb chanru nak tācuānk xnimal xcuanylal li Dios sa' xbeneb li tenamit. ⁴ Nak toj cuan sa' xyankeb li Jesús quixye reheb chi jo'ca'in: —Inc'a' texxic sa' jalan na'ajej. Texcanāk ban Jerusalén roybeninqil li Santil Musik'ej li yechi'nbil ere xban li Dios Acuabej, li ac xinye ere laín. ⁵ Yal nak laj Juan quicubsin ha' riq'uin ha'. Abanan anakcuan a' chic lix cuanqilal li Santil Musik'ej tec'ul chi səb ut a'an chic tācuānk eriq'uin, chan.

Li Jesús quic'ame' sa' choxa xban li Dios

⁶ Eb li apóstol li ch'utch'ueb aran que'xpatz' re li Jesús: —At Kacua', ¿ma anakcuan tāq'ueheb

cui'chic xcuanguileb laj Israel re te'xtakla cui'chic rib xjuneseb? chanqueb. ⁷ Quichak'oc li Jesús ut quixye reheb: —Mácu'a' ere laex xnaubal li c'a'ak re ru a'in. Ca'aj cui' li Dios Acuabej nana'oc re jok'e tixbānu xban nak ca'aj cui' a'an yal re sa' xben chixjunil. ⁸ Laex tec'ul le cuanquil nak tāchālk li Santil Musik'ej eriq'uin. Laex chic texch'olobānk resilal chicuix lāin arin Jerusalén, aran Judea ut Samaria. Jo' ajcui' yalak bar jun sut sa' ruchich'och' tech'olob li xyālal, chan. ⁹ Nak quirake' xyebal chixjunil a'in quic'ame' sa' choxa li Jesús xban li Dios. Yoqueb chirilbal nak quichal jun li chok ut quimukun sa' li chok. Ut inc'a' chic que'ril ru. ¹⁰ Toj yoqueb ajcui' chirilbal nak yo chi xic li Jesús sa' choxa nak xakamileb cuibeb li cuink chiruheb. Sakeb li rak'. ¹¹ Ut que'xye reheb: —Ex cuink aj Galilea, ¿C'a'ut nak yoquex chi iloc sa' choxa? Li Jesús li xcuán sa' eyānk ut xc'ame' sa' choxa, a'an tāchālk cui'chic. Chanru nak xeril chi xic sa' choxa, jo'can cui'chic nak téril nak yok chi chālc, chanqueb reheb.

*Quixakabac laj Matías chok' apóstol chok' rekaj
laj Judas*

¹² Chirix a'an eb li apóstol que'cube chak sa' li tzul Olivos ut que'coeb cui'chic Jerusalén. Li tzul a'an nach' cuan riq'uin li tenamit Jerusalén, jun kilómetro tana xnajtil, jo' xnajtil li naru neque'xbeni sa' li hilobal cutan. ¹³ Nak que'cuulac Jerusalén que'take'sa' xca'tasal li cab li neque'hilan cui' nak cuanqueb Jerusalén. A'aneb laj Pedro, laj Juan, laj Jacobo, laj Andrés, laj Felipe, laj Tomás, laj Bartolomé, laj Mateo, laj Jacobo li

ralal laj Alfeo, laj Simón li na-oquen sa' xyānkeb li jun ch'utal Celote neque'xye reheb, ut laj Judas li ralal laj Jacobo. ¹⁴ Chixjunileb a'an yoqueb chi tijoc chi junajeb xch'ol rochbeneb li ritz'in li Jesús ut lix María lix na'. Ut cuanqueb ajcui' ixk yoqueb chi tijoc rochbeneb. ¹⁵ Sa' eb li cutan a'an jun ciento riq'unin junmay chixjunileb laj pabanel li ch'utch'ūqueb aran. Laj Pedro quixakli sa' xyānkeb ut qui-oc chixyebal reheb: ¹⁶ —Ex inherman, tento nak tauxmānk li tz'ibānbil sa' li Santil Hu li quic'ute' chirū li rey David xban li Santil Musik'ej chirix laj Judas li quik'axtesin re li Jesús reheb li que'chapoc re. ¹⁷ Laj Judas, a'an raj jun sa' kayānk sa' li c'anjel a'in. ¹⁸ Riq'unin lix tojbal li quiq'uehe' re xban nak quixbānu li māusilal, quilok'e' jun li ch'och'. Quixyatz' rib ut nak quit'ane' chi xulxu, quichire' ut qui-el chak chixjunil sa' lix sa'. ¹⁹ Qui-el ut resil a'an sa' xyānkeb chixjunileb li cuanqueb Jerusalén. Jo'can nak Acéldama neque'xye re li na'ajej a'an sa' li rātinobāleb. A'an naraj naxye "Lok'bil riq'unin quic'." ²⁰ Quic'ulman chi jo'can xban nak sa' li hu Salmos tz'ibānbil retaliil li naxye chi jo'ca'in: Chicanāk ta lix na'aj chi māc'a' chic cuan chiru.

Út mā ani ta chic chi cuānk sa' lix muhebal.
(Sal. 69:5)

Ut naxye ajcui':

Jalan ta chic chiq'uehek' chok' rekaj sa' lix c'anjel.
(Sal. 109:8)

²¹ Jo'can nak tento takaxakab junak chok' rekaj laj Judas. Cuanqueb cuīnk sa' kayānk que'ochbenin chak ke nak toj cuan li Jesús sa' kayānk, ²² chalen nak quicubſic chak xha' li Jesús

xban laj Juan ut toj chalen nak quic'ame' sa' choxa chiku. Jun reheb li cu_{ink} a'an naru takaxakab chok' rekaj laj Judas re nak tixch'olob ajcui' xyālal nak quicuacli cui'chic chi yo'yo li Jesús sa' xyānkeb li camenak, chan laj Pedro. ²³ Que'xxakab laj José li neque'xye Barsabás re. Aj Justo lix c'aba' jun chic neque'xq'ue. Ut que'xxakab ajcui' laj Matías. ²⁴ Ut que'oc chi tijoc ut que'xye: —At Kacula', laat nacanau chanru li rām li junjunk. Jo'can nak nakatz'ama chācuu nak tāc'utbesi chiku ani reheb li cuib a'in tāsic' ru re tācanāk chi c'anjelac chok' rekaj laj Judas. ²⁵ A'an tixc'ul xcuانquil chi c'anjelac chok' apóstol. Tixbānu li c'anjel li quixtz'ektāna laj Judas xban li inc'a' us quixbānu. Laj Judas co sa' li na'ajej chixtojbal xmāc bar xc'ulub cui' xic, chanqueb. ²⁶ Jo'can nak que'xbuli rix li ani tācanāk chi c'anjelac. Ut nak ac xe'būlic, li c'anjel a'an quicana sa' xbēn laj Matías. Ut sa' ajcui' li hōnal a'an laj Matías qui-oc chok' apóstol sa' xyānkeb li junlaju chic.

2

Que'xc'ul li xcuانquilal li Santil Musik'ej eb laj pabanel sa' xk'ehil li nink'e Pentecostés

¹ Sa' xk'ehil li nink'e re li Pentecostés ch'utch'ūqueb chixjunileb laj pābanel sa' jun chi na'ajej ut junajeb xch'ol. ² Que'rabi jun chokinc chanchan xyāb cacuil ik' yo chi chalc sa' choxa. Chixjunileb li cuanqueb sa' li cab que'rabi. ³ Que'rili chanchan rak' xam. Li rak' xam que'xjeq'ui rib ut que'hilan sa' xbēneb chi xjunjunkaleb. ⁴ Que'xc'ul li xcuانquilal li Santil Musik'ej, ut que'oc chi ətinac sa' jalan ətinobal

a' yal chanru quic'ute' chiruheb xban li Santil Musik'ej. ⁵ Cuanqueb aj judío aran Jerusalén cauheb xch'ol sa' xpabaleb. Que'chal chak sa' chixjunil li tenamit jun sut rubel choxa. ⁶ Nak que'rabi li c'a'ru yoqueb chixc'ulbal eb a'an, que'xch'utub ribeb li q'uila tenamit. Sachsoqueb xch'ol xban nak que'rabi nak yoqueb chi ətinac sa' li rətinobəaleb li junjunk chi tenamit. ⁷ C'ajo' nak que'xucuac ut sachsoqueb xch'ol que'cana ut que'xye chi ribileb rib: —¿Ma məcua'eb ta bi' aj Galilea chixjunileb a'in li yoqueb chi ətinac sa' jalanil ətinobəl? ⁸ ¿C'a'ut nak yoco chirabinquileb chi ətinac sa' li kətinobəl chikajunkal? ⁹ Anakcuán eb a'an yoqueb chi ətinac sa' rətinobəaleb laj Partos, laj Medo, laj elamitas ut chikajunilo ləo li cuanco Mesopotamia, ut Judea, Capadocia, Ponto ut Asia, ¹⁰ jo'queb ajcui' laj Frigia ut laj Panfilia, laj Egipto ut eb li cuanqueb sa' eb li na'ajej xcuent Libia li cuanqueb nach' riq'uin Cirene, jo'queb ajcui' laj Roma. ¹¹ Cuanqueb aj judío sa' xyo'lajiqueb ut cuanqueb ajcui' li que'xjal xpəbal ut que'oc sa' xyənkeb laj judío. Cuanqueb ajcui' li que'chal Creta ut Arabia. Nakabi nak yoqueb chixyebal sa' kətinobəl li c'a'ru yo chixbənunquil li Kəcua'. Dios riq'uin xnimal xcuانquilal, chanqueb. ¹² Ut chixjunileb sachsoqueb xch'ol ut inc'a' que'xtau ru. Que'xye chiribileb rib: —¿C'a'ru xyəlal a'in li yoco chixc'ulbal? chanqueb. ¹³ Cuanqueb ajcui' yoqueb chi hoboc ut yoqueb chixyebal: —Mare te'calək, chanqueb.

Laj Pedro naxch'olob xyəlal chiruheb li q'uila tenamit

14 Tojo'nak quixakli laj Pedro rochbeneb li jun-laju chic chi apóstol ut qui-oc chi ątinac chi cau xyab xcux. Quixye reheb li q'uila tenamit: — Ex cuech tenamitil aj judío ut chejunilex ləex li cuanquex Jerusalén, laín tinye erek c'a'ru xyalal a'in. Q'uehomak retal chi us li oc cue xyebal erek.

15 Li jo' q'uialeb li cuanqueb arin moco te'calak ta jo' yoquex chixc'oxlanquil ləex. Anakcuan toje' beleb or re li cutan cuanco. **16** Yoco ban chixc'ulbal li quixye chak resil li profeta Joel nak quixye chi jo'ca'in:

17 Sa' eb li cutan li telaje'chalk, chan li Dios, laín tinq'ue lin musik' chi cuanc riq'uineb chixjunileb li tenamit. Eb lə ralal ęc'ajol te'yehok ratin profeta. Ut tinc'ut li xyalal chiruheb li tixil cuink sa' xmatq'ueb ut tinc'uteb li visión chiruheb li saj cuink.

18 Ut tinq'ue ajcui' lin musik' chi cuanc riq'uineb lin mos cuink ut lin mos ixf, ut talaje'xye resil li c'a'ru tac'ulmank mokon.

19 Ut sachba ch'olej tinc'utbesi cheru chiru choxa jo' ajcui' sa' ruchich'och' ut teril li quic', li xam ut li sib chanchan li chok.

20 Tək'ojyinok' ru li sak'e ut li po tacakok' ru chanchan li quic' toj tacuulak xk'ehil li cutan a'an, li k'axal xiu xiu, nak laín tinrakok ątin, chan li Dios.

21 Abanan chixjunileb li neque'yaban re lix c'aba' li Kacua', te'colek'. (Joel 2:28-32)

22 Ex aj Israel, abihomak li tinye erek. Ləex ac nequenau nak li Jesús aj Nazaret, a'an q'uebil xcuanyl xban li Dios sa' eyank ləex riq'uin li sachba ch'olej ut li milagro quilajxbənu. Ləex ac

nequenau nak riq'uin xcuانquil li Dios quixbanu li sachba ch'olej. ²³ Li Jesús quik'axtesic sa' eruk' laex xban nak ac jo'can chak sa' xch'ol li Dios nak jo'can tixc'ul. Ut laex quechap ut quek'axtesi sa' ruk'eb li cuink li inc'a' useb xna'leb. Ut eb a'an que'xcamsi chiru cruz. ²⁴ Abanan li Dios quicuaclesin cui'chic re chi yo'yo sa' xyānkeb li camenak. Li Dios quirisi xcuانquil li cāmc sa' xben xban nak li cāmc inc'a' naru nanumta sa' xben. ²⁵ Jo'ca'in quixye li rey David chirix li Jesús: Lain junelic ninc'oxla li Dios. A'an cuan cuiq'uin.

Mac'a' c'a'ru tāisink cue riq'uin li Dios.

²⁶ Numtajenak li saylal cuan sa' li cuām xban nak c'ojc'o inch'ol riq'uin li Kacua'.

²⁷ Lain ninnau nak tinacuaclesi cui'chic chi yo'yo sa' xyānkeb li camenak. Ut ninnau ajcui' nak inc'a' tācanab chi k'ac lix tibel lā Santil Alal.

²⁸ Lain ninnau nak laat nacatc'utuc chicuu chanru nak tintau li junelic yu'am. Xban nak laat cuancat cuiq'uin, junelic sa sa' inch'ol. Ut ca'aj cui' acuiq'uin cuan li sahil ch'olejil. (Sal. 16:8-11)

²⁹ Ex kech tenamitil, lain ninye ere chi anchal inch'ol nak tz'akal yal nak laj David li kaxe'tonil yucua' quicam ut quimuke'. Lao nakanau nak li muklebal li cuan cui' toj cuan ajcui' chalen anakcuan. ³⁰ Laj David a'an jun profeta. A'an quixnau nak li Dios quixye riq'uin juramento nak sa' xyānkeb li ralal xc'ajol tayo'lak li Cristo, ut a'an chic taxakabak chok' rey. ³¹ Ut laj David quixnau li c'a'ru tāc'ulmānk mokon. Jo'can nak quixch'olob xyālal nak li Cristo tācuaclik cui'chic chi yo'yo

sa' xyānkeb li camenak. Quixnau nak a'an inc'a' tācanāk sa' xna'ajeb li camenak chi moco lix tibel tak'ak. ³² A'an a'in li Jesús li quicuaclesic cui'chic chi yo'yo xban li Dios. Lao xkil tz'akal riq'uin xnak' ku. Jo'can nak nakanau nak yal. ³³ Quic'ame' xban li Dios re nak tāc'ojlak sa' lix nim uk' ut quiq'uehe' xcuanquil. Ut quiq'uehe' li Santil Musik'ej re xban li Dios. Ut quixq'ue ajcui' ke lao li Santil Musik'ej jo' quiyechi'ic ke. A'an a'in li yoquex chirilbal ut chirabinquil anakcuán. ³⁴ Li rey David inc'a' quic'ame' sa' choxa jo' nak quic'ame' li Cristo sa' choxa. Abanan quixye chi jo'ca'in:

Li Dios quixye re li Kacua': C'ojlan sa' lin nim uk',
³⁵ toj tinq'ueheb li xic' neque'iloc ącue rubel la cuanquil. (Sal. 110:1)

³⁶ Chenuahak chejunilex laex aj Israel nak li Jesús li queq'ue laex chiru cruz, a'an li quiq'uehe' chok' Kacua' ut chok' Cristo xban li Dios, chan laj Pedro. ³⁷ Nak que'rabi a'an li ch'utch'ūqueb aran, que'yot'e' xch'oleb ut que'xye re laj Pedro jo' ajcui' reheb li apóstol li jun ch'ol chic: —Ex kas kitz'in, ¿c'a'ru takabānu? chanqueb. ³⁸ Laj Pedro quichak'oc ut quixye reheb: —Chiyot'ek' ech'ol ut jalomak ec'a'ux ut tācubsik eha' chi junjunkalex sa' xc'aba' li Jesucristo re nak tixcuy emac li Dios ut tixq'ue ere li Santil Musik'ej. ³⁹ Yechi'ibil ere laex li maṭan a'in, ut yechi'ibil ajcui' reheb le ralal ec'ajol ut reheb ajcui' li macua'eb aj judío. Yechi'ibil reheb chixjunileb li jo' q'uialeb te'bokek' xban li Kacua' li kaDios, chan. ⁴⁰ Macua' ca'aj cui' a'an li quixye laj Pedro reheb. Quixch'olob ban ajcui' xyalal chiruheb riq'uin nabal chi ątin ut quixq'ue xna'lebeb. Quixye reheb:

—Chenauhak xcolbal ərib chiru li tojba mäc li tachalk sa' xbeneb li inc'a' useb xna'leb, chan.
41 Ut chixjunileb li que'pabán re li rätin que'cubsic xha'. Oxib mil tana li que'pabán sa' li cutan a'an ut que'oc chok' xcomoneb.

*Chanru nak que'cuān chijunaj xch'oleb li xben aja
pabanel*

42 Cauheb xch'ol chixpabánquil li tijleb li quich'olobac chiruheb xbaneb li apóstol. Junaj xch'oleb nak cuanqueb ut sa' comonil que'tijoc ut que'cua'ac re xjulticanquil lix camic li Jesucristo.
43 Chixjunileb sachsoqueb xch'ol xban li milagro ut li sachba ch'olej li yoqueb chixbanunquil li apóstol. **44** Ut eb li que'pabán junaj xch'oleb ut chixjunil li c'a'ru cuan reheb, reheb sa' comonil.
45 Que'xc'ayi lix ch'och'eb ut chixjunil li c'a'ru cuan reheb ut que'xjeq'ui lix tz'ak reheb chixjunileb a' yal chanru tac'anjelak chiruheb li junjunk.
46 Rajlal cutan que'xch'utub ribeb sa' li templo chi lok'oninc. Ut sa' eb li rochoch que'cua'ac sa' comonil chi sa sa' xch'oleb ut chi junaj xch'oleb.
47 Que'xlok'oni li Kacua' Dios ut que'q'uehe' xcuánquil xbaneb chixjunileb li tenamit. Ut rajlal cutan li Dios quixtenk'aheb chi q'uianc laj pabanel.

3

Laj Pedro quixq'uirtesi jun li cuink inc'a' nabec

1 Sa' jun li cutan que'coeb sa' li templo laj Pedro rochben laj Juan oxib or re ecuu sa' x-ɔril li tijoc. **2** Rajlal cutan nac'ame' jun li cuink inc'a' nabec chalen sa' xyo'lajic ut naq'uehe' chire li

oquebal re li templo. Lix c'aba' li oquebal a'an "Ch'ina'us". Naq'uehe' li yaj aran re tixtz'ama c'a'ru re riq'uineb li neque'oc sa' li templo. ³ Li cuink a'in quiril nak yoqueb chi oc sa' li templo laj Pedro ut laj Juan. Qui-oc chixtz'amanquil c'a'ru re reheb. ⁴ Laj Pedro ut laj Juan que'cana chirilbal li yaj ut laj Pedro quixye re: —Ilon chak kiq'uin. — ⁵ Nak quirabi li cuink li c'a'ru quixye, qui-oc chiroybeninquil c'a'ru te'xq'ue re. ⁶ Laj Pedro quixye re: —Mac'a' intumin lайн re tinq'ue ącue. Abanan li c'a'ru cuan cuiq'uin tinq'ue ącue. Sa' xc'aba' li Kacua' Jesucristo laj Nazaret, ninye ącue cuaclin ut b n, chan re. ⁷ Ut nak quixye a'in, quixchap ut quixcuaclesi riq'uin lix nim uk'. Sa' junpat quicacuu li xben rak ut li rok li cuink. ⁸ Sa' junpat quixakli ut quib c. Ut qui-oc sa' li templo rochbeneb. Yo chi pisc'oc xban xsahil xch'ol ut yo chixlok'oninquil li Dios. ⁹ Chixjunileb li tenamit que'iloc re chi b c ut chixlok'oninquil li Dios. ¹⁰ C'ajo' nak que'xucuac ut sachsoqueb xch'ol chirilbal li cuink a'an, xban nak que'xnau ru nak a'an li nac'ojla chixtz'amanquil c'a'ru re chire li oquebal "Ch'ina'us" xc'aba'.

Laj Pedro quixye reheb laj jud o nak li Jes s a'an laj Colonel li yechi'inbil xban li Dios

¹¹ Ut li cuink li quiq'uirtesic inc'a' quiraj xcan-abanquil rib riq'uineb laj Pedro ut laj Juan. Yo chi b c rochbeneb. Ut chixjunileb sachsoqueb xch'ol chirilbal li quic'ulman. Que'coeb sa' ąnil sa' li templo ut que'xch'utub ribeb sa' li oquebal Salom n xc'aba', cuanqueb cui' laj Pedro ut laj Juan. ¹² Nak laj Pedro quirileb, quixye reheb: —La ex

aj Israel, ¿c'a'ut nak sachso ech'ol nequexcana xban li c'a'ru xc'ulman? ¿C'a'ut nak yoquex chik-ilbal? ¿Ma nequec'oxla laex nak lao xkaq'uirtesi li cuink a'in kajunes? ¿Ma xban ta bi' kacuan-quil ut li kachabilal nak xkaq'ue chi bec li cuink a'in? ¹³ Li Dios li que'xlok'oni chak laj Abraham, laj Isaac ut laj Jacob jo'queb ajcui' li kaxe'tonil yucua', a'an quiq'uehoc xcuانquil li Jesucristo laj c'anjel chiru. Ut laex quek'axtesi a'an re laj Pilato. Ut nak laj Pilato quiraj raj rach'abanquil, laex inc'a' queraj. ¹⁴ Laex inc'a' queraj xcolbal rix li santil cuink a'in, li tic xch'ol. A' chic laj cam-sinel queq'ue chi ach'abaq. ¹⁵ Laex queq'ue chi camsic a'an, ut a'an li naq'uehoc yu'am. Abanan quicuaclesic cui'chic chi yo'yo xban li Dios sa' xyankeb li camenak. Ut a'an li nakach'olob xyalal lao xban nak lao xkil chi tz'akal nak quicuaci. ¹⁶ Li cuink a'in xq'uira sa' xc'aba' li Jesús. Riq'unin xpabanquil li Jesús xq'uira chi junaj cua li cuink a'in li nequenau ru ut yoquex chirilbal. ¹⁷ Jo'can ut ex cuas cuitz'in, lain ninnau nak queq'ue chi camsic li Jesús xban nak inc'a' nequenau xyalal jo'queb ajcui' li neque'taklan sa' eben. ¹⁸ Riq'unin a'in quitz'akloc ru li que'xye chak li profeta najter nak que'xye nak tento tixc'ul li rahobtesic li Cristo li Mesías, xban nak jo'can quixye li Dios. ¹⁹ Jo'can ut nak yot'omak ech'ol ut jalomak ec'a'ux ut sic'omak li Kacua' re nak a'an tixcuy tixsach le mac. Ut li Kacua' tixq'ue xcacuilal ut xsaylal ech'ol. ²⁰ Li Dios tixtakla cui'chic chak li Jesucristo sa' ruchich'och' xban nak a'an li Mesías li ac xak-abanbil chak najter re xcolbaleb chiru li raylal li cuanqueb sa' ruchich'och'. ²¹ Abanan tento nak

cuank chak aran sa' choxa toj tacular xk'ehil nak tatz'aklok ru chixjunil jo' que'xch'olob xyalal li santil profeta junxilaj jo' quiyehe' reheb xban li Dios. ²² Laj Moisés quixye reheb li kaxe'tonil yucua', "Li Kacua' le Dios tixq'ue junak profeta sa' eyank sic'bil ru xban jo' lain. Ecomon ajcui' laex. Chebanu chixjunil li c'a'ru tixye ere. ²³ Ut li ani inc'a' tixpab li c'a'ru tixye li profeta a'an, taisik sa' xyank keb lix tenamit li Dios ut tasacheck' ru." (Dt. 18:18-19) ²⁴ Chalen nak quicuan li profeta Samuel chixjunileb li profeta que'xye ajcui' resil li c'a'ru tac'ulmank sa' eb li cutan a'in. ²⁵ Laex ralal xc'ajol eb li profeta ut laex texc'uluk re li quiyechi'ic reheb le xe'tonil yucua'. Nak li Dios quixbanu li contrato riq'uin laj Abraham, quixye re, "Chixjunileb li cuanqueb sa' ruchich'och' te'osobtesik sa' xc'aba'eb la cualal ac'ajol." ²⁶ Nak li Dios quixtakla chak li ralal, quixtakla xben cua eriq'uin laex aj judío re erosobtesinquil re nak chejunjunkalex teyot' ech'ol ut tejal ec'a'ux ut tecanab xbanunquil li mausilal.

4

Laj Pedro yo chixch'olobanquil li xyalal chiruheb li neque'taklan sa' xbeneb laj judío

¹ Toj yoqueb ajcui' chi atinac laj Pedro ut laj Juan nak que'cuulac laj tij riq'uineb. Rochbeneb laj tij cuan li nataklan sa' xbeneb li soldado li neque'c'ac'alen re li templo ut rochbeneb ajcui' laj saduceo. ² Yoqueb xjosk'il xban nak laj Pedro ut laj Juan yoqueb chixc'utbal li xyalal chiruheb li tenamit ut yoqueb chixch'olobanquil xyalal chiruheb

chirix lix cuaclijkeb li camenak chi yo'yo sa' xc'aba' li Jesús. ³ Xbaneb xjosk'il que'xchap laj Pedro ut laj Juan ut que'xq'ue sa' tz'alam toj sa' li cutan jun chic xban nak ac x-ecuu. ⁴ Abanan nabaleb li que'pában re li ątin li yoqueb chixyebal laj Pedro ut laj Juan. Cuanqueb na qbak mil li cuink li que'pában. ⁵ Sa' li cutan jun chic que'ch'utla Jerusalén eb li xbənil aj tij, ut eb li neque'taklan sa' xbeneb laj judío, jo'queb ajcui' laj tz'ib. ⁶ Cuanqueb ajcui' aran laj Anás li xyucua'il laj tij, ut laj Caifás, ut laj Juan, ut laj Alejandro jo'queb ajcui' li jun ch'ol chic lix comoneb li xyucua'il aj tij. ⁷ Que'xtakla xc'ambal laj Pedro ut laj Juan. Que'xakabac chiruheb ut que'xye reheb: —¿Ani xq'uehoc ecuanquil? Ut, ¿ani sa' aj c'aba' yoquex chixbanunquil li milagro a'in? chanqueb. ⁸ Ut laj Pedro qui-oc chi ątinac riq'uin xcuانquil li Santil Musik'ej ut quixye reheb: —Laex li nequextaklan sa' xbeneb laj judío ut laex li nequexc'amoc be chiruheb, abihomak li oc cue xyebal, ⁹ xban nak yoquex chixtz'ilbal ątin sa' kabən riq'uin li usilal li xc'ul li cuink a'in. Yoquex chixpatz'bal ke chanru nak quiq'uirtesic li cuink a'in. ¹⁰ Takaye li xyālal ēre re nak tēnau nak li cuink a'in xq'uira sa' xc'aba' li Jesucristo laj Nazaret li queq'ue laex chi camsic chiru cruz. Ut a'an li quicuaclesic cui'chic chi yo'yo xban li Dios sa' xyānkeb li camenak. Sa' xc'aba' a'an xq'uira li cuink a'in li yoquex chiribal arin anakcuan. ¹¹ Li Jesús a'an chanchan li chabil pec tz'ektañanbil xbaneb laj cablanel. Laex xetz'ektaña li Jesús. Chanchanex laj cablanel li que'tz'ektañan re li

chabil pec li quiq'uehe' chok' xxuc li cab mokon.

¹² Ut mā ani chic aj iq'uin tāruk takatau kacolbal, xban nak māc'a' chic junak c'aba'ej sa' chixjunil li ruchich'och' q'uebil ta ke re tāruk tocolek' cui', chan laj Pedro. ¹³ Que'ril nak cauheb xch'ol laj Pedro ut laj Juan chi ątinac. Que'xq'ue retal nak moco tzolbileb ta ut māc'a'eb xcuanquil. Ut que'xsach xch'oleb chirabinquil li c'a'ru que'xye. Ut que'xq'ue retal nak eb li cuink a'in que'bēc chak rochben li Jesús. ¹⁴ Ut māc'a' chic naru neque'xye xban nak yoqueb chiribal li cuink li quiq'uirtesic xakxo chixc'atkeb laj Pedro ut laj Juan. ¹⁵ Jo'can nak que'xtakla risinquil chirix cab laj Pedro ut laj Juan. Ut que'oc chixc'ubanquil chi ribileb rib c'a'ru te'xbānu riq'uineb. ¹⁶ Ut que'xye: —¿C'a'ru takabānu riq'uineb li cuink a'in? Chixjunileb li tenamit arin Jerusalén neque'xnau nak tz'akal milagro que'xbānu re li cuink. Lāo inc'a' naru takaye nak inc'a' yāl a'an. ¹⁷ Takase'besiheb re nak inc'a' chic te'xye resil li na'leb a'in sa' eb li tenamit. Takaye reheb nak chalen anakcuan inc'a' chic te'ątinak sa' xc'aba' li Jesús, chanqueb. ¹⁸ Ut nak que'boke' cui'chic laj Pedro ut laj Juan, que'xye reheb nak inc'a' chic tāruk te'ątinak chi moco taruk chic te'xtzoleb li tenamit sa' xc'aba' li Jesús.

¹⁹ Ut que'chak'oc laj Pedro ut laj Juan ut que'xye reheb: —C'oxlahomak chi us bar cuan li us chiru li Dios. ¿Ma us nak texkapāb lāex malaj ut us nak takapāb li Dios? ²⁰ Lāo inc'a' naru takacanab xye-bal resil li c'a'ru xkil ut xkabi, chanqueb. ²¹ Nak ac xe'xse'besiheb riq'uin cacuil ątin, que'rach'abeb. Māc'a' que'ru xbanunquil reheb xban nak chixjunileb li tenamit yoqueb chixlok'oninquil li Dios

riq'uin li c'a'ru quic'ulman. ²² Ac numenak ca'c'äl chihab cuan re li cuïnk li quiq'uirtesic riq'uin milagro.

Eb laj pabanel que'xtz'ama xtenk'anquil re nak cauhakeb xch'ol chixyebal resil li Jesús

²³ Ut nak ac xe'ach'abac laj Pedro ut laj Juan, que'coeb riq'uineb li rech aj pabanelil. Que'xserak'i reheb chixjunil li que'xye eb li xbënil aj tij ut eb li neque'taklan. ²⁴ Nak que'rabi a'an, chixjunileb laj pabanel que'tijoc chiru li Dios sa' comonil ut que'xye: —At Kacua' at nimajcual Dios, laat catyiban re li choxa, li ruchich'och', ut li palau. Laat catyiban re chixjunil li c'a'ru cuan. ²⁵ Riq'uin li Santil Musik'ej caye re li rey David laj c'anjel chacuu nak tixye chi jo'ca'in:

¿C'a'ut nak yoqueb xjosk'il li tenamit li inc'a' neque'xpab li Dios? Ut, ¿c'a'ut nak yoqueb xc'ubanquil ribeb chixbanunquil li yal mact'a' na-oc cui'?

²⁶ Eb li rey que'josk'o' riq'uin li c'a'ru quixbanu li Kacua'. Ut que'xch'utub rib chixc'ubanquil chanru nak te'risi sa' xcuánquil li Mesías li xakabanbil chak xban li Dios. (Sal. 2:1-2)

²⁷ At Kacua', yal ajcui' nak que'xch'utub ribeb sa' li tenamit a'in laj Herodes ut laj Poncio Pilato rochbeneb li tenamit aj Israel jo'queb ajcui' li mact'a'eb aj Israel ut que'xc'ub ru chanru nak te'xbanu raylal re li Jesús la Santil Alal li sic'bil ru aban xban nak xic' que'ril. ²⁸ Jo'ca'in que'xbanu xban nak ac jo'can chak sa' ach'ol laat. Ut ac yebil chak aban nak jo'can tac'ulmank. ²⁹ Ut anakcuan, at Kacua', chaq'ue taxak retal li kase'besinquil

yoqueb, ut choatenk'a lao aj c'anjel chacuu re nak takaye la cuesilal chi cau kach'ol. ³⁰ Ut riq'uin taxak xnimal la cuanquil, taq'uirtesiheb li yaj ut chab'anu li sachba ch'olej ut milagro sa' xc'aba' li Jesús la Santil Alal, chanqueb sa' lix tijeb. ³¹ Nak ac xe'rake' chi tijoc, qui-ec'asic li na'ajej li ch'utch'uequeb cui'. Ut chixjunileb li cuanqueb aran que'nujac riq'uin li Santil Musik'ej. Ut cauheb xch'ol chixyebal li ratin li Dios.

Chixjunil li c'a'ru cuan rehēb laj pabanel, a'an rehēb sa' comonil

³² Ut chixjunileb li que'paban junajeb chic xch'oleb ut junajeb chic xc'a'uxeb. Ut ma ani quixye nak junes re a'an li c'a'ru cuan re. Reheb ban sa' comonil chixjunil li c'a'ru cuan rehēb. ³³ Eb li apóstol cauheb xch'ol chixch'olobanquil xyālal lix cuaclijic cui'chic chi yo'yo li Jesucristo sa' xyānkeb li camenak. Ut li Dios quirosobtesiheb chixjunileb chi nabal. ³⁴ Ma jun sa' xyānkeb mac'a' ta cuan re xban nak chixjunileb li cuanqueb xch'och' ut li cuanqueb rochocheb que'xc'ayi ut que'xk'axtesi rehēb li apóstol lix tz'ak li que'xc'ayi. ³⁵ Coxe'xq'ue li tumin rehēb re te'xjeq'ui a' yal jo' q'uijal tac'anjelak chiru li junjunk. ³⁶ Quicuan jun li cuink aj José xc'aba'. Eb li apóstol que'xq'ue Bernabé chok' xcab xc'aba'. Chi jalbil ru naraj naxye "Aj C'ojobanel Ch'olej". A'an xcomoneb li neque'tenk'an rehēb laj tij. Chipre xtenamit. ³⁷ Cuan jun xch'och' quixc'ayi. Quixc'am lix tz'ak ut quixq'ue rehēb li apóstol.

5

Li c'a'ru que'xc'ul laj Ananías ut lix Safira xban li mac que'xbənu

¹ Quicuan jun li cuink aj Ananías xc'aba'. Quixc'ayi jun lix ch'och' rochben lix Safira li rixakil. ² Ut que'xc'ub ru chi ribileb rib nak yijach lix tz'ak li ch'och' t̄acanāk chok' reheb. Ut li yijach chic quixc'am laj Ananías riq'uineb li apóstol ut quixye reheb: —A'an a'in chixjunil lix tz'ak li kach'och' li xkac'ayi, chan. ³ Laj Pedro quixye re: —At Ananías, ¿c'a'ut nak xaq'ue acuib chirale laj tza? ¿C'a'ut nak yocat chixbalak'inquil li Santil Musik'ej riq'uin nak yocat chixcanabanquil yijach lix tz'ak li ch'och' chok' acue? ⁴ ¿C'a'ut nak tat-oc xmukbal xtz'ak la ch'och'? ¿Ma macua' ta bi' acue? Cui xac'ayi la ch'och', ¿ma inc'a' ta bi' raj xru xcana chok' acue lix tz'ak? Macua' chiku lao yocat chi tic'ti'ic. Chiru ban li Dios, chan. ⁵ Nak quirabi li atin li quixye laj Pedro, quit'ane' laj Ananías ut camenak quicana. Ut c'ajo' nak qui-oc xxiuheb chixjunileb li que'iloc re jo'queb ajcui' li que'abin resil. ⁶ Ut eb li cuink li toj sajeb li cuanqueb aran que'xlan li camenak, que'xpako ut que'xc'am re te'xmuk. ⁷ Ac xnume' na chic oxib or nak quicuulac lix Safira li rixakil. Inc'a' naxnau c'a'ru ac xc'ulman. ⁸ Laj Pedro quixye re: —Ye cue. ¿Ma jo' a'in xec'ayi cui' le ch'och'? — Ut lix Safira quixye: —Yal, jo'can xkac'ayi cui', chan. ⁹ Ut laj Pedro quixye cui'chic re: — ¿C'a'ut nak xec'ub cheribil erib xyalbal rix li Santil Musik'ej? Cue'queb chak li xe'mukuc chak re la belom ut tate'xc'am ajcui' laat, chan. ¹⁰ Ut sa'

ajcui' li h_onal a'an lix Safira quit'ane' chi rok laj Pedro ut camenak quicana. Eb li cuink que'oc sa' cab ut que'ril nak camenak chic. Que'risi ut coxe'xmuk chak chixc'atk lix belom. ¹¹ C'ajo' nak qui-oc xxiuheb chixjunileb laj p_abanel jo'queb ajcui' chixjunileb li que'abin re li resil a'in.

Nabal li milagro ut li sachba ch'olej que'xbānu li apóstol

¹² Rajlal neque'xch'utub ribeb sa' xm_u li templo chixjunileb laj p_abanel cuan cui' li oquebal Salomón xc'aba'. Nabal li milagro que'xbānu eb li apóstol ut nabal li sachba ch'olej. ¹³ Usta eb li tenamit neque'xq'ue xlok'aleb laj p_abanel, abanan neque'xucuac chi xic sa' xyānkeb. ¹⁴ C'ajo' nak yoqueb chi tamc li yoqueb chi p_abanc re li K_acua', jo' cuink jo' i_{ix}k. ¹⁵ Ut nabaleb li que'xc'am chak lix yajeb ut que'xyocob sa' lix cuarib malaj chiru lix pop chire be. Que'raj nak laj Pedro tixq'uirtesiheb. Eb a'an que'xc'oxla nak usta yal t_anūmek' chiruheb, te'q'uirak. ¹⁶ Nabaleb li que'chal chak sa' eb li tenamit li cuanqueb chi nach'riq'uin Jerusalén. Que'xc'am chak li yaj ut eb li cuan m_aus aj Musik'ej riq'uineb. Ut chixjunileb quilaje'q'uirtesic.

Eb li apóstol que'c'ame' cui'chic chiruheb li neque'taklan sa' xb_eneb laj judío

¹⁷ Ut li xyucua'il aj tij ut eb laj saduceo li cuanqueb rochben, c'ajo' nak que'oc xcakalinquileb li apóstol. ¹⁸ Jo'can nak que'xtakla xchapbaleb ut que'xq'ueheb sa' li tz'alam li neque'q'uehe' cui' yalak ani. ¹⁹ Abanan chiru li k'o_{jy}in a'an jun lix ángel li K_acua' quixte

lix puertil li tz'alam ut quirisiheb sa' tz'alam ut quixye reheb: ²⁰ —Ayukex sa' li templo ut t̄ech'olob xyālal chiruheb li tenamit chirix li ac' yu'am, chan reheb. ²¹ Cuulajak chic nak toj ek'ela que'cōeb sa' li templo eb li apóstol ut que'oc chixch'olobanquil li xyālal chiruheb li tenamit jo' quiyehe' reheb xban li ángel. Sa' ajcui' li ek'ela a'an que'cuulac li xbēnil aj tij rochbeneb chixjunileb li neque'tenk'an re, ut que'xbokeb li jun ch'ol chic li neque'c'amoc be chiruheb laj judío jo'queb ajcui' li neque'taklan sa' xbēneb. Ut que'xtakla xyebal re laj ilol tz'alam nak te'c'amek' li apóstol riq'uineb. ²² Que'cuulac li takl sa' li tz'alam ut inc'a' chic que'ta'e' li apóstol aran. Jo'can nak que'suk'i chixyebal resil ut que'xye: ²³ —Relic chi yal li tz'alam tz'aptz'o chi us nak xkatau. Ut eb laj c'ac'alenel cuanqueb chire li oquebal. Nak xkate li tz'alam, inc'a' chic xkatauheb li cuink chi sa', chanqueb li takl. ²⁴ Nak que'rabi a'an, eb li xbēnil aj tij ut eb li neque'taklan sa' xbēneb li soldado li neque'c'ac'alen sa' li templo, que'sach xch'oleb ut que'oc chixc'oxlanquil c'a'ru t̄acanak cui' li yo chi c'ulmanc. ²⁵ Quichal jun ut quixye reheb: —Eb li cuink li que'q'uehe' sa' tz'alam ecuer cuanqueb sa' li templo ut yoqueb chixch'olobanquil li xyālal chiruheb li tenamit, chan. ²⁶ Co ut li jun li nataklan sa' xbēneb li soldado rochbeneb lix takl. Ut que'xc'ameb chak li apóstol sa' usilal xban nak que'xucuac. Que'xc'oxla nak māre te'cutek' chi pec xbaneb li tenamit. ²⁷ Que'c'ame' laj Pedro ut laj Juan ut que'xakabac chiru li xyucua'il aj tij ut chiruheb li cuanqueb rochben. Ut li xyucua'il aj tij quiātinac riq'uineb ut quixye reheb: ²⁸ —Ma

inc'a' ta bi' xkaye ere nak inc'a' chic t_{et}zoleb li tenamit sa' xc'aba' li cu_{ink} a'an? Læx yoquex chixc'utbal li tijleb a'an sa' chixjunil Jerusalén ut t_{er}aj xq'uebal sa' kab_{en} lix camic li cu_{ink} a'an, chanqueb. ²⁹ Laj Pedro, jo'queb ajcui' li rech apostolil, que'chak'oc ut que'xye: —¿Ma takak'et li c'a'ru naxye li Dios ut takap_{ab} li c'a'ru neque'xye li cu_{ink}? Inc'a'. Tento takap_{ab} li c'a'ru naxye li Dios. ³⁰ Li Dios li que'xlok'oni chak li kaxe'tonil yucua', a'an li quicuaclesin cui'chic re li Jesús chi yo'yo sa' xy_{an}keb li camenak, li queq'ue chi camsic chiru cruz laex. ³¹ Li Jesús, a'an li quiq'uehe' xlok'al xban li Dios ut quiq'uehe' chi c'ojlac sa' xnim uk' ut quiq'uehe' xcuquil chi taklanc ut chi coloc, re nak laj Israel naru te'yot'ek' xch'oleb te'xjal xc'a'ux ut te'cuyek' xma_{que}b. ³² Lao xkil a'an riq'uin ku. Jo'can nak nakach'olob xy_{al}al a'in ut li Santil Musik'ej li naxq'ue li Dios reheb li neque'p_{ab}an, a'an ajcui' nac'utuc re li xy_{al}al a'in, chanqueb. ³³ Li xyucua'il aj tij ut li cuanqueb rochben, c'ajo' nak que'josk'o' nak que'rabi li quixye laj Pedro ut que'raj raj xcamsinquileb li apóstol. ³⁴ Abanan sa' xy_{an}keb a'an cuan jun aj fariseo aj Gamaliel xc'aba'. Li cu_{ink} a'an aj tzolol chak'rab ut naq'uehe' xcuquil xbaneb li tenamit. Quixakli chiruheb ut quixtakla risinquileb li apóstol junpat chirix cab. ³⁵ Ut quixye reheb: —Ex cu_{ink} aj Israel, c'oxlahomak chi us c'a'ru t_ebanu riq'uineb li cu_{ink} a'in. ³⁶ Q'uehomak retal li c'a'ru quixc'ul laj Teudas. A'an quixye nak k'axal nim xcuquil. Cuan na cahibak ciento chi cu_{ink} li neque'taken re. Aban li jun a'an quicamsic

ut chixjunileb li que'taken re quilaje'xcha'cha'i ribeb ut que'oso' yal chi jo'can. ³⁷ Ut jo'can ajcui' quixc'ul laj Judas, Galilea xtenamit, nak quic'ulun sa' xk'ehil chixtz'ib'anquil xc'aba'eb li tenamit. Quixbalak'iheb nabaleb li tenamit. Quicam ajcui' a'an ut chixjunileb li que'taken re que'cha'cha'jc. ³⁸ Anakcuán laín tinye ère: Canabomakeb li cuink a'in. Mèch'i ch'i iheb chic xban nak cui li c'anjel a'in yal xc'a'ux cuink, taosok'. ³⁹ Abanan cui ut re li Dios, inc'a' texruk chixpo'bal ru. Q'uehomak retal chi us märe anchal yoquex chi pletic riq'uin li Dios, chan laj Gamaliel. ⁴⁰ Ut que'xc'ul xch'ol li quixye. Que'xbokeb li apóstol ut que'xq'ueheb chi saq'uec' ut que'xye reheb nak inc'a' chic te'atínak sa' xc'aba' li Jesús. Ut chirix a'an, que'ach'abac. ⁴¹ Ut eb li apóstol que'el chiruheb chi k'axal sa sa' xch'oleb xban nak chiruheb a'an lok' xc'ulbal li raylal sa' xc'aba' li Jesús. ⁴² Ut inc'a' que'xcanab xch'olobanquil xyalal chiruheb li tenamit sa' li templo ut sa' eb li rochoch ut que'xye resil nak li Jesucristo, a'an laj Colonel li yechi'nbil xban li Dios.

6

Cuukub chi cuink que'xakabac chi c'anjelac

¹ Sa' eb li cutan a'an c'ajo' nak yoqueb chi q'uianc eb laj pabanel. Ut eb laj judío li neque'atínac sa' griego que'oc chixcuech'inquileb laj judío li neque'atínac sa' hebreo. Que'xye nak inc'a' tz'akal li c'a'ru naq'uehe' rajlal cutan reheb lix mälca'an li cuankeb sa' xyänkeb a'an. ² Jo'can nak li cablaju chi apóstol que'xch'utub chixjunileb laj

pabanel ut que'xye reheb: —Inc'a' naru takacanab xch'olobanquil rätin li Dios yal re nak tojec'ok tzacaemk lao. ³ Ex herman, sic'omak sa' eyank cuukubak chi cuink chäbilakeb xna'leb ut nujenakeb chi Santil Musik'ej riq'uineb. Chäbilak xyehom xbänuhomeb. A'aneb li te'q'uehek' sa' li c'anjel a'in. ⁴ Ut lao takayal kak'e chi tijoc ut chixjulticanquil li rätin li Dios, chanqueb. ⁵ Ut que'xc'ul xch'oleb chixjunil li cuanqueb aran. Que'xsic' ru laj Esteban li napabán chi tz'akal ut nujenak chi Santil Musik'ej. Ut que'xsic' ajcui' ruheb laj Felipe, laj Prócoro, laj Nicanor, laj Timón, laj Parmenas, ut laj Nicolás aj Antioquía li qui-oc sa' xyänkeb laj judío. ⁶ A'aneb a'in li que'xakabac chi c'anjelac. Ut eb li apóstol que'xq'ue li ruk' sa' xbeneb ut que'tijoc. ⁷ Jo'can nak yo'chi abic li rätin li Kacua'yalak bar. Ut yoqueb chi tämc laj pabanel aran Jerusalén. Ut nabaleb laj tij que'pabanel.

Nak que'xchap laj Esteban

⁸ Laj Esteban a'an jun cuink osobtesinbil xban li Dios ut q'uebil xcuانquil chixbanunquil li milagro ut sachba ch'olej sa' xyänkeb li tenamit. ⁹ Cuanqueb xcomoneb li neque'tzoloc sa' li cab li neque'xch'utub cui' ribeb laj judío. Aj libertos neque'xye reheb. Sa' xyänkeb a'an cuanqueb li neque'chal chak sa' eb li tenamit Cirene, Alejandría, Cilicia ut Asia. Eb a'an yoqueb chixcuech'inquil laj Esteban. ¹⁰ Abanan nak quiatinac laj Esteban, eb a'an inc'a' chic que'ru xsumen-quil xban nak a'an q'uebil xna'leb xban li Santil Musik'ej. ¹¹ Aban cuanqueb li que'tuminac ru re te'xye tic'ti' chirix laj Esteban. Ut que'xye:

—Ləo xkabi nak yo chixmajecuanquil li Dios ut laj Moisés, chanqueb. ¹² Ut que'xtacchi'i ajcui' li tenamit, jo'queb ajcui' laj c'amol be ut eb laj tz'ib. Que'xchap laj Esteban ut que'xc'am chiruheb li neque'taklan sa' xbeneb laj judío. ¹³ Ut que'xsic' ani tätic'ti'ik chirix ut que'xk'aba a'an ut que'xye: —Li cuink a'in junelic yo chixsachbal xcuanquil li santil na'ajej a'in ut naxtz'ektana li chak'rab li quiq'uehe' re laj Moisés. ¹⁴ Ləo quikabi nak yo chixyebal nak li Jesús laj Nazaret tixjuc' li na'ajej a'in, ut tixjal ru li chak'rab li coxtzol cui' laj Moisés, chanqueb. ¹⁵ Ut chixjunileb li neque'taklan sa' xbeneb laj judío li c'ojc'oqueb aran que'r'il laj Esteban ut que'xq'ue retal nak nalementz'un li rilobal. Chanchan na-iloc jun li ángel.

7

Laj Esteban quixch'olob xyalal chiruheb li neque'taklan sa' xbeneb laj judío

¹ Ut li xyucua'il eb laj tij quixpatz' re laj Esteban ma yal li yoqueb chixyebal. ² Quichak'oc laj Esteban ut quixye: —Ex cuas cuitz'in ut ləex li nequexc'amoc be, abihomak li oc cue chixyebal. Li Dios li k'axal lok' quixc'utbesi rib chiru laj Abraham li kaxe'tonil yucua' nak cuan aran Mesopotamia nak toj maji' naxic chi cuanc sa' li na'ajej Harán. ³ Quixye re: —Tat-elk sa' li na'ajej a'in. Taçanabeb la cuech'alal ut tatxic sa' jun li na'ajej li tinc'ut chäcuu lajin, chan. ⁴ Qui-el ut laj Abraham sa' li na'ajej Caldeo ut co chi cuanc sa' li na'ajej Harán. Nak ac cuan sa' li na'ajej a'an quicam lix yucua'. Ut chirix a'an li Dios

quixtakla chi cuānc sa' li na'ajej li cuanquex cui' laex anakcuan. ⁵ Abanan li Dios inc'a' quixq'ue xch'och' laj Abraham aran. Chi t̄ic māc'a' quixq'ue re. Abanan quixye re nak tixq'ue chok' reheb li ralal xc'ajol li te'cuānk mokon usta toj mā jun lix coc'al cuan. ⁶ A'an a'in li quixye li Dios re laj Abraham: —Eb laq cualal ac'ajol te'cuānk sa' jalan tenamit mācua' xtenamiteb. Ut sa' li tenamit a'an te'cuānk chok' rahobtesinbil mos ut xic' te'ilek' chiru cahib ciento chihab. ⁷ Ut lain t̄inrakok atin sa' xben li tenamit a'an li te'rahobtesink reheb laq cualal ac'ajol. Ut nak te'elk sa' li tenamit a'an te'c'anjelak chicuu sa' li na'ajej a'in, chan li Dios. ⁸ Nak li Dios quixbānu li contrato riq'uin laj Abraham quixye re nak tento te'xbānu li circuncisión. Jo'can nak laj Abraham quixbānu li circuncisión riq'uin laj Isaac li ralal nak ac cuan cuakxakib cutan re. Ut laj Isaac quixbānu riq'uin laj Jacob li ralal ut jo'can ajcui' quixbānu laj Jacob riq'uineb li ralal cablaju. ⁹ Eb li ralal laj Jacob c'ajo' nak que'xcakali laj José li r̄itz'ineb. Jo'can nak que'xc'ayi laj José ut quic'ame' aran Egipto. Abanan nak ac cuan aran Egipto, li Dios yo chi tenk'anc re. ¹⁰ Ut a'an quitenk'an re chixcuybal li raylal li quixc'ul. Quirosobtesi ut quixq'ue xna'leb. Ut laj Faraón li acuabej aran Egipto quixq'ue retal nak laj José cuan xna'leb ut quixxakab chi taklānc sa' xben li tenamit ut sa' xbeneb ajcui' li cuanqueb sa' li rochoch. ¹¹ Ut quicuan jun nimla cue'ej ut jun nimla raylal sa' eb li tenamit Egipto ut Canaán. Ut eb li kaxe'tonil yucua' inc'a' chic que'xtau xtzacaemkeb. ¹² Nak quirabi laj Jacob nak aran Egipto cuan nabal li

trigo, quixtaklaheb li ralal aran chixc'ambaleb xtrigo. ¹³ Nak que'coeb cui'chic xca' sut li ralal aran Egipto, laj José quixye reheb nak a'an laj José li rítz'ineb. Ut sa' ajcui' li cutan a'an laj Faraón quixnau nak laj José, a'an xcomoneb li ralal xc'ajoleb laj judío. ¹⁴ Ut chirix a'an laj José quixtakla xc'ambal lix yucua' jo'queb ajcui' li rech'alal. Chixjunileb li rech'alal cuanqueb o'laju xcac' al (75). ¹⁵ Jo'ca'in nak coeb aran Egipto laj Jacob li kaxe'tonil yucua' ut aran quicam jo'queb ajcui' li ralal. ¹⁶ Lix bakeleb que'c'ame' Siquem ut que'muke' sa' li na'ajej li quixlok' laj Abraham riq'uineb li ralal xc'ajol laj Hamor. ¹⁷ C'ajo' nak yoqueb chi q'uianc li ralal xc'ajol laj Israel aran Egipto nak ac yo chi cuulac xk'ehil nak te'isik sa' li tenamit a'an jo' quiyechi'ic re laj Abraham xban li Dios. ¹⁸ Ut qui-oc jalan chic acuabej ut a'an inc'a' quixnau ru laj José chi moco quixnau chanru lix na'leb nak quicuan. ¹⁹ Li acuabej a'an quixsic' xyālal chanru nak tixbānu raylal reheb li kaxe'tonil yucua'. Quixrahobtesiheb nak quixtakla xcamsinquileb li coc'telom li te'yo'lak re nak inc'a' chic te'tāmk li ralal xc'ajoleb. ²⁰ Sa' eb li cutan a'an quiyo'la laj Moisés. Li c'ula'al a'an raro xban li Kacua'. Ut oxib po quiq'uiresic xbaneb lix na' xyucua'. ²¹ Abanan quicuulac xk'ehil nak quicanabac chak sa' li nima' ut lix rabin laj Faraón quixcoc re, re taruk tācolek'. Quixc'am chok' re ut quixq'uiresi jo' tz'akal re. ²² Laj Moisés quixtzol rib jo' neque'xtzol ribeb laj Egipto. Ut cuan xna'leb chi atinac ut chixbanunquil li chabil na'leb. ²³ Nak ac xbānu li ca'c'al chihab (40), qui-ala sa' xch'ol

xic chiribaleb laj Israel li rech tenamitil. ²⁴ Nak quiril jun reheb yo chi saq'uec' xban jun aj Egipto, quixcol sa' ruk'. Quixchap laj Egipto ut quixcamsi. Chi jo'ca'in quixq'ue r̄ekaj li quixbānu re li rech tenamitil. ²⁵ Laj Moisés quixc'oxla nak eb li rech tenamitil te'xq'ue retal nak a'an li t̄ac'anjelak chiru li Dios re xcolbaleb. Abanan eb a'an inc'a' que'xq'ue retal. ²⁶ Cuulajak chic laj Moisés quixtau cuib laj Israel yoqueb chi pletic. Quixk'useb re te'xcanab xch'e'bal rib. Quixye reheb: —Laex ecomon erib. ¿C'a'ut nak yoquex chixpletinqul erib? chan reheb. ²⁷ Ut li jun li yo chi sac'oc re li jun chic quixtiquisi laj Moisés ut quixye re: —¿Ani xq'uehoc  ue chi taklanc ut chi rakoc  atin sa' kab  n? ²⁸ ¿Ma t  cuaj tin  camksi l  ain jo' nak xacamksi laj Egipto ecuer? chan re laj Mois  s. ²⁹ Nak quirabi li c'a'ru quixye, laj Mois  s quixucuac ut quielelic. Co chi cuanc sa' li na'ajej Madian li moco tz'akal xtenamit ta. Nak cuan aran, que'yo'la cuib li ralal. ³⁰ Ac xnume' chic ca'c'al chihab roquic sa' li chaki ch'o  h' a'an, nak quiril jun ton li q'uix yo xxamlle nach' riq'uin li tzul Sina  . Ut sa' li xam a'an quixc'utbesi rib jun li   ngel chiru. ³¹ Ut laj Mois  s c'ajo' nak quisach xch'ol chiribal ut quinach'oc riq'uin re taril chi us. Quirabi xy  b xcux li K  cua' nak quixye: ³²—L  ain li K  cua' Dios li que'xlok'oni chak l   xe'tonil yucua'. L  ain li Dios li que'xlok'oni chak laj Abraham, laj Isaac, ut laj Jacob, chan. Ut laj Mois  s nasicot xban xxiu ut inc'a' chic quixcuy rilbal. ³³ Ut quixye li K  cua' re: —Isi l   x  b ch  cuok xban nak li na'ajej cuancat cui', a'an santil na'ajej. ³⁴ Relic chi yal l  ain yoquin chiribal li raylal li yoqueb chixc'ulbal

lin tenamit li cuanqueb Egipto. Ut yoquin ajcui' chirabinquil nak yoqueb xk'okonquil ribeb xban li raylal. Jo'can nak xinchal chixcolbaleb sa' ruk'eb laj Egipto. Abi li tineye ącue. Tatintakla Egipto, chan li Kacula' re laj Moisés. ³⁵ Laj Moisés, a'an li que'xtz'ektana laj Israel nak que'xye: — ¿Ani xq'uehoc ącue chi taklanc ut chi rakoc ątin? chanqueb. A'an li quitaklac chixtenk'anquileb laj Israel ut chixcolbaleb. Quitaklac xban li Kacula' nak li ángel quixc'utbesi rib chiru sa' li jun ton chi q'uix yo xxamlel. ³⁶ Laj Moisés, a'an li qui-isin reheb Egipto. Nabal li milagro ut li sachba ch'olej quixbañu aran Egipto ut sa' li Caki Palau. Chiru ca'c'al chihab quic'amoc be chiruheb sa' li chaki ch'och'. ³⁷ A'an laj Moisés li quiyehoc chak re a'in reheb laj Israel: —Li Kacula' le Dios tixq'ue junak profeta sa' eyank sic'bil ru xban jo' laín. Ecomon ajcui' laex. Chebañu chixjunil li c'a'ru tixye ere, chan. ³⁸ A'an li quicuan rochbeneb laj Israel nak que'xch'utub ribeb sa' li chaki ch'och'. Quicuan rochbeneb li kaxe'tonil yucua' ut rochben ajcui' li ángel li quiatinaq riq'uin sa' li tzul Sinaí nak quixye re li rätin li Dios li naq'uehoc yu'am re nak a'an chic tayehok ke lão. ³⁹ Abanan eb li kaxe'tonil yucua' inc'a' que'raj xpabankuil li c'a'ru quixye. Que'xtz'ektana ban ut que'raj raj suk'ic cui'chic Egipto. ⁴⁰ Que'xye re laj Aarón: —Yib kadios re te'c'amok be chiku. Inc'a' nakanau c'a'ru xc'ul chak laj Moisés li qui-isin chak ke Egipto. ¿C'a'ru aj e nak yoko chiroybeninquil? chanqueb li kaxe'tonil yucua'. ⁴¹ Jo'can nak que'xyib riq'uin oro xjalam uch jun li cuacax ut que'mayejac chiru. C'ajo' nak que'saho' sa' xch'oleb chirilbal

lix dioseb li que'xyib riq'uin ruk'eb. Ut que'xbanu jun li nink'e re xlok'oninquil. ⁴² Jo'can nak li Kacua' Dios quixcanabeb xjuneseb. Quixcanabeb chixlok'oninquil li chahim li cuan chiru choxa. Ut quitz'akloc ru li tz'ibanol chak najter xbanab li profeta nak que'xye:

Laex aj Israel, ¿ma quexmajejac ta bi' chak chicuu laín nak yoquex chak chi numec' sa' li chaki ch'och' chiru ca'c'al chihab?

⁴³ ¿Ma mācua' ta bi' le yibanol dios Moloc ut Renfán quelok'oni? Laex queyib li jalám uch a'in re telok'oni. Jo'can nak texincanab re nak jalan tenamit tānumtāk sa' eben ut texc'amek' chi najt sa' jun li na'ajej li cuan jun pac'al li tenamit Babilonia, chan li Kacua'. (Am. 5:25-27)

⁴⁴ Eb li kaxe'tonil yucua' que'xyib ajcui' chak li tabernáculo nak yoqueb chak chi numec' sa' li chaki ch'och' ut aran xocxo li chak'rab. Que'xyib jo'li retalil li quic'ute' chiru laj Moisés xban li Dios.

⁴⁵ Eb li kaxe'tonil yucua' que'xc'ul li muhebal a'in. Ut nak laj Josué quic'amoc be chiruheb chi pletic, que'xc'am li muhebal chirixeb. Ut que'rechani lix ch'och'eb li mācua'eb aj judío nak li Dios quirisi chiruheb li kaxe'tonil yucua' li xic' que'iloc reheb. Li muhebal a'an quic'anjelac sa' eb li cutan a'an toj chalen nak quicuan laj David chok' rey. ⁴⁶ Laj David quixbanu li c'a'ru quiraj li Dios, ut li Dios quisaho' xch'ol riq'uin. Quixtz'ama chiru li Dios nak tixyib li templo bar te'xlok'oni cui' li Dios li quixlok'oni laj Jacob. ⁴⁷ Abanan mācua' laj David quiyiban re li templo. Laj Salomón, a'an li quiyiban re. ⁴⁸ Quixyib li templo usta li nimajcual

Dios inc'a' nacuan sa' junak cab yibanbil xban cuink jo' quixye chak li profeta Isaías nak quixye chi jo'ca'in:

49 Li choxa, a'an li na'ajej li ninc'ojla cui' ut li ruchich'och', a'an xna'aj li cuok. ¿C'a'ru chi ochochil taruk teyib chok' cue? Ut, ¿bar cuan lin na'aj li tinhilank cui'?

50 ¿Ma mactua' ta bi' lajn xinyiban re chixjunil li c'a'ru cuan? chan li Kacua'. (Is. 66:1-2)

51 Laex inc'a' nequetau xyalal. K'axal cau ech'ol. Chanchanex li inc'a' neque'pabán re li Dios. Junelic nequek'etk'eti erib chiru li Santil Musik'ej jo' que'xbanu le xe'tonil yucua'. **52** ¿Ma cuan ta bi' junak profeta inc'a' quirahobtesic xbaneb le xe'tonil yucua'? ¿Ma inc'a' ta bi' que'xcamsiheb li que'ch'oloban chak resil lix c'ulunic li jun li Tjc Xch'ol, li quek'axtesi laex chi camsic? **53** Laex quec'ul li chak'rab li quixq'ue ere li ángel, abanan inc'a' nequebanu li c'a'ru naxye, chan laj Esteban.

Nak que'xcamsi laj Esteban

54 Nak que'rabi li c'a'ru yo chixyebal laj Esteban, c'ajo' nak que'josk'o'. Que'xc'uxuxi li ruch re xbaneb xjosk'il. **55** Ut laj Esteban nujenak chi Santil Musik'ej. Qui-iloc sa' choxa ut quiril lix nimajcual lok'al li Dios ut quiril li Jesús sa' xnim uk' li Dios. **56** Quixye: —Ilomak. Teto li choxa nak nacuil ut li C'ajolbej cuan chi xnim uk' li Dios, chan. **57** Ut eb li tenamit xic' que'rabi li quixye ut que'xtz'ap lix xiqueb ut que'xjap reheb chi cau xban xjosk'ileb ut jun xiquiqueb sa' xben nak que'xchap. **58** Que'risi laj Esteban sa' li tenamit. Ut eb li oqueb re chi cutuc re chi pec, que'xcanab

li rak'eb chi rok jun li saj cuink aj Saulo xc'aba'.
 59 Nak yoqueb chixcutbal chi pec, laj Esteban yo
 chi tijoc ut quixye: —At Kacua' Jesús, c'u'l lin
 musik'.— 60 Quixcuik'ib rib, quixjap re chi cau ut
 quixye: —At Kacua', maq'ue li mac a'in sa' xbeneb.
 — Ut nak quixye a'an, quicam.

8

Laj Saulo xic' narileb laj pabanel

¹ Laj Saulo quixc'ul xch'ol nak que'xcamsi
 laj Esteban. Chalen sa' li cutan a'an que'oc
 xrahobtesinquileb chixjunileb laj pabanel aran
 Jerusalén ut c'ajo' li raylal que'xc'ul. Ut chixju-
 nileb quilaje'xjeq'ui rib sa' eb li na'ajej Judea
 ut Samaria. Ca'aj chic eb li apóstol que'cana
 Jerusalén. ² Cuib oxib laj pabanel que'mukuc re laj
 Esteban ut c'ajo' nak que'raho' xch'oleb xban lix
 camic. ³ Aban laj Saulo yalyo xk'e chixrahobtesin-
 quileb laj pabanel. Na-oc sa' eb li cab ut narisiheb
 sa' rochocheb ut naxc'ameb sa' tz'alam, jo' cuink
 jo' ixk. ⁴ Ut chixjunileb li que'xjeq'ui ribeb sa' jalan
 na'ajej yoqueb chixyebal resil li evangelio yalak
 bar.

*Laj Felipe yo chixyebal resil aran Samaria nak li
 Jesús, a'an li Cristo*

⁵ Laj Felipe co sa' li tenamit Samaria ut qui-oc
 chixch'olobanquil resil chiruheb li tenamit nak
 li Cristo, a'an laj Colonel li yechi'inbil xban li
 Dios. ⁶ Ut chixjunileb que'xq'ue xch'ol chirabin-
 quil li atin li quixye laj Felipe xbaneb li milagro
 quilajxbanu. ⁷ Nabaleb li cuan maus aj musik'ej
 riq'uineb que'q'uirtesic. Japjoqueb re li maus aj

musik'ej nak neque'el riq'uineb. Ut nabaleb li yek rokeb ut li sic rok ruk'eb quilaje'q'uirtesic. ⁸ Ut c'ajo' nak que'saho' sa' xch'oleb sa' li tenamit a'an.

Laj Simón laj k'e quiraj xlok'bal xcuانquil li Dios

⁹ Quicuan jun li cuink aj Simón xc'aba'. A'an aj k'e. Ac najter na-oc chixbalak'inquileb li cuanqueb sa' li tenamit Samaria. A'an naxye nak nim xcuانquil. ¹⁰ Ut chixjunileb li tenamit, jo' li cuanqueb xcuانquil jo' ajcui' li mac'a'eb xcuانquil, que'rabi li c'a'ru yo chixyebal laj Simón ut que'xye: —Li cuink a'in, cuan xcuانquil li Dios riq'uin, chanqueb. ¹¹ Ut que'xq'ue xch'ol chixbaنunquil li c'a'ru naxye xban nak ac junxil na-oc chixbalak'inquileb. ¹² A'ut laj Felipe yo chixjulticanquil resil xnimal xcuانquilal li Dios ut li Jesucristo. Ut nabaleb que'paban ut que'cubsic xha', jo' cuink jo' ixx. ¹³ Ut quipaban ajcui' laj Simón ut quicubsic xha'. Ut yo chi xic chirix laj Felipe yalak bar. Quisach xch'ol chiribaleb li milagro ut li sachba ch'olej li yo chixbaنunquil laj Felipe. ¹⁴ Eb li apóstol li toj cuanqueb Jerusalén que'rabi resil nak eb laj Samaria yoqueb chixpabanquil li Dios. Jo'can nak que'xtakla laj Pedro ut laj Juan aran. ¹⁵ Nak que'cuulac Samaria, que'tijoc sa' xbeneb laj pabanel re nak te'xc'ul li Santil Musik'ej xban nak toj maji' que'xc'ul. ¹⁶ Ca'aj cui' que'cubsic xha' sa' xc'aba' li Jesucristo. ¹⁷ Laj Pedro ut laj Juan que'xq'ue li ruk'eb sa' xbeneb ut que'xc'ul li Santil Musik'ej. ¹⁸ Ut quiril laj Simón nak riq'uin xq'uebal li ruk'eb li apóstol sa' xbeneb, neque'xc'ul li Santil Musik'ej. Ut quixyechi'i tumin reheb laj Pedro ut laj Juan

ut quixye reheb: ¹⁹ —Q'ue cue li cuanquil a'an re nak li ani tinq'ue li cuuk' sa' xben tixc'ul li Santil Musik'ej, chan. ²⁰ Laj Pedro quixye re: —Chisachk la^q tumin ącuochben xban nak xac'oxla nak taruk talok' riq'uin tumin li naxq'ue chi matan li Kacua' Dios, chan. ²¹ Laat inc'a' taruk tac'ul li matan a'in xban nak moco tjc ta la^q ch'ol chiru li Dios. ²² Cui tayot' ach'ol tajal ac'a'ux ut tacanab xbanunquil li mausilal a'in ut cui tatz'ama ącuybal chiru li Dios, mare chan nak tixcuy ąmac riq'uin li xac'oxla. ²³ Laat c'ajo' nak nacatkakalin ut junes mausilal nacac'oxla, chan laj Pedro. ²⁴ Quichak'oc laj Simón ut quixye: —Chextijok chicuix chiru li Kacua' re nak inc'a' tinc'ul jo' xaye laat, chan. ²⁵ Nak ac xe'xch'olob xyalal li ratin li Dios ut que'xye resil li Jesucristo, laj Pedro ut laj Juan que'suk'i cui'chic Jerusalén. Ut que'xch'olob xyalal sa' nabal chi tenamit cuanqueb sa' xcuent Samaria.

Laj Felipe quixch'olob xyalal chiru li cuink Etiopía xtenamit

²⁶ Ut jun lix ángel li Kacua' quiatinac riq'uin laj Felipe ut quixye re: —Tatxic sa' li be li cuan sa' li sur. Li be a'an li nanume' sa' li chaki ch'och' naxic Jerusalén toj Gaza.— ²⁷ Laj Felipe co. Nak yo chi xic quiril jun li cuink aj Etiopía. A'an jun eunuco q'uebil xcuانquil chi c'anjelac chiru lix Candace li reina li cuan Etiopía. Sa' ruk' li cuink a'an k'axtesinbil chixjunil lix biomal li reina. Li cuink a'an co Jerusalén chixlok'oninquil li Dios. ²⁸ Yo chi suk'ic sa' rochoch. C'ojc'o sa' lix carruaje ut yo chiribal xsa' li hu li quixtz'iba li profeta Isaías. ²⁹ Li Santil Musik'ej quixye re laj Felipe: —Ayu,

jilon chixc'atk li carruaje a'an, chan. ³⁰ Quijiloc laj Felipe ut quirabi nak li cuink yo chirilbal xsa' li hu li quixtz'iba li profeta Isaías. Laj Felipe quixpatz're: —¿Ma nacatau ru li yocat chirilbal? chan re. ³¹ Ut li cuink quixye: —¿Chanru nak tintau ru cui ma ani junak tac'utuk lix yalal chicuu?— Ut quixtz'ama chiru laj Felipe nak tatakek' sa' li carruaje ut tac'ojlak chixc'atk. ³² Ut li hu li yo chirilbal xsa', a'an li quixtz'iba li profeta Isaías. Naxye chi jo'ca'in:

Nak yo xrahobtesinquil, quixcubsi rib ut ma jun atin quixye jo' jun carner nak quic'ame' chi camsic. Chanchan nak naxcanab rib li carner chi besec' li rix chiruheb li neque'besoc re, jo'can quixbanu a'an. Ut ma jun atin quixye.

³³ Usta mac'a' xmac, quichape' ut quiq'uehe' chi camsic. Ut ma ani qui-oquen chirix re xcolbal. Quicamsic ban. ¿Ani taruk tayehok li resil lix yibal ru xna'lebeb li rech tenamitil? (Is. 53:7-8)

³⁴ Li cuink quixye re laj Felipe: —Ye cue, ¿ani chi aj ix naxye a'in li profeta? ¿Ma chirix a'an, malaj ut chirix jalan chic? chan. ³⁵ Laj Felipe qui-oc chixch'olobanquil lix yalal chiru. Quix-tiquib riq'uin li quixtz'iba li profeta Isaías ut toj quixch'olob xyalal chirix li Jesucristo. ³⁶ Nak yoqueb chi xic, que'cuulac cuan cui' jun li ha'. Ut li cuink quixye: —Arin cuan ha'. ¿Ma inc'a' taruk tacubek inha' lain? chan. ³⁷ Ut laj Felipe quixye re: —Cui nacapab chi anchal ach'ol li Jesucristo, taruk tacubek aha', chan. Li cuink quichak'oc ut quixye: —Ninpab nak li Jesucristo, a'an Ralal li Dios, chan.

³⁸ Ut quixxakab li carruaje. Tojo'nak laj Felipe ut li cuink cœb sa' li ha' ut laj Felipe quixcubsi xha'. ³⁹ Nak que'el chak sa' li ha', li Santil Musik'ej quixc'am laj Felipe ut li cuink inc'a' chic quiril ru. Co xjunes chi sa sa' xch'ol. ⁴⁰ Ut laj Felipe quic'ame' Azoto ut coxnumek' sa' chixjunileb li tenamit. Yo chixch'olobanquil xyalal li evangelio chalen nak quicuulac sa' li tenamit Cesarea.

9

Laj Saulo quipaban

¹ Nak yo chi c'ulmanc a'in, laj Saulo toj yo chixrahobtesinquileb li neque'pabán re li Kacua' ut yo chixyebal nak toj tixcamsíheb. Jo'can nak co riq'uin li xyucua'il aj tij. ² Ut quixtz'ama lix hu chiru re tixk'axtesi sa' eb li cab li neque'xch'utub cui' ribeb laj judío aran Damasco re taruk tixchapeb laj pabanel li tixtau aran, jo' cuink jo' ixl. Tixchapeb ut tixc'ameb chi prexil Jerusalén. ³ Yo chi xic ut nak ac cuulac re sa' li tenamit Damasco, sa' junpat quisute' xban jun chanchan xam quichal sa' choxa. ⁴ Quit'ane' sa' ch'och' laj Saulo ut quirabi jun xyab cux yo chixyebal re: — At Saulo, at Saulo, ¿C'a'ut nak yocat chixbanunquil raylal cue? — ⁵ Laj Saulo quixye: —¿Anihat lata, at Kacua'? — Ut li yo chi atinac quixye: —Lain li Jesús li xic' yocat chiribal. Yocat chixtacuasinquil acuib nak xic' yocat chicuilbal, chan. ⁶ Nasicot xban xxiu laj Saulo nak quixye: —Kacua', ¿c'a'ru tacuaj tinbanu? chan. Ut li Kacua' quixye: —Cuaclin ut ayu sa' li tenamit, ut aran tayehék' acue c'a'ru us tabanu, chan. ⁷ Ut eb li cuink li yoqueb chi

xic rochben sachsoqueb xch'ol que'cana. Yo_{queb} chirabinquil li yo chi atinac, abanan inc'a' que'ril ru li ani yo chi atinac. ⁸ Quicuacli laj Saulo ut nak quixte li xnak' ru, inc'a' chic qui-iloc. Ch'ilonbil chi ruk' nak quic'ame' sa' li tenamit Damasco. ⁹ Aran quicuan chiru oxib cutan. Inc'a' na-iloc ut inc'a' quicua'ac chi moco qui-uc'ac. ¹⁰ Aran Damasco cuan jun laj p_abanel aj Ananías xc'aba'. Li K_acua' quiatinac riq'uin sa' visión ut quixye re: —At Ananías.— Quichak'oc ut quixye re: —Cue'quin, K_acua'.— ¹¹ Ut li K_acua' quixye re: —Lain tinye acue, ayu sa' rochoch laj Judas li cuan sa' li nim be li Tic neque'xye re. Aran t_asic' jun li cuink li xchal chak Tarso. Aj Saulo xc'aba'. A'an yo chi tijoc aran. ¹² Laj Saulo xril jun li visión. Xat-oc riq'uin nak xril ut xaq'ue l_a cuuk' sa' xben re nak t_ailok cui'chic, chan li K_acua'. ¹³ Laj Ananías quichak'oc ut quixye: —At K_acua', nabal que'yehoc resil cue nak xic' narileb laj p_abanel li cuink a'an. C'ajo' li raylal nalajxb_anu reheb l_a cualal aq'ajol li cuanqueb aran Jerusalén. ¹⁴ Ut jo'can ajcui' arin xq'uehe' xcuانquil xbaneb li xb_enil aj tij chixq'uebaleb sa' tz'alam chixjunileb li neque'p_aban aque, chan laj Ananías. ¹⁵ Ut li K_acua' quixye re: —Ayu xban nak li cuink a'an sic'bil ru inban re xyebal resil li colbaib sa' inc'aba' l_ain reheb li cuanqueb sa' xcuانquil ut reheb ajcui' li m_acua'eb aj judío jo'queb ajcui' li ralal xc'ajol laj Israel. ¹⁶ Lain tinc'ut chiru jo' q'uijal li raylal tento tixc'ul sa' inc'aba' l_ain, chan li K_acua'. ¹⁷ Co ut laj Ananías ut qui-oc sa' li cab jo' quiyehe' re. Quixq'ue li ruk' sa' xben laj Saulo ut quixye re: —Hermano Saulo, li K_acua' Jes_us,

li quixc'utbesi rib ch  cuu sa' li be nak yocat chi ch  lc arin, a'an xtaklan chak cue arin re nak tar  k tat-ilok cui'chic ut tac'ul li Santil Musik'ej, chan laj Ananias re. ¹⁸ Ut sa' junpat quit'ane' chanchan xpat li ru ut qui-iloc cui'chic. Quixakli ut quicubsjc xha'. ¹⁹ Ut nak ac xcua'ac, quicacuu cui'chic. Laj Saulo quicana cuib oxib cutan sa' xy  nkeb laj p  banel li cuanqueb Damasco.

Laj Saulo quixye resil li colba-ib aran Damasco

²⁰ Laj Saulo ticto qui-oc chixch'olobanquil li xy  lal chirix li Jes  s, chiruheb li tenamit sa' eb li cab li neque'xch'utub cui' ribeb laj judio ut quixye rebeb: —Li Jes  s, a'an li Cristo li Ralal li Dios, chan. ²¹ Ut chixjunileb li yoqueb chi abinc re que'sach xch'oleb chirabinquil ut que'xye: —¿Ma m  cua' ta bi' a'an li yo chi rahobtesinc rebeb laj p  banel aran Jerusal  n? ¿Ma m  cua' ta bi' re xchapbaleb laj p  banel nak xchal arin re nak tixc'ameb riq'uineb li xbenil aj tij? chanqueb. ²² Ut laj Saulo k'axal cui'chic quixq'ue xch'ol chixch'olobanquil xy  lal ut que'sach xch'oleb laj judio li cuanqueb Damasco xban nak yo chixc'utbal chi tz'akal chiruheb nak li Jes  s a'an li Cristo laj Colonel li yechi'ibil xban li Dios. ²³ Ac cuan cutan xc'ulbal a'an nak que'xc'ub ru chi ribileb rib laj judio chanru nak te'xcamsi laj Saulo. ²⁴ Abanan laj Saulo quirabi resil nak te'raj xcamsinquel. Eb a'an chi k'ek chi cutan yoqueb chixc'ac'alenquel li oquebal re li tenamit re te'xcamsi. ²⁵ Ut eb laj p  banel que'xq'ue sa' jun nimla chacach ut chiru k'ojojin que'xcubsi chirix li tz'ac. Jo'can nak

quicole' laj Saulo chiruheb li que'ajoc re xcamsin-
quil.

Quicuulac laj Saulo Jerusalén

²⁶ Nak quicuulac Jerusalén, laj Saulo quiraj
oc sa' xyankeb laj pabanel. Abanan eb a'an
que'xucuac. Inc'a' que'xpab nak a'an aj pabanel
chic. ²⁷ Ut laj Bernabé quixc'am laj Saulo riq'uineb
li apóstol ut quixserak'i reheb chanru nak quiril
ru li Kacua' sa' li be ut quixye ajcui' reheb chanru
nak quixch'olob xyalal li Jesucristo chi cau xch'ol
aran Damasco. ²⁸ Ut laj Saulo quicana riq'uineb laj
pabanel aran Jerusalén ut co yalak bar chixyebal
resil li Jesucristo chi cau xch'ol. ²⁹ Ut quixch'olob
li xyalal chiruheb laj judío li neque'atinac sa'
griego. Eb a'an inc'a' que'raj rabinquil. Que'raj
ban xcamsinquil. ³⁰ Nak eb laj pabanel que'rabi
resil nak te'raj xcamsinquil, que'xc'am laj Saulo
aran Cesarea ut aran chic que'xtakla Tarso. ³¹ Ut
inc'a' chic que'rahobtesic laj pabanel li cuanqueb
Judea, Galilea, ut Samaria. Yoqueb chi q'uic sa'
xpabaleb. Neque'xxucua ru li Kacua'. Ut li Santil
Musik'ej yo chixq'uebal xcacuila xch'oleb. C'ajo'
nak yoqueb chi tāmc.

Nak quiq'uirtesic laj Eneas

³² Ut laj Pedro, nak yo chirula'aninquileb chixju-
nileb laj pabanel yalak bar, quicuulac ajcui'
riq'uineb laj pabanel li cuanqueb Lida. ³³ Aran
quixtau jun li cuink aj Eneas xc'aba'. Cuakxakib
chihab roquic lix yajel ut inc'a' chic nacuacli. Sic
li rok ruk'. ³⁴ Ut laj Pedro quixye re: —At Eneas,
li Kacua' Jesucristo tatxq'uirtesi anakcuan. Xaklin
ut xoc la cuarib, chan. Ut sa' junpat quixakli li

cu_{ink}. ³⁵ Ut chixjunileb li cuanqueb Lida ut Sarón que'ril nak quiq'uira li cu_{ink} ut que'xp_{ab} li K_acua'.

*Lix Dorcas quicuaclesic cui'chic chi yo'yo xban
laj Pedro*

³⁶ Ut quicuan aran Jope jun li ixs aj p_{abanel} xTabita xc'aba'. Chi jalbil ru naraj naxye Dorcas. Junelic yo_o chixb_anunquil usilal reheb li ras ritz'in ut naxtenk'aheb li neba'. ³⁷ Sa' eb li cutan a'an quiyajer ut quicam. Que'ratesi ut que'xjilib sa' jun li na'ajej li cuan sa xca' tasal li cab. ³⁸ Li tenamit Jope nach' cuan riq'uin li tenamit Lida bar cuan cui' laj Pedro. Eb laj p_{abanel} que'rabi nak cuan aran. Que'xtakla cuib li cu_{ink} chixbokbal. —Chalkat chi junpat kiq'uin, chanqueb re laj Pedro. ³⁹ Laj Pedro co rochbeneb. Nak quicuulac, que'xc'am sa' li na'ajej li cuan cui' li camenak. Aran quisute' xbaneb li xm_alca'an. Yoqueb chi yabac ut que'xc'ut chiru li t'icr li quixyib lix Dorcas nak toj cuan sa' xyank_eb. ⁴⁰ Laj Pedro quirisiheb chirix cab. Quixcuik'ib rib ut qui-oc chi tijoc. Ut quiril li camenak ut quixye re: —Tabita, cuaclin, chan. Ut li ixs quixte li xnak' ru, ut nak quiril ru laj Pedro, quic'obla. ⁴¹ Laj Pedro quixchap chi ruk' ut quixcuaclesi. Quixbokeb li xm_alca'an jo' ajcui' chixjunileb laj p_{abanel} ut quixxakab chiruheb chi yo'yo chic. ⁴² Qui-el resil sa' chixjunil li tenamit Jope li c'a'ru quic'ulman. Xban a'an nabaleb que'p_{ab}an re li K_acua'. ⁴³ Laj Pedro najt quicuan aran Jope. Quihilan sa' rochoch jun li cu_{ink} aj yibom tz'um, aj Simón xc'aba'.

10*Laj Pedro ut laj Cornelio*

¹ Quicuan jun li cuink aran Cesarea aj Cornelio xc'aba'. A'an li nataklan sa' xbeneb jun ch'utal chi soldado aj Italia neque'xye re. ² Li cuink a'an quixxucua ru li Dios jo'queb ajcui' chixjunileb li cuanqueb sa' li rochoch. Chabil xna'leb ut junelic natijoc chiru li Dios ut junelic naxtenk'aheb li neba'. ³ Sa' jun li cutan sa' oxib or tana re ecuu laj Cornelio quiril sa' visión nak qui-oc jun li ángel riq'uin ut quixye re: —At Cornelio, chan. ⁴ Laj Cornelio taqxucuak nak quiril li ángel ut quixye: —C'a'ru taquaj tinbanu, Kacua'.— Li ángel quixye: —Li Dios xrabi la tij. Nacuulac chiru li c'a'ru nacabanu re xtenk'anquileb li neba'. ⁵ Anakcuán tinye aque takla cuib oxibakeb li cuink aran Jope chixc'ambal chak li cuink aj Simón xc'aba'. Aj Pedro nayeman ajcui' re. ⁶ A'an taqyehok aque c'a'ru us taqbanu. A'an yo chi hilanc sa' rochoch laj Simón laj yibom tz'um. Li rochoch cuan chire li palau, chan li ángel. ⁷ Nak ac x-el li ángel riq'uin, laj Cornelio quixbok cuib lix mos cuink ut quixbok ajcui' jun reheb lix soldado li naxxucua ru li Dios. ⁸ Quixserak'i reheb chixjunileb li quiyehe' re xban li ángel ut quixtaklaheb Jope re nak te'xc'am chak laj Pedro. ⁹ Cuulajak chic ac cuulaqueb na re sa' li tenamit Jope nak laj Pedro quitake' sa' xca' tasal li cab chi tijoc. Ca'ch'in na chic ma cua'leb. ¹⁰ Quichal xtz'ocajic ut quiraj raj ru cua'ac. Abanan toj yo'queb chixyibanquil lix tzacaemk. Nak toj yo chiroybeninquil lix tzacaemk, quiril jun li visión. ¹¹ Quiril nak tetó li

choxa ut chanchan jun nimla saki t'icr yo chak chi cubec. Pixbil sa' xcä pac'alil lix xuc li t'icr ut yo chak chi cubec sa' ruchich'och'. ¹² Chi sa' li t'icr a'an cuanqueb chak nabal pay ru li xul xcomoneb li neque'cuān sa' ruchich'och'. Cuanqueb cuān cuib rokeb ut cuib ruk', cuanqueb xcomoneb li c'anti' ut cuanqueb xcomoneb li xul li neque'rūpūpic chiru choxa. ¹³ Ut quirabi jun xyab ux quixye re: —At Pedro, chap acue li xul a'in. Täcamssi ut tätiu, chan. ¹⁴ Laj Pedro quixye: —Inc'a', Käcua'. Ma jun sut xintzaca c'a'ak re ru li naxye sa' li chak'rab nak inc'a' us xtzacanquil, chan. ¹⁵ Ut quixye cui'chic li yo chi atinac: —Laat inc'a' naru nacac'oxla nak inc'a' us tätzaca li c'a'ru xye li Dios nak us tätzaca, chan. ¹⁶ Oxib sut quiyehe' re chi jo'can ut chirix a'an quixoque li nimla t'icr a'an ut quic'ame' cui'chic sa' choxa. ¹⁷ Laj Pedro toj yo ajcui' chixc'oxlanquil c'a'ru xyälal li quic'utbesic chiru nak que'cuulac li cuink li que'taklæc xban laj Cornelio. Cuanqueb chire li cab ut yoqueb chixpatz'bal bar cuān li rochoch laj Simón. ¹⁸ Que'xpatz' ma aran cuān chi hilanc laj Simón li neque'xye aj Pedro re. ¹⁹ Laj Pedro toj yo ajcui' chixc'oxlanquil c'a'ru xyälal li visión li quiril nak li Santil Musik'ej quixye re: —Oxib li cuink xe'chal chäsic'bal. ²⁰ Ayu, cuben ut atinaheb chak. Matc'oxlac chi xic chirixeb xban nak lain xintaklan chak reheb, chan. ²¹ Jo'can nak laj Pedro quicube ut quixye reheb li cuink: —Cue'quin. Lain laj Simón Pedro li niquinesic'. ¿C'a'ru xc'amoc chak ere toj arin ut c'a'ru teraj cuiq'uin? chan. ²² Eb a'an que'xye: —Laj Cornelio li capitán xtaklan chak ke. A'an jun cuink tjc xch'ol ut naxxucua

ru li Dios. Chixjunileb laj judío neque'xq'ue sa' xnak' ruheb. Jun x-ángel li Dios quixc'utbesi rib chiru ut quixye re nak tatxbok sa' rochoch re nak táruk tárabi li c'a'ru taye re, chanqueb re.

²³ Laj Pedro quirocsiheb ut que'xnumsi li k'ojoyn sa' li cab a'an. Sa' li cutan jun chic laj Pedro co chirixeb. Ut cuib oxib laj pabanel re Jope que'coeb chirix. ²⁴ Jo' cuulajak chic que'cuulac Cesarea ut laj Cornelio yo chiroybeninquileb rochbeneb li rech'alal ut eb li tz'akal ramig li quixbok riq'uin.

²⁵ Nak laj Pedro quicuulac sa' li rochoch, laj Cornelio qui-el chixc'ulbal. Quixcuik'ib rib chiru re xlok'oninquil. ²⁶ Abanan laj Pedro quixye re: —Cuaclin. Minálok'oni lain xban nak lain yal cuinkin jo' laat, chan. ²⁷ Yo chi atinac riq'uin laj Cornelio nak yoqueb chi oc sa' li cab. Nak que'oc, que'xtau nabaleb ac ch'utch'úqueb sa' li cab. ²⁸ Laj Pedro quixye reheb: —Laex nequenau nak lix chak'rabebeb laj judío naxye nak inc'a' naru takajunaji kib riq'uineb li macua'eb aj judío chi moco taruk to-oc sa' rochocheb. Abanan xc'ut chicuu li Kacua' Dios nak ma jun li cristian tintz'ektana chi moco tinye nak inc'a' us atinac riq'uineb.

²⁹ Jo'can nak inc'a' xink'etk'eti cuib chi chalc nak xine'xbok chak. Ye cue c'a'ut nak xatakla inbok-bal, chan. ³⁰ Quichak'oc laj Cornelio ut quixye: —Cahib cutan anakcuan jo'ca'in ajcui' honal nak yoquin chi ayunic ut chi tijoc sa' li cuochoch. Oxib or re ecuu quixc'utbesi rib chicuu jun li cuink nalementz'un li rak'. ³¹ Quixye cue, "At Cornelio, li Dios quirabi la tij. Nacuulac chiru li c'a'ru nacabanu re xtenk'anquileb li neba'. ³² Takla xc'ambal laj Simón Pedro li cuan aran Jope. Yo chi

hilanc sa' li rochoch laj Simón laj yibom tz'um. Li rochoch a'an cuan chire li palau. Nak tac'ulunk laj Pedro, tixch'olob chacuu li xyalal," chan cue li ángel. ³³ Jo'can nak xintakla ac'ambal sa' junpat. Ut laat xabánu usilal ke. Xatc'ulun. Anakcuan ut chikajunilo cuanco arin chiru li Dios chirabinquil chixjunil li c'a'ru taye ke li xye chak ącue li Dios, chan laj Cornelio re laj Pedro.

Laj Pedro quixye re laj Cornelio nak li Dios inc'a' naxsic' ru li ani naxra

³⁴ Quixtiquib qatinac laj Pedro ut quixye: — Anakcuan xinq'ue retal chi tz'akal nak li Dios inc'a' naxsic' ru li ani naxra. ³⁵ Li ani naxxucua ru li Dios ut naxbánu li tiquilal a' yal bar xtenamit, li jun a'an narahe' xban li Dios. ³⁶ Læx nequenau nak li Dios quixtakla resil li colba-ib reheb laj Israel. Li colba-ib, a'an li naq'uehoc tuktuquil usilal sa' xc'aba' li Jesucristo. Ut li Jesucristo, a'an li Kacula', ut nim xcuánquil sa' xbén chixjunil. ³⁷ Læx nequenau c'a'ru quic'ulman sa' chixjunil li tenamit Judea. Quiticla aran Galilea nak ac xch'olobac resil li cubi ha' xban laj Juan. ³⁸ Ac erabiom resil li Jesucristo aj Nazaret. Li Dios quixq'ue li Santil Musik'ej re, ut quixq'ue xcuánquil. A'an quibec yalak bar chixbánuñquil li usilal ut chixq'uirtesinquileb li tacuasinbileb xban laj tza xban nak li Dios cuan riq'uin. ³⁹ Lao quikil riq'uin ku chixjunil li c'a'ru quixbánu li Jesús aran Judea ut Jerusalén. Abanan eb a'an que'xcamsi chiru cruz. ⁴⁰ Ut li Dios quixcuaclesi cui'chic chi yo'yo sa' xyankeb li camenak sa' rox li cutan. Ut mokon li Jesús quixc'utbesi rib chiku. ⁴¹ Inc'a'

quixc'utbesi rib chiruheb chixjunileb. Ca'aj cui' chiruheb li quisiq'ue' ruheb junxil xban li Dios. Lao cocua'ac ut co-uc'ac riq'uin nak ac xcuacli cui'chic chi yo'yo sa' xyānkeb li camenak. ⁴² Ut coxtakla chixch'olobanquil xyālal ut chixjultican-quil chiruheb li tenamit nak a'an q'uebil xban li Dios chi rakoc ətin sa' xb̄eneb chixjunileb, li yo'yoqueb jo' ajcui' li camenakeb. ⁴³ A'an a'in li Jesús li que'xye chak resil chixjunileb li profeta junxil. Que'xye nak sa' xc'aba' a'an tācuyek' xmaqueb chixjunileb li neque'pāban re.

Li Santil Musik'ej quiq'uehe' reheb li mācua'eb aj judío

⁴⁴ Toj yo ajcui' chi ətinac laj Pedro nak que'xc'ul li Santil Musik'ej chixjunileb li yoqueb chi ab̄inc re li rātin li Dios li yo chixyebal. ⁴⁵ Eb laj pābanel aj judío, li que'chal chirix laj Pedro, que'sach xch'ol chirilbal nak li Dios quixq'ue li Santil Musik'ej reheb li mācua'eb aj judío. Gentiles nayeman ajcui' reheb. ⁴⁶ Que'rabi nak yoqueb chi ətinac sa' jalan ətinobal ut yoqueb chixnimanquil ru li Dios. ⁴⁷ Ut laj Pedro quixye: —¿Ma cuan ta bi' junak inc'a tāajok nak te'cubek' xha'eb a'in li xe'c'uluc re li Santil Musik'ej, jo' nak xkac'ul lāo? chan. ⁴⁸ Ut quixtakla xcubsinquil xha'eb sa' xc'aba' li Kācua' Jesucristo. Ut eb a'an que'xtz'ama chiru laj Pedro nak tācanāk cuib oxibak cutan chic riq'uineb.

11

Laj Pedro quixye reheb li cuanqueb Jerusalén nak naru ajcui' te'colek' li mācua'eb aj judío.

¹ Ut que'rabi resil eb li apóstol ut eb laj p̄abanel li cuanqueb Judea nak eb li mācua'eb aj judío yoqueb ajcui' chixp̄abanel li r̄atín li Dios. ² Nak co Jerusalén laj Pedro, quicuech'ic xbaneb laj p̄abanel aj judío li neque'bānun re li circuncisión. ³ Que'xye re: —¿C'a'ut nak xacuula'aniheb li mācua'eb aj judío? Ut, ¿c'a'ut nak xatcua'ac rochbeneb? chanqueb. ⁴ Tojo'nak laj Pedro quioc chixyebal reheb chixjunil li c'a'ru quic'ulman ut quixye reheb: ⁵—Yoquin chi tijoc aran Jope nak quicuil jun li visión. Sa' li visión quicuil nak yo chak chi cubec jun nimla t'icr sa' choxa. Pixbil sa' xca pac'alil lix xuc li t'icr. Quichal bar cuanquin cui'. ⁶ Quicuil chi sa' li t'icr ut aran cuanqueb nabal pay ru li xul xcomoneb li neque'cuan sa' ruchich'och'. Cuanqueb li josk' aj xul, cuanqueb xcomoneb li c'anti' ut cuanqueb xcomoneb li xul li neque'rupupic chiru choxa. ⁷ Ut quicuabi jun xyab cuc quixye cue, “At Pedro, chap acue li xul a'in. T̄acam̄si ut t̄atiu,” chan. ⁸ Ut laín quinye re, “Inc'a' Kācua'. Ma jun sut xintzaca c'a'ak re ru li naxye sa' li chak'rab nak inc'a' us tintzaca,” chanquin. ⁹ Ut quixye cui'chic cue li yo chak chi atinac sa' choxa, “Lāat inc'a' naru nacac'oxla nak inc'a' us t̄atzaca li c'a'ru xye li Dios nak us t̄atzaca,” chan. ¹⁰ Oxib sut quiyehe' cue chi jo'can ut chirix a'an quic'ame' cui'chic sa' choxa li nimla t'icr a'an. ¹¹ Ut sa' ajcui' li honal a'an que'cuulac sa' li cab cuanquin cui' oxib li cuink que'chal chak toj Cesarea chinsic'bal. ¹² Ut li Santil Musik'ej quixye cue nak tinxic chirixeb chi māc'a' inc'a'ux. Ut que'coeb ajcui' chicuix cuakib li herman.

co-oc sa' rochoch jun li cuink. ¹³ Li cuink a'an quixserak'i ke chanru nak quixc'utbesi rib jun li ángel chiru sa'li rochoch. Li ángel quixye re, "Takla xbokbal aran Jope laj Simón li nayehe' ajcui' aj Pedro re. ¹⁴ A'an tayehok acue chanru taruk tat-colek' jo'queb ajcui' li cuanqueb sa' la cuochoch, chan cue li ángel," chan li cuink. ¹⁵ Ut nak quinoc chi atinac riq'uineb, li Santil Musik'ej quichal sa' xbeneb jo' nak quichal sa' kaben lao junxil. ¹⁶ Ut quinak sa' inch'ol li c'a'ru quixye li Kacua', "Laj Juan relic chi yal quicubsin ha' riq'uin ha', abanan laex tec'ul li Santil Musik'ej." ¹⁷ Jo'can ut nak cui li Dios quixq'ue li Santil Musik'ej reheb a'an jo' nak quixq'ue ke lao li xopaban re li Jesucristo, ¿anihin ta bi' lain nak tinram chiru li Dios li c'a'ru taraj xbanunquil? chan laj Pedro. ¹⁸ Nak que'rabi li c'a'ru quixye laj Pedro, eb laj c'amol be sa' xyankeb laj pabanel aj judío, que'xcanab cuechinc. Que'xlok'oni li Dios ut que'xye: — Li Kacua' xq'ue ajcui' li junelic yu'am reheb li macua'eb aj judío xban nak xe'xyot' xch'ol ut xe'xjal xc'a'ux, chanqueb.

Eb laj pabanel li cuanqueb Antioquía que'xtiquib xch'utubanquil ribeb chi lok'oninc

¹⁹ Chirix lix camic laj Esteban, que'xjeq'ui ribeb laj pabanel xban li raylal li yoqueb chixc'ulbal. Que'cuulac toj Fenicia, Chipre ut Antioquía. Aran que'xch'olob resil li evangelio chiruheb laj judío. Inc'a' que'xye reheb li macua'eb aj judío. ²⁰ Abanan cuanqueb aj pabanel aj Chipre ut aj Cirene que'cuulac Antioquía. Eb a'an que'xch'olob xyalal chiruheb li neque'atinac sa' griego ut

que'xye resil li colba-ib sa' xc'aba' li Jesucristo.
21 Li Kacula' Jesús quixtenk'aheb riq'uin xnimal
 xcuquil ut nabaleb que'xpab li Kacula' Jesús.
22 Nak que'rabi resil eb laj pabanel li cuanqueb
 Jerusalén, que'xtakla laj Bernabé aran Antioquía.
23 Nak quicuulac laj Bernabé quixq'ue retal
 nak li Dios yo chirobtesinquileb laj pabanel
 li cuanqueb aran. Quixq'ue xcacuilar xch'oleb ut
 quixye ajcui' reheb nak che'xq'uehak xch'oleb
 chixpabánquil li Kacula'. **24** Laj Bernabé, a'an jun
 cuink chabil ut cuan xpábal. Nujenak chi Santil
 Musik'ej. Ut chiru a'an nabaleb que'xpab li Kacula'.
25 Chirix chic a'an laj Bernabé co Tarso chixsic'bal
 laj Saulo. Nak quixtau quixc'am Antioquía. **26** Ut
 que'cuan aran jun chihab tz'akal riq'uineb ut
 que'xc'ut li xyalal chiruheb nabal. Ut aran
 Antioquía que'xtiquib xyebal "cristiano" reheb laj
 pabanel. **27** Sa' eb li cutan a'an cuanqueb profeta
 que'el Jerusalén ut que'coeb Antioquía. **28** Cuan
 jun sa' xyankeb a'an aj Agabo xc'aba'. Quixye
 nak tacuank jun nimla cue'ej sa' chixjunil li
 ruchich'och' xban nak jo'can quic'ute' chiru xban
 li Santil Musik'ej. Ut li cue'ej a'in quic'ulman sa' eb
 li cutan nak cuank laj Claudio chok' acuabej. **29** Ut
 eb laj pabanel li cuanqueb Antioquía que'xc'ub ru
 nak te'xtenk'aheb laj pabanel li cuanqueb Judea.
 Que'xtenk'a a' yal chanru quixq'ue rib chiru
 li junjunk. **30** Ut jo'can que'xbanu. Que'xtakla
 lix tenk'al chirixeb laj Bernabé ut laj Saulo re
 nak te'xk'axtesi sa' ruk'eb li neque'c'amoc be sa'
 xyankeb laj pabanel li cuanqueb Judea.

12

Quicamsic laj Jacobo ut quiq'uehe' sa' tz'alam laj Pedro

¹ Sa' eb li cutan a'an laj Herodes quixtiquib xrahobtesinquileb laj pabanel. ² Quixtakla xcam-sinquil riq'uín ch'ich' laj Jacobo li ras laj Juan. ³ Laj Herodes quixq'ue retal nak eb laj judío que'saho' xch'ol riq'uín li c'a'ru quixbānu. Jo'can nak quixtakla ajcui' xchabtal laj Pedro. Quixbānu a'in sa' li nink'e nak neque'xcua' li caxlan cua mac'a' xch'amal. ⁴ Nak ac xchape' laj Pedro, li rey Herodes quixtakla sa' tz'alam ut quixk'axtesi sa' ruk'eb cahib ch'utal chi soldado re te'xc'ac'ale. Cahib chi soldado cuan sa' li junjunk ch'utal. Laj Herodes cuan sa' xch'ol nak tixc'am chiruheb li tenamit nak ac xrake' li nink'e re te'xrak atin sa' xbən. ⁵ Jo'can nak laj Pedro ilbil chi us xbaneb li soldado re nak inc'a' tælelik. Abanan eb laj pabanel cau yoqueb chi tijoc chirix.

Nak qui-isic laj Pedro sa' tz'alam xban li Dios

⁶ Ac cuulac re xk'ehil nak tac'amek' laj Pedro xban laj Herodes chiruheb li tenamit. Sa' li k'ojoyin a'an laj Pedro yo' chi cuarc sa' xyiheb li cuib chi soldado bac'bo riq'uín cadena. Ut cuanqueb ajcui' laj c'ac'alenel chire li oquebal re li tz'alam. ⁷ Ut xakəmil jun x-ángel li Dios bar cuan cui' laj Pedro ut quixcutanobresi sa' li tz'alam. Li ángel quixt'otz'otz'i laj Pedro ut quirajsi. Quixye re: — Cuaclin. Seba əcuib, chan. Ut sa' junpat quit'ane' li cadena chi ruk'. ⁸ Ut li ángel quixye re: — Q'ue lə cuak' chəcuix ut q'ue lə xəb chəcuok, chan re. Ut laj Pedro quixbānu jo' quiyehe' re. Ut li

ángel quixye cui'chic re: —Tz'ap acuib sa' la t'icr ut yo'o chicuix, chan. ⁹ Laj Pedro co chirix li ángel. Abanan inc'a' naxnau nak tz'akal yal li yo chixbānunquil li ángel. Sa' xch'ol laj Pedro nak visión li yo chiribal. ¹⁰ Que'cuulac cuan cui' li jun ch'utal chi soldado ut que'nume' aran. Ut que'cuulac cui'chic cuanqueb cui' li jun ch'utal chic. Ut que'nume' aran toj que'cuulac cuan cui' li puerta ch'ich' li na-ux cui' oc sa' li tenamit. Ut li puerta a'an quixte rib xjunes chiruheb. Que'el ut que'xk'ax jun li nim be. Aran quicanabac xjunes laj Pedro xban li ángel. ¹¹ Laj Pedro quixq'ue retal li c'a'ru quixc'ul ut quixye sa' xch'ol: — Anakcuán ninnau chi tz'akal nak li Kacua', a'an li xtaklan chak re li ángel. Xinixcol sa' ruk' laj Herodes. Ut xinixcol ajcui' sa' ruk'eb chixjunileb laj judío li te'raj xbānunquil raylal cue, chan. ¹² Nak quixtau ru li c'a'ru quixc'ul, laj Pedro co sa' rochoch lix María lix na' laj Juan li nayeman Marcos re. Aran ch'utch'ueqb nabaleb laj pābanel yoqueb chi tijoc. ¹³ Quixt'och't'och'i li puerta li cuan chiru nebal. Ut co jun li xka'al xRode xc'aba' chirabinquil ani cuan aran. ¹⁴ Quixnau ru xyab xcux laj Pedro. Inc'a' quixte li puerta chiru. Xban xsahil xch'ol, co sa' qanil chixyebal resil reheb li cuanqueb sa' cab nak laj Pedro cuan chire puerta. ¹⁵ Eb li cuanqueb sa' cab inc'a' que'xpab li quixye. —Xloco' acuu, chanqueb re. Abanan lix Rode quixye cui'chic reheb nak yal nak a'an laj Pedro. Que'chak'oc ut que'xye re: —A'an yal xmuhel, chanqueb re. ¹⁶ Nak yoqueb chi ătinac, laj Pedro toj yo ajcui' chixtoch'bal li puerta. Nak que'xte li puerta que'r'il laj Pedro.

Sachsoqueb xch'ol que'cana. ¹⁷ Quixtaksi li ruk're nak te'xcanab chokinc, ut quixserak'i reheb chanru nak qui-isic sa' tz'alam xban li Kacula'. Quixye reheb: —Yehomak resil a'in re laj Jacobo ut reheb chixjunileb laj pabanel, chan. Ut chirix a'an co sa' jalan na'ajej. ¹⁸ Nak quisakeu que'xq'ue retal nak ma ani chic laj Pedro sa' tz'alam. C'ajo' nak que'sach xch'oleb li soldado chirilbal li c'a'ru quic'ulman. Yoqueb chixyebal chi ribileb rib: —¿C'a'ru xc'ul laj Pedro? ¿Bar xco? chanqueb. ¹⁹ Ut laj Herodes quixtakla xsiq'uinquil. Nak inc'a' que'xtau quixq'ue sa' xbeneb laj c'ac'alenel ut quixtakla xcamsinqueb. Chirix a'an laj Herodes qui-el Judea ut co chi cuanc aran Cesarea.

Lix camic laj Herodes

²⁰ Laj Herodes yo xjosk'il sa' xbeneb laj Tiro ut laj Sidón. Eb a'an que'chal sa' comonil. Ut que'xk'unbesi laj Blasto li natenk'an re li rey. Que'xtz'ama chiru nak a'an taqtinak chirixeb chiru li rey re nak taruk te'xc'am rib sa' usilal riq'uin xban nak sa' xtenamit li rey na-el xtza-caemkeb. ²¹ Laj Herodes quixxakab jun li cutan re nak taqtinak riq'uineb laj Tiro ut laj Sidón. Quixtikib rib riq'uin chabil ak' c'ajo' xchak'al ru li neque'rocsi li rey. Quic'ojla sa' lix na'aj bar narakoc cui' atin ut qui-oc chi atinac riq'uineb li tenamit. ²² Ut eb li tenamit que'oc chixyebal chi cau xyab xcux: —Li yo chi atinac macua' cuink. A'an Dios, chanqueb. ²³ Ut sa' ajcui' li honal a'an, jun x-ángel li Kacula' quixq'ue jun yajel sa' xbén laj Herodes xban nak quixq'ue rib chixlok'oniheb li tenamit ut inc'a' quixq'ue xlok'al

li Dios. Quimotzo'in ut a'an quicamsin re. ²⁴ Sa' eb li cutan a'an li ratin li Kacua' yo chi abjc yalak bar. Ut nabaleb yoqueb chi pabanc re. ²⁵ Que'suk'i chak Jerusaln laj Bernab ut laj Saulo nak ac que'xbnu lix c'anjeleb. Que'xc'am chirixeb laj Juan, li neque'xye ajcui' Marcos re.

13

Que'xtiquib lix c'anjel laj Bernab ut laj Saulo

¹ Sa' xynkeb laj pabanel aran Antioquia cuanqueb profeta ut cuanqueb aj tzolonel. A'aneb a'in: laj Bernab, laj Simn li neque'xye Niger re, laj Lucio Cirene xtenamit, laj Manan li quiq'uiresic riq'uin laj Herodes li acuabej, ut laj Saulo. ² Nak yoqueb chi tijoc chiru li Dios ut chi ayunic, li Santil Musik'ej quixye reheb: — Q'uehomakeb xjuneseb laj Saulo ut laj Bernab re nak te'xbnu li c'anjel a'in li sic'bileb cui' ru inban, chan. ³ Que'xbnu lix ayun ut que'tijoc nak que'xq'ue li ruk'eb sa' xbneb laj Saulo ut laj Bernab. Tojo'nak que'xchak'rabiheb. ⁴ Laj Saulo ut laj Bernab que'coeb Seleucia jo' quiyehe' reheb xban li Santil Musik'ej. Que'el aran ut que'coeb chiru ha' toj Chipre. ⁵ Ut nak que'cuulac Salamina, que'xch'olob xyalal li ratin li Dios sa' eb li cab li neque'xch'utub cui' ribeb laj judio. Ut laj Juan Marcos yo ajcui' chixtenk'anquileb. ⁶ Yoqueb chixbeninquil chixjunil li na'ajej li sutsu sa' ha'. Que'cuulac sa' li tenamit Pafos. Aran que'xtau jun aj tul aj judio. Barjess lix c'aba'. Li cuink a'an aj balak'. Naxye nak sa' xc'aba' li Dios natinac. Abanan moco yal ta. ⁷ Li cuink a'an

cuan riq'uin laj Sergio Paulo, li q'uebil xcuánquil chi taklanc sa' li na'ajej a'an. Laj Sergio Paulo, li cuan xna'leb, quixtakla xbokbaleb laj Saulo ut laj Bernabé xban nak quiraj rabinquil li r̄atin li Dios. ⁸ Abanan yo chi ch'i ch'i inc laj Barjesús laj tul. (Chi jambil ru li c'aba'ej a'an naraj naxye Elimas.) Yo chixch'i ch'i inquileb xban nak inc'a' quiraj nak tapabank laj Sergio Paulo. ⁹ Xban nak cuan li Santil Musik'ej riq'uin, laj Saulo li nayeman ajcui' aj Pablo re, quixnau nak inc'a' us xna'leb laj Barjesús. Jo'can nak quixca'ya sa' ru. ¹⁰ Ut quixye re: —Laat chanchanat laj tza. Laat aj tic'ti'. Xic' nacacuil li t̄iquilal. Junes balak'ic ut māusilal nacabānu. Laat nacapo' ru li rusilal li Kācua'. ¹¹ Anakcuán li Kācua' tarakok atin sa' aben. Tat-mutz'ok' ut najt inc'a' t̄ailok xnak' acuu, chan laj Pablo. Ut sa' junpat quimoy ut quik'ojojino' sa' xnak' ru. Quixyal xsic'bal ani t̄ach'ilonk re. ¹² Ut nak laj Sergio Paulo quiril li c'a'ru quixc'ul laj tul, quixpab li Kācua'. Sachso xch'ol chirabinquil li tijleb chirix li Kācua'.

*Laj Pablo ut laj Bernabé que'xch'olob xyalal
aran Antioquía xcuént Pisidia*

¹³ Laj Pablo que'el Pafos sa' jucub jo'queb ajcui' li rochben ut que'c̄eb Perge xcuént Panfilia. Aran que'xcanab ribeb ut laj Juan Marcos quisuk'i Jerusalén. ¹⁴ Eb a'an que'nume' Perge ut que'cuulac Antioquía xcuént Pisidia. Sa' li hilobal cutan que'oc sa' li cab li neque'xch'utub cui' ribeb laj judío ut que'c'oja aran. ¹⁵ Eb laj c'amol be que'r'il xsa' li chak'rab ut que'r'il ajcui' xsa' li hu li que'xtz'iba li profeta. Ut chirix a'an que'xye

re laj Pablo: —Ex kas kitz'in, cui cuan li c'a'ru teye re xq'uebal xcacuil xch'oleb li tenamit, takaj rabinquil anakcuán, chanqueb. ¹⁶ Quixakli laj Pablo ut quixtaksi li ruk' re xyebal reheb nak inc'a' chic te'chokink. Quixye: —Ex aj judío ut laex li macua'ex aj judío, li nequelok'oni li Kacua', abihomak li tinye ere. ¹⁷ Li Dios li neque'xlok'oni li ralal xc'ajol laj Israel, a'an quixsiq'ueb ru li kaxe'tonil yucua'. Quirosobtesiheb ut quixtamresiheb nak cuanqueb aran Egipto. Ut riq'unin xnimal xcuانquil quirisiheb sa' li tenamit a'an. ¹⁸ Ca'c'al chihab quixcuy chak rilbaleb nak yoqueb chak chi numec' sa' li chaki ch'och'. ¹⁹ Quixsach ruheb cuukub li xninkal ru tenamit sa' li na'ajej Canaán ut li na'ajej a'an quicana chok' reheb laj Israel. ²⁰ Chixjunil a'in quic'ulman chiru cahib ciento riq'unin mero ciento chihab. Chirix a'an li Dios quixq'ueheb aj rakol atin chi taklanc sa' xbeneb toj qui-oc laj Samuel li profeta. ²¹ Chirix chic a'an que'xtz'ama xreyeb. Ut li Dios quixq'ue laj Saúl chok' xreyeb. A'an quitaklan sa' xbeneb chiru ca'c'al chihab. Laj Saúl a'an ralal laj Cis xcomoneb li ralal xc'ajol laj Benjamín. ²² Ut nak qui-isic laj Saúl, li Dios quixq'ue laj David chok' xreyeb ut quixye: —Xinsic' ru laj David ralal laj Isaí. Nacuulac chicuu lix na'leb li cuink a'an. A'an tixbañu chixjunil li c'a'ru nacuaj laín, chan. ²³ Ut sa' xyankeb li ralal xc'ajol a'an, li Dios quixq'ue chi yo'lac li Jesús laj Colol re li tenamit Israel jo' quixyechi'i reheb. ²⁴ Nak toj maji' nac'ulun li Jesús, laj Juan yo chixch'olobanquil chiruheb chixjungleb laj Israel nak tento te'xyot' xch'ol te'xjal

xc'a'ux ut te'xc'ul li cubi ha'. ²⁵ Nak ac rakec' re xbənunquil lix c'anjel, laj Juan quixye, “¿Anihin lain nak nequec'oxla? Moco lain ta li yoquex chiroybeninquil. Chalc ban re chicuix li yoquex chiroybeninquil. A'an nim xcuانquil chicuu lain. Moco inc'ulub ta xhitbal xc'amal lix xab,” chan laj Juan. ²⁶ Ex kas kitz'in, laex ralal xc'ajol laj Abraham, ut laex li macua'ex aj judío li nequexucua ru li Dios, taklanbil chak chok' ere laj Colonel. ²⁷ Li cuanqueb Jerusalén ut eb li neque'taklan sa' xbeneb li tenamit inc'a' que'xtau ru li que'xye eb li profeta. Inc'a' que'xnau nak li Jesús, a'an laj Colonel. Abanan nak que'xk'axtesi chi camc li Jesús, quitz'akloc ru li atin li que'xye li profeta, li na-ile' chiruheb rajlal sa' li hilobal cutan. ²⁸ Usta inc'a' que'xtau xmäc, que'xtz'ama chiru laj Pilato nak tixq'ue chi camsic li Jesús. ²⁹ Nak ac xc'ul chixjunil li raylal li quiyehe' chak chirix xbaneb li profeta junxil, que'risi chiru cruz ut que'xmuk. ³⁰ Abanan li Dios quixcuaclesi cui'chic chi yo'yo sa' xyankeb li camenak. ³¹ Ut chiru nabal cutan qui-ile' ru xbaneb li que'ochbenin re junxil nak qui-el Galilea ut co Jerusalén. Ut a'aneb chic neque'yehoc resil li que'ril reheb li tenamit anakcuan. ³² Jo'can ajcui' lao yoco chixch'olobanquil cheru li chabil esilal a'in: nak li Dios quixcuaclesi cui'chic chi yo'yo li Jesucristo. ³³ Quitz'akloc ru chok' ke lao li alal c'ajolbej li quixyechi'i chak li Dios reheb li kaxe'tonil yucua' junxil jo' tz'ibanol retalil sa' li hu Salmos li naxye chi jo'ca'in: Latat li tz'akal cualal. Anakcuan xatinq'ue sa' acuanquil, chan li Dios. (Sal. 2:7) ³⁴ Quixcuaclesi cui'chic chi yo'yo sa' xyankeb li ca-

menak ut inc'a' chic t^ac^amk jo' tzⁱbanbil retalil sa' li hu Isaías li naxye chi jo'ca'in: L^ain texcuosobtesi ut tinq'ue ^{ere} li ma^tan li quinyechi'i re laj David junxil. (Is. 55:3) ³⁵ Ut naxye ajcui' sa' li Salmos: Inc'a' t^ac^acanab chi k'^ac lix tibel l^aSantil Alal. (Sal. 16:10) ³⁶ Relic chi y^al laj David nak toj yo'yok quic'anjelac chiru lix tenamit jo' quiraj li Dios. Quicam ut quimuke' chixc'atk lix xe't^on^{il} yucua' ut quik'a lix tibel. ³⁷ Abanan li jun li quicuaclesic cui'chic chi yo'yo xban li Dios, a'an inc'a' quik'a lix tibel. ³⁸ Jo'can ut nak chenauhak l^aex, kas kⁱtz'in, nak nakajultica cheru nak ca'aj cui' sa' xc'aba' li Jesús li quicuacli cui'chic chi yo'yo cuan xcuybal xsachbal le m^ac. ³⁹ Inc'a' quitⁱcobresic xch'oleb li kaxe't^on^{il} yucua' riq'uin xb^anunquil li naxye sa' lix chak'rab laj Moisés, abanan anakcuan naru chic t^atⁱcobresik kach'ol riq'uin xp^abanquil li Jesús. ⁴⁰ Jo'can nak cheq'uehak retal chi us re nak inc'a' t^ach^alk sa' ^{eb}en li raylal li que'xye chak li profetas junxil. ⁴¹ A'an a'in li que'xtzⁱba li profeta junxil:

Cherabihak, l^aex li nequextz'ektañan re li cuatín.

Chisachk ^{ena}'leb ut chex-osok' ta. L^ain yoquin chixb^anunquil jun li sachba ch'olej sa' eb li cutan a'in. Li sachba ch'olej li yoquin chixb^anunquil inc'a' raj tep^ab cui yal ani ta junak t^aserak'ink ^{ere}. (Hab. 1:5)

⁴² Nak que'el laj Pablo ut laj Bernabé sa' li cab li neque'xch'utub cui' ribeb laj judío, li ma^cua'eb aj judío que'xtzⁱama chiru laj Pablo nak t^ach^alk cui'chic sa' li hilob^al cutan jun chic re nak tixch'olob cui'chic xy^alal chiruheb. ⁴³ Nak que'xchak'rabiheb li tenamit, nabaleb laj judío

jo'queb ajcui' li que'oc sa' xyānkeb a'an que'xtake
 laj Pablo ut laj Bernabé. Laj Pablo ut laj Bernabé
 yoqueb chixq'uebal xna'lebeb re nak te'cuānk sa'
 xyālal jo' naraj li Dios. ⁴⁴ Sa' li hilobāl cutan jun
 chic, yal cuib oxib aj chic li inc'a' que'cuulac chi
 abinc nak que'xch'utub ribeb chixjunileb li cuan-
 queb sa' li tenamit chirabinquil li rātin li Dios li
 tixye laj Pablo. ⁴⁵ Ut nak que'r'il li q'uila tenamit eb
 li neque'c'amoc be sa' xyānkeb laj judío, c'ajo' nak
 que'cako' xch'oleb. Que'oc chixcuech'inquil laj
 Pablo. Que'xhob ut que'xmajecua. ⁴⁶ Laj Pablo ut
 laj Bernabé que'xye chi cauheb xch'ol: —Relic chi
 yal nak xben cua raj ere lāex aj judío xkaye resil li
 rātin li Dios. Abanan lāex xetz'ektāna ut xec'oxla
 nak moco ec'ulub ta li junelic yu'am. Jo'can nak
 anakuan takaye resil reheb li mācua'eb aj judío.
⁴⁷ Tento takaye xban nak jo'can coxtakla cui' chak
 li Kacua' Dios nak quixye:

Xatinxakab re tāch'olob xyālal chiruheb li
 mācua'eb aj judío ut tāye resil li colba-ib
 jun sut sa' ruchich'och'. (Is. 49:6)

⁴⁸ Nak que'rabi li c'a'ru quixye laj Pablo,
 li mācua'eb aj judío que'saho' sa' xch'oleb ut
 que'xq'ue xcuانquil li rātin li Dios. Que'pāban li
 jo' q'uial li quixye li Dios nak tācuānk xyu'ameb
 chi junelic. ⁴⁹ Ut yo rabinquil resil li rātin li Dios sa'
 chixjunil li na'ajej a'an. ⁵⁰ Eb laj judío que'xtacchi'i
 chak eb li ixl li neque'xq'ue xcuانquil lix pabaleb,
 li neque'q'uehe' xllok'al jo'queb ajcui' li cuink li
 cuanqueb xcuانquil sa' li tenamit. Que'xyo'ob
 jun ra xic' sa' xbeneb laj Pablo ut laj Bernabé.
 Ut que'risiheb sa' lix tenamiteb. ⁵¹ Laj Pablo ut
 laj Bernabé que'xchik'chik'i li poks chi rokeb

nak que'el sa' li tenamit re xc'utbal nak inc'a' us que'xbənu reheb. Ut chirix a'an que'coeb Iconio. ⁵² Ut eb laj pābanel c'ajo' xsahil sa' xch'oleb ut li Santil Musik'ej cuan riq'uineb.

14

*Laj Pablo ut laj Bernabé que'xc'ul raylal xban
nak que'xch'olob xyalal aran Iconio*

¹ Nak que'cuulac Iconio, laj Pablo ut laj Bernabé que'oc sa' li cab li neque'xch'utub cui' ribeb laj judío. Que'xch'olob li xyalal chiruheb ut nabaleb aj judío que'pāban jo'queb ajcui' li mācua'eb aj judío. ² Ut eb laj judío li inc'a' que'pāban, que'xtacchi'iheb li mācua'eb aj judío re nak te'xpo' xch'oleb sa' xbəneb laj pābanel. ³ Abanan laj Pablo ut laj Bernabé najt que'cana aran. Ut xban nak cauheb xch'ol riq'uin li Kācua' que'xch'olob xyalal li rusilal li Dios. Ut li Kācua' yo chixq'uebal xcuanyl li rātineb xban nak yo chixtenk'anquileb chixbənunquil li milagros ut li sachba ch'olej. ⁴ Que'xjach ribeb li tenamit. Cuanqueb li que'oquen chirixeb laj judío ut cuanqueb li que'oquen chirixeb li apóstol. ⁵ Sa' xyākeb li xic' neque'iloc reheb laj Pablo ut laj Bernabé cuanqueb aj judío ut cuanqueb mācua'eb aj judío. Que'xjunaji ribeb riq'uineb li neque'taklan sa' li tenamit ut que'xc'ub ru chanru nak te'xrahobtesi ut te'xcuti chi pec laj Pablo ut laj Bernabé. ⁶ Abanan laj Pablo ut laj Bernabé que'rabi resil li yoqueb chixc'ubanquil ut que'elelic chiruheb. Cōeb sa' eb li tenamit Listra ut Derbe xcuēnt Licaonia ut que'cōeb ajcui'

sa' eb li c'alebal li cuanqueb chi xjun sutam. ⁷ Ut aran yoqueb chixch'olobanquil resil li colba-ib.

Que'xcuti laj Pablo chi pec aran Listra

⁸ Aran Listra cuan jun li cuink inc'a' naru nabec. Chalen sa' xca'ch'inal inc'a' us li rok. Li cuink a'an chunchu aran. ⁹ Yo chirabinquil li c'a'ru yo chixyebal laj Pablo. Laj Pablo quixca'ya li cuink ut quixq'ue retal nak li cuink a'an quixpab nak naru taq'uirtesik. ¹⁰ Jo'can nak laj Pablo quixye re chi cau xyab xcux: —Cuaclin. Xaklin chi us, chan. Ac tacuaclik ut qui-oc chi b̄ec li cuink. ¹¹ Nak li tenamit que'ril li c'a'ru quixbanu laj Pablo, que'xjap reheb chixyebal sa' ratinobaleb laj Licaonia: —Xe'chal sa' kayank li dios. Chanchaneb cuink, chanqueb. ¹² Laj Bernabé que'xq'ue xc'aba' chok' Júpiter, ut laj Pablo Mercurio que'xq'ue chok' xc'aba' xban nak a'an aj c'amol be chi atinac. ¹³ Li rochoch laj Júpiter lix dioseb a'an cuan chire li tenamit. Laj tij li nac'anjelac chiru lix dioseb a'an cuan chire li tenamit. Laj tij li nac'anjelac chiru lix dioseb quixc'am chire li tenamit li cuacax ut li cotobanbil utz'u'uj. Quiraj raj xmayejanquil chiruheb li apóstol rochbeneb li tenamit. ¹⁴ Nak que'xq'ue retal li c'a'ru yoqueb li tenamit, laj Pablo ut laj Bernabé que'xpej li rak'eb retalil nak inc'a' quicuulac chiruheb li c'a'ru yoqueb chixbanunquil li tenamit. Ut que'coeb sa' anil sa' xyankeb li tenamit ut que'xye chi cau xyab xcuxeb: ¹⁵ —Ex tenamit, ¿c'a'ut nak nequebanu chi jo'can? Lao yal cuinko jo' laex. Juntak'eto eriq'uin. A'an aj e nak xochal arin sa' eyank chixyebal ere nak tecanab li jo' majo'il na'leb.

Sic'omak ban li yo'yoquil Dios li quiyiban re li choxa, li ruchich'och', li palau ut chixjunil li c'a'ru cuan. ¹⁶ Junxil li Dios quixcanabeb li tenamit chi cuanc jo' que'raj eb a'an. ¹⁷ Riq'uin li usilal li naxbanu ke, junelic yo chixc'utbesinquil chiku nak a'an li Dios. A'an naxc'ut chiku nak a'an yal re sa' xb'en chixjunil. A'an naq'uehoc re li hab. A'an naq'uehoc re chi uchinc li kacuimk chi nabal, ut a'an ajcui' nac'ojoban re li kach'ol riq'uin li katzacaemk ut riq'uin lix sahil kach'ol, chan laj Pablo. ¹⁸ Usta laj Pablo ut laj Bernabé que'xch'olob xyalal chiruheb li tenamit, abanan ra sa nak que'xc'ul xch'ol nak inc'a' te'mayejak chiruheb. ¹⁹ Que'cuulac eb laj judío li que'chal Antioquía ut Iconio. Que'xtacchi'iheb nabaleb li tenamit. Que'xuti chi pec laj Pablo ut que'risi chire li tenamit. Sa' xch'oleb a'an nak camenak chic laj Pablo que'xcanab. ²⁰ Laj Pablo quiril nak quisute' xbaneb laj pabanel. Quicuacli ut co sa' li tenamit. Ut sa' xcab li cutan co cui'chic Derbe rochben laj Bernabé.

*Laj Pablo co cui'chic Antioquía xcuent Siria
chixq'uebal xcacuilal xch'oleb laj pabanel*

²¹ Nak que'xch'olob resil li colba-ib sa' li tenamit Derbe, nabaleb que'paban. Chirix chic a'an que'suk'i cui'chic sa' eb li tenamit Listra, Iconio ut Antioquía. ²² Yoqueb chixq'uebal xcacuil xch'oleb laj pabanel. Que'xye reheb nak te'xpab li Kacua' chi anchaleb xch'ol ut inc'a' te'xcanab xpabankil. Que'xye reheb nak tento te'xcuy xnumsinquil li raylal re nak te'oc sa' lix nimajcual cuanquilal li Dios. ²³ Que'xxakab aj

c'amol be re li junjunk ch'utal chi aj pabanel. Que'xbənu lix ayun ut que'tijoc sa' xbeneb re xk'axtesinquileb sa' ruk' li Kacua' li ac xe'paban. ²⁴ Nak yoqueb chi xic que'nume' sa' li na'ajej Pisidia ut que'cuulac Panfilia. ²⁵ Que'xye resil li evangelio aran Perge ut que'coeb Atalia. ²⁶ Que'el aran ut que'coeb chiru ha' toj Antioquia sa' li na'ajej li que'taklac cui' chi c'anjelac chiru li Kacua'. Que'canabac sa' ruk' li Dios re nak a'an tailok reheb. Jo'ca'in nak que'xchoy li c'anjel li quiq'uehe' reheb re te'xbənu. ²⁷ Nak que'cuulac Antioquia que'xch'utub chixjunileb laj pabanel ut que'xserak'i reheb chixjunil li quixbənu li Kacua' reheb. Que'xserak'i ajcui' reheb chanru nak li Dios quixq'ue li evangelio reheb li macua'eb aj judío. ²⁸ Laj Pablo ut laj Bernabé najt que'cana riq'uineb laj pabanel sa' li na'ajej a'an.

15

Eb laj c'amol be que'xch'utub ribeb Jerusalén chixc'ubanquil c'a'ru tento te'xbənu laj pabanel li macua'eb aj judío

¹ Cuanqueb aj pabanel que'chal chak Judea. Que'oc chixybal reheb laj pabanel: —Inc'a' naru texcolek' cui inc'a' tebənu li circuncisión jo' naxye li chak'rab li quiq'uehe' re laj Moisés, chanqueb. ² Riq'uin a'an que'xtiquib xcuech'inquil ribeb riq'uin laj Pablo ut laj Bernabé chirix li na'leb a'in. Ut que'xc'ub ru nak laj Pablo ut laj Bernabé te'xic Jerusalén chixpatz'bal reheb li apóstol ut reheb laj c'amol be ma tento nak te'xc'ul li circuncisión re nak te'colek'. Cuanqueb ajcui' cuib oxib laj

pabanel cœb chirixeb. ³ Que'taklacf xbaneb laj pabanel aran Antioquía. Nak yoqueb chi numec' Fenicia ut Samaria, que'xye resil nak que'pabanel li mäcua'eb aj judío. Ut c'ajo' nak que'saho' sa' xch'oleb chixjunileb laj pabanel rabinquil nak yoqueb chi pabanc. ⁴ Ut nak que'cuulac Jerusalén, que'c'ule' xbaneb li apóstol, eb laj c'amol be jo'queb ajcui' chixjunileb laj pabanel. Ut que'xserak'i reheb chanru nak li Dios quixtenk'aheb riq'uin li c'anjel que'xbanu. ⁵ Abanan cuanqueb cuib oxib laj pabanel aj fariseo. Eb a'an que'xye: —Eb laj pabanel li mäcua'eb aj judío, tento te'xbanu li circuncisión. Tento te'xbanu li c'a'ru naxye li chak'rab li quixq'ue ke laj Moisés, chanqueb. ⁶ Que'xch'utub ribeb li apóstol ut eb laj c'amol be chixsic'bal c'a'ru te'xbanu riq'uin li ch'a'ajquilal a'in. ⁷ Ut nak ac xe'xcuech'i ribeb chi us chirix li na'leb a'in, laj Pedro quicuacli ut qui-oc chi qatinac. Quixye reheb: —Ex herman, läex nequenau nak ac junxil quixsic' chak cuu li Dios sa' eyank re tinxte resil li colba-ib reheb li mäcua'eb aj judío re nak te'pabank ajcui' eb a'an. ⁸ Li Dios naxnau c'a'ru nanume' sa' xch'ol li junjunk. Quixc'ut chiku nak naxraheb a'an nañ quixq'ue li Santil Musik'ej reheb jo' nak quixq'ue ke lao. ⁹ Moco jalan ta chic li colba-ib li xq'ue ke lao chiru li xq'ue reheb a'an. Quixcuy quixsachlix maqueb xban nak xe'paban. ¹⁰ Anakcuán ut ¿c'a'ut nak yoquex chixyalbal rix li Dios riq'uin xq'uebal li ik a'in sa' xbeneb laj pabanel li mäcua'eb aj judío? ¿C'a'ut nak tepuersiheb chixbanunquil li naxye li chak'rab li inc'a' xoru chixbanunquil lao chi moco eb li kaxe'tonil yucua'? ¹¹ Yal xban

rusilal li Kacula' Jesús nak xopában ut xocole' jo' eb ajcui' a'an, chan laj Pedro. ¹² Que'xcanab ətinac chixjunileb li ch'utch'uqueb aran ut que'oc chirabinquil nak laj Pablo ut laj Bernabé yoqueb chixserak'inquil chanru nak li Dios quixtenk'aheb chixbənunquil li milagro ut li sachba ch'olej sa' xyākeb li mācua'eb aj judío. ¹³ Nak que'rake' chi ətinac, laj Jacobo quichak'oc ut quixye: — Ex inherman, abihomak li oc cue xyebal ere. ¹⁴ Laj Simón Pedro ac xye ere chanru nak li Dios quixtiquib rosobtesinquileb li mācua'eb aj judío. Quixsiq'ueb ru sa' xyākeb li ani te'pabank re. ¹⁵ Ut a'an ajcui' li que'xtz'iba chak retalil li profeta junxil li naxye chi jo'ca'in:

¹⁶ Ut chirix a'in lain tinchalk ut tincuaclesi cui'chic lix tenamit laj David, li t'anenak anakcuan. Tinyib cui'chic li tz'ac li sutsu cui' ut tinyib cui'chic li juq'uinbil. Tinq'ueheb cui'chic xcuanguil laj Israel,

¹⁷ re nak tine'xpab li mācua'eb aj judío. Tine'xpab chixjunileb li sic'bileb ru inban chok' cualal inc'ajol, chan li Kacula' Dios.

¹⁸ Ut li Kacula' Dios li quiyehoc chak re a'in, a'an ajcui' li təbənunk re. (Amós 9:11-12)

¹⁹ Jo'can nak lain ninye nak inc'a' takapuersi ruheb chixbənunquil li naxye li chak'rab li mācua'eb aj judío li yoqueb chixpabankuil li Kacula'. ²⁰ Li tento takabənu, a'an tz'ibac riq'uineb ut xyebal reheb nak inc'a' te'xmux rib riq'uin xtzacanquil li tzacaemk mayejanbil chiruheb li yibənbil dios. Inc'a' te'co'betak te'yumbetak. Ut inc'a' te'xtiu xtibel li yatz'bil xul chi moco te'xtzaca li quic'. ²¹ Jo'ca'in ajcui' naxye li chak'rab

li quiq'uehe' re laj Moisés xban li Dios. Ut chalen chak najter cuan li ani najultican re sa' eb li cab li neque'xch'utub cui' ribeb laj judío rajlal hilobal cutan, chan laj Jacobo.

Li hu li que'xtz'iba rebeb li macua'eb aj judío

22 Eb li apóstol, ut eb laj c'amol be rochbeneb chixjunileb laj pabanel que'xisic' ruheb li te'xtakla Antioquía chirixeb laj Pablo ut laj Bernabé. Ut que'xsiq'ueb ru laj Silas ut laj Judas, aj Barsabás neque'xye ajcui' re. Eb li cuink a'in q'uebileb xcuanguil xbaneb li rech aj pabanelil.

23 Que'xtz'iba jun li hu ut que'xtakla chirixeb laj Judas ut laj Silas. Jo'ca'in naxye sa' li hu que'xtakla: Ex herman, li macua'ex aj judío, lao li apóstol, ut eb laj c'amol be jo'queb ajcui' chixjunileb laj pabanel nakatakla xsahil ech'ol laex li cuanquex sa' eb li tenamit Antioquía, Siria ut Cilicia. Sahak taxak sa' ech'ol. **24** Xkabi resil nak cuanqueb li xe'el arin sa' kayank ut xe'coeb aran sa' le tenamit chech'i'ch'i'inquil ut chixpo'bal ech'ol riq'uin li c'a'ru neque'xye. Abanan moco lao ta xotaklan rebeb. **25** Jo'can nak xkach'utub kib ut xkac'ub ru nak takasic' ruheb li ani takatakla eriq'uin chirixeb laj Bernabé ut laj Pablo, li raroqueb kabán.

26 Eb li kaherman a'in ac xe'xk'axtesi ribeb chi c̄amc sa' xc'aba' li Kacua' Jesucristo. **27** Ut xkasic' ruheb laj Judas ut laj Silas ut xkataklaheb eriq'uin re nak te'xch'olob cheru li c'a'ru xkatz'iba sa' li hu a'in. **28** Xc'ul xch'ol li Santil Musik'ej jo'ajcui' lao nak inc'a' texkapuersi chixbanunquil chixjunil li naxye sa' li chak'rab. Ca'aj cui' eb

li na'leb a'in tento tebanu. ²⁹ Inc'a' t̄etzaca li tzacaemk mayejanbil chiru li yibabil dios chi moco t̄etzaca li quic' chi moco t̄etzaca xtibel li yatz'bil xul. Ut inc'a' temux erib riq'uin co'b̄etac yumb̄etac. Cui t̄ecol erib chiru chixjunil a'in, us tebanu. Cherilak erib, chan laj Jacobo. ³⁰ Eb li cuink li que'taklac coeb Antioquia. Que'xch'utub chixjunileb laj p̄abanel ut que'xk'axtesi reheb li hu li que'xc'am. ³¹ Nak que'ril xsa' li hu, c'ajo' nak que'saho' sa' xch'oleb laj p̄abanel ut que'c'ojob xch'oleb riq'uin li c'a'ru quitaklac xyebal reheb. ³² Laj Judas ut laj Silas q'uebileb xm̄atan chixch'olobanquil xyalal li r̄atin li Dios. Que'xch'olob xyalal chiruheb li ch'utch'uequeb aran ut que'xq'ue xcacuilal xch'oleb ut que'xc'ojob xch'oleb riq'uin li atin li que'xye reheb. ³³ Nadj que'cana sa' xyankeb. Mokon chic que'chak'rabi re nak te'suk'ik cui'chic Jerusalén riq'uineb laj p̄abanel li que'taklan reheb Antioquia. Ut que'xtz'ama rusilal li Dios sa' xbeneb. ³⁴ Abanan laj Silas toj quiraj canac aran. ³⁵ Laj Pablo ut laj Bernabé que'cana ajcui' aran Antioquia. Yoqueb chixc'utbal li r̄atin li Dios ut yoqueb chixch'olobanquil xyalal li colba-ib. Ut cuanqueb ajcui' nabaleb li que'tenk'an reheb.

Laj Pablo quixjach rib riq'uin laj Bernabé ut co xca' sut chirula'aninquil laj pabanel

³⁶ Mokon chic laj Pablo quixye re laj Bernabé: —Toxic cui'chic sa' eb li tenamit conume' cui' chak chixyebal r̄atin li Dios re takil chanru cuanqueb laj p̄abanel li cuanqueb sa' eb li na'aiej a'an, chan. ³⁷ Ut laj Bernabé quiraj raj xc'ambal

chirixeb laj Juan li neque'xye ajcui' Marcos re. ³⁸ Abanan inc'a' quixc'ul xch'ol laj Pablo xban nak junxil laj Juan Marcos quixjach rib riq'uineb aran Panfilia ut inc'a' chic cō chirixeb chixbānunquil li c'anjel. ³⁹ Que'xcuech'i ribeb laj Pablo ut laj Bernabé ut que'xcanab ribeb. Laj Bernabé cō aran Chipre chiru ha' ut quixc'am laj Juan Marcos chirix. ⁴⁰ Laj Pablo quixsic' ru laj Silas re tixc'am chirix. Eb laj pābanel li cuanqueb aran Antioquía que'xk'axtesiheb laj Pablo ut laj Silas sa' ruk' li Kacua' nak que'el aran. ⁴¹ Quilaje'xbeni li na'ajej Siria ut Cilicia. Que'xch'olob xyālal chiruheb laj pābanel ut que'cacuu xch'oleb sa' xpābaleb.

16

Laj Timoteo cō chirixeb laj Pablo ut laj Silas

¹ Laj Pablo quicuulac sa' eb li tenamit Derbe ut Listra. Ut aran quixtau jun aj pābanel aj Timoteo xc'aba'. Lix na', a'an jun aj pābanel aj judío ut lix yucua', a'an aj griego. Mācua' aj judío. ² Chābil neque'xye chirix laj Timoteo eb laj pābanel li cuanqueb Listra ut Iconio. ³ Laj Pablo quiraj xc'ambal laj Timoteo chirix. Jo'can nak quixbānu li circuncisión re. Inc'a' quiraj nak te'ch'inānk xch'oleb laj judío li cuanqueb sa' eb li na'ajej aran xban nak chixjunileb que'xnau nak lix yucua' laj Timoteo mācua' aj judío. ⁴ Ut nak yoqueb chi numec' sa' li junjunk chi tenamit, yoqueb chixye-bal reheb laj pābanel nak tento te'xbānu li c'a'ru que'xc'ub ru eb li apóstol jo'queb ajcui' laj c'amol be li cuanqueb aran Jerusalén. ⁵ Jo'ca'in nak

yoqueb chi q'uic laj pabanel sa' xpabaleb. Ut rajal cutan yoqueb chi t̄amc.

Jun li cuink aj Macedonia quic'ute' chiru laj Pablo sa' visión

⁶ Li Santil Musik'ej quixc'ut chiruheb nak inc'a' te'xic chixch'olobanquil resil li colba-ib sa' li na'ajej Asia. Jo'can nak que'coeb Frigia ut que'nume' ajcui' sa' li na'ajej Galacia. ⁷ Nak que'cuulac Misia, que'raj raj xic Bitinia. Abanan li Santil Musik'ej inc'a' quixcanabeb re te'xic aran. ⁸ Jo'can nak yal que'nume' Misia ut coeb Troas. ⁹ Nak cuanqueb aran sa' jun li k'ojoyin quic'ute' jun li visión chiru laj Pablo. Jun li cuink aj Macedonia xakxo chiru nak quiril. Yō chixtz'amanquil chiru ut quixye re: —Chālkat sa' tenamit Macedonia ut choatenk'a, chu'ux re nak quiril. ¹⁰ Ut nak ac xc'ute' li visión chiru laj Pablo, sa' junpat quika-cauresi kib lāo chi xic Macedonia. Kanau chi tz'akal nak li Díos yō chi taklanc ke aran chixyebal resil li colba-ib reheb li cuanqueb aran.

Lix Lidia quipabán nak laj Pablo quixch'olob xyalal aran Filipos

¹¹ Co-el aran Troas ut t̄ic coo chiru ha' toj Samotracia. Ut cuulajak chic cocuulac Neápolis. ¹² Chirix a'an coo Macedonia sa' li nimla tenamit Filipos. Li tenamit a'an cuan xcuent Roma. Cocuan cuib oxib cutan sa' li tenamit a'an. ¹³ Ut sa' li hilobal cutan coo chire li tenamit cuan cui' jun li nima' sa' li na'ajej li neque'tijoc cui' eb laj judío. Coc'ojla ut co-oc chixyebal resil li colba-ib reheb li ixd li que'ch'utla aran. ¹⁴ Jun reheb li ixd a'an xLidia xc'aba'. Tiatira xtenamit. A'an

nac'ayin chabil t'icr. Naxpab li Dios ut yo chi abinc xban nak li Dios quixc'ut chiru nak tixq'ue retal li yo chixyebal laj Pablo. ¹⁵ Quixc'ul li cubi ha' rochbeneb chixjunileb li cuanqueb sa' rochoch, ut quixye ke: —Cui nequepab nak lajn xinpab li Kacua' chi anchal inch'ol, naru nequeexcana chi hilanc sa' li cuochoch, chan ke. Ut quirelaji ku chi canac.

Laj Pablo ut laj Silas que'q'uehe' sa' tz'alam aran Filipos

¹⁶ Sa' jun li cutan yoco chi xic chi tijoc nak kac'ul jun li xka'al aj k'e. Cuan mäus aj musik'ej riq'uin. A'an jun mos ut naxsic' nabal xtumin lix patrón riq'uin k'ehinc. ¹⁷ Li xka'al a'an yo chikatäkenquil. Japjo re chixyebal: —Eb li cuink a'in a'an xmoseb li nimajcual Dios. Yoqueb chixch'olobanquil chiku chanru nak taruk tocolek', chan. ¹⁸ Nabal cutan quixbanu chi jo'can. Nak ac xtitz' chirabinquil, laj Pablo quixxakab rib, ut quiril li xka'al, ut quixye re li mäus aj musik'ej: —Sa' xc'aba' li Kacua' Jesucristo, tinye acue: Elen riq'uin li xka'al a'in, chan. Ut sa' ajcui' li honal a'an, li mäus aj musik'ej qui-el riq'uin. ¹⁹ Nak que'xq'ue retal lix patrón li xka'al nak inc'a' chic taruk tixsic' xtumineb, que'xchap laj Pablo ut laj Silas ut que'xc'am sa' popol chiruheb laj rakol atin. ²⁰ Nak que'xxakab chiru laj rakol atin, que'xye: —Eb li cuink a'in, a'aneb aj judío ut yoqueb chikach'i ch'i'inquil sa' li katenamit. ²¹ Yoqueb chixc'utbal jalan na'leb sa' li katenamit. Lao inc'a' naru nakac'ul chi moco naru takabänu li neque'xye xban nak lao aj Roma, chanqueb.

²² Ut que'xtub rib li tenamit chixjitbaleb. Eb laj rakol atin que'xk'ichi li rak'eb laj Pablo ut laj Silas ut que'xtakla xsac'baleb riq'uin che'. ²³ Nak ac xe'tacuasic chi us, que'q'uehe' sa' tz'alam. Ut eb laj rakol atin que'xye reheb laj ilol tz'alam nak te'ril chi us laj Pablo ut laj Silas re nak inc'a' te'elelik. ²⁴ Ut nak quiyehe' chi jo'can, que'c'ame' ut que'q'uehe' sa' tz'alam sa' jun li na'ajej li cuan toj chi sa' ut que'nat'e' li rok sa' che'. ²⁵ Tuktu chic k'ojoyin nak laj Pablo ut laj Silas yoqueb chi tijoc ut yoqueb chi bichanc re xlok'oninq'il li Dios. Ut eb li cuanqueb chi prexil yoqueb chi abinc. ²⁶ M^ac'a' sa' xch'oleb nak quichal jun nimla hic. Qui-ec'asic chi cau li tz'alam, ut quilaje'teli lix puertil. Ut quilaje'hite' li cadena li bac'boqueb cui' li prex. ²⁷ Ut nak qui-aj ru laj ilol tz'alam, quiril nak teto lix puertil li tz'alam. Quixchap lix ch'ich' ut oc raj re chixcamsinquel rib. Sa' xch'ol a'an nak xe'elelic chixjunileb li prex. ²⁸ Ut laj Pablo quixjap re chi cau ut quixye: —M^acamsi acuib. Chikajunilo cuanco arin, chan. ²⁹ Ut laj ilol tz'alam quixpatz' lix xam ut qui-oc chi sa' li tz'alam chirilbal. Nasicsot xban xxiu nak quixcut rib chi rokeb laj Pablo ut laj Silas. ³⁰ Laj ilol tz'alam quirisiheb xjuneseb laj Pablo ut laj Silas ut quixye reheb: —¿C'a'ru us tinbañu re nak tincolek? ³¹ Eb a'an que'xye: —Pab li K^acua' Jesucristo. Tatcolek' laat jo'queb ajcui' li cuanqueb sa' la cuochoch, chan laj Pablo. ³² Ut quixch'olob xyalal li ratin li K^acua' chiru a'an jo' ajcui' chiruheb li jo' q'ual li cuanqueb sa' li rochoch. ³³ Ut sa' ajcui' li honal a'an laj ilol tz'alam quirisiheb sa' tz'alam laj Pablo

ut laj Silas. Quixch'aj ru lix toch'oleb xban nak que'saq'ue'. Ut ticto quicubsic xha' laj ilol tz'alam rochbeneb chixjunileb li cuanqueb sa' li rochoch. ³⁴ Quixc'ameb laj Pablo ut laj Silas sa' rochoch ut quixq'ueheb xtzacaemk. C'ajo' nak quisaho' sa' xch'ol nak quixpab li Dios rochbeneb li cuanqueb sa' rochoch. ³⁵ Nak quisakeu, eb laj rakol ̄atin que'xtakla xyebal re laj ilol tz'alam nak tixcan-abeb chi xic eb li cuink a'an. ³⁶ Laj ilol tz'alam quixye reheb: —Eb laj rakol ̄atin xe'xtakla chak xyebal nak tex-ach'abak. Jo'can nak ayukex chi mac'a' ec'a'ux, chan. ³⁷ Laj Pablo quixye reheb: —Inc'a'. Xosaq'ue' chiruheb li tenamit chi maji' que'xrak ̄atin sa' kabən. Xoe'xq'ue sa' tz'alam usta ləo aj Roma. Ut anakcuan, te'raj toe'risi chi mukmu. Inc'a' naru chi jo'can. Chalkeb ban a'an ut choe'risihak, chan. ³⁸ Ut eb li takl que'coeb chixyebal re laj rakol ̄atin li c'a'ru quixye laj Pablo. C'ajo' nak que'xucuac nak que'rabi nak laj Pablo ut laj Silas, a'aneb aj Roma. ³⁹ Nak que'cuulac, que'xk'unbesiheb ut que'xtz'ama chiruheb nak te'elk sa' li tenamit. ⁴⁰ Nak que'el sa' tz'alam laj Pablo ut laj Silas, coxe'ocak sa' rochoch lix Lidia. Nak ac xe'r'il ruheb laj pabanel, que'xq'ue xcacuilal xch'oleb ut que'coeb.

17

Lich'a'ajquilal que'xc'ul laj Pablo ut laj Silas nak cuanqueb Tesalónica

¹ Nak yoqueb chi xic laj Pablo ut laj Silas que'nume' Anfípolis ut Apolonia. Ut chirix a'an, que'cuulac Tesalónica bar cuan cui' jun li cab li

neque'xch'utub cui' ribeb laj judío. ² Laj Pablo qui-oc sa' li cab li neque'xch'utub cui' ribeb laj judío jo' c'aynak chixbanunquil. Oxib li hilobal cutan quixnumsi aran ut yo chixch'olobanquil chiruheb li xyalal li naxye sa' li Santil Hu. ³ Yo chixch'olobanquil chiruheb nak li Cristo quixc'ul nabal li raylal jo' tenebanbil sa' xben ut quicuacli cui'chic chi yo'yo sa' xyankeb li camenak. Quixye reheb: —Li Jesús li yoquin chixyebal ere, a'an li Cristo laj Colonel, chan. ⁴ Cuanqueb aj judío que'pában ut que'cana chirochbeninquil laj Pablo ut laj Silas. Jo'can ajcui' que'xbanu nabaleb laj griego li neque'xlok'oni li Dios. Ut nabaleb li ixs li na'noqueb ru que'pában. ⁵ Ut eb laj judío li inc'a' que'pában, c'ajo' nak que'josk'o' xban xcakaleb xch'ol. Que'ratina jun ch'utal li cuink inc'a' useb xna'leb li junes sa' be neque'cuan. Ut li jun ch'utal chi cuink a'an que'oc chixchik'bal xjosk'ileb li tenamit. Xban nak yoqueb xjosk'il, que'oc sa' rochoch laj Jasón chixsic'baleb laj Pablo ut laj Silas re te'xc'ameb chiruheb li tenamit. ⁶ Que'ril nak inc'a' que'xtau laj Pablo ut laj Silas. Que'xchap laj Jasón rochben cuib oxibeb laj pábanel ut que'xc'am chiruheb li neque'taklan sa' li tenamit. Japjoqueb re chixyebal: —Eb li cuink a'in, yoqueb chixpo'bal xch'oleb li tenamit sa' chixjunil li ruchich'och' ut anakcuan xe'chal arin chixpo'bal xch'oleb li katenamit. ⁷ Ut laj Jasón xc'uleb sa' rochoch. Yoqueb chixk'etbal lix chak'rab laj César li Acuabej. Yoqueb chixyebal nak cuan jun chic li rey, a'an li Jesús, chanqueb. ⁸ Li q'uila tenamit jo'queb ajcui' li neque'taklan sa' li tenamit que'sach xch'oleb chirabinquil li c'a'ru yoqueb

chixyebal eb a'an. ⁹ Eb li neque'taklan sa' li tenamit que'xye reheb laj Jasón ut li rochben nak tento te'xtoj riq'uin tumin li reliqueb. Ut nak ac xe'xc'ul li tumin, que'ach'abac laj Jasón ut eb li rochben.

Laj Pablo ut laj Silas que'xch'olob xyālal aran Berea

¹⁰ Sa' ajcui' li k'ojoyin a'an eb laj pābanel li cuanqueb aran que'risi laj Pablo ut laj Silas sa' li tenamit a'an ut que'xtaklaheb toj Berea. Nak que'cuulac aran, que'cōeb sa' li cab li neque'xch'utub cui' ribeb laj judío. ¹¹ Eb li cuanqueb aran Berea k'axal k'uneb xch'ol chiruheb li cuanqueb Tesalónica. Que'xc'ul chi sa sa' xch'oleb li rātin li Dios li yo chixyebal laj Pablo. Ut rajlal cutan que'xtzol sa' li Santil Hu re rilbal ma jo'can tana naxye. ¹² Nabaleb laj judío que'pāban sa' xyānkeb a'an. Cuanqueb ajcui' ixk aj griego xn̄inkaleb ru que'pāban. Ut que'pāban ajcui' nabaleb li cuink aj griego. ¹³ Que'rabi resil laj judío li cuanqueb Tesalónica nak laj Pablo yo chixjulticanquil li rātin li Dios aran Berea. Ut que'cōeb aran chixpo'bal xch'oleb li tenamit. ¹⁴ A'ut eb laj pābanel sa' junpat que'xtakla laj Pablo chire li palau re nak tāxic sa' jalan na'ajej. Aban laj Silas ut laj Timoteo toj que'cana Berea. ¹⁵ Eb li que'cōeb chi canabanc re laj Pablo, que'xc'am toj sa' li tenamit Atenas. Nak que'suk'i Berea, laj Pablo quixtakla resil chirixeb nak laj Silas ut laj Timoteo te'xic Atenas chi junpat.

Laj Pablo quixch'olob xyālal chiruheb li tzol-bileb li cuanqueb aran Atenas

16 Nak laj Pablo yo chiroybeninquileb laj Silas ut laj Timoteo sa' li tenamit Atenas, quixq'ue retal nak k'axal cui'chic nabaleb li yibambil Dios cuanqueb sa' li tenamit a'an. C'ajo' nak quiraho' sa' xch'ol. **17** Jo'can nak qui-oc chixch'olobanquil lix yalal chi tz'akal chiruheb li tenamit sa' li cab li neque'xch'utub cui' ribeb laj judío jo'queb ajcui' li macua'eb aj judío li que'xlok'oni li Dios. Ut rajlal cutan quixch'olob li xyalal chiruheb li cuanqueb sa' c'ayil. **18** Cuanqueb cuink aj epicúreos ut eb aj estoicos xc'aba'eb li neque'xc'oxla nak k'axal cuan xna'lebeb. Eb a'an que'oc chixcuech'inquil rix li c'a'ru yo chixyebal laj Pablo. Ut yoqueb chixyebal: —¿C'a'ru yo chixyebal li cuink a'an li junes atinac naxbañu? Ut cuan cui'chic yoqueb chi yehoc re: —Jo' li xchal anchal xyebal resil jalanił dios arin sa' katenamit, chanqueb. Que'xye chi jo'can xban nak laj Pablo yo chixch'olobanquil resil li colba-ib sa' xc'aba' li Jesucristo jo' ajcui' chirix lix cuaclijiqueb cui'chic li camenak chi yo'yo. **19** Jo'can nak que'xc'am laj Pablo sa' li na'ajej li neque'xch'utub cui' ribeb li k'axal cuanqueb xna'leb. Areópago xc'aba' li na'ajej a'an. Ut que'xye re: —¿Ma taruk taye ke c'a'ru xyalal li ac' tijleb a'in li yocat chixyebal? **20** Ma jun sut kabiom li na'leb a'in. Takaj takanau c'a'ru xyalal, chanqueb re. **21** Sa' eb li cutan a'an chixjunileb laj Atenas ut eb li jalaneb xtenamit li cuanqueb aran, mac'a' chic c'a'ak re ru neque'xc'oxla. Ca'aj chic rabinquil ut atinac chirix li ac' na'leb neque'xbañu. **22** Ut laj Pablo quixakli chiruheb li cuanqueb sa' li na'ajej a'an, ut quixye reheb: —Ex cuink aj Atenas, yoquin chixq'uebal retal nak nequepab

chixjunil li c'a'ak re ru. ²³ Nak yoquin chi bec sa' le tenamit xebinq'ue retal li c'a'ru nequelok'oni ut xintau ajcui' jun li artal tz'ib'anbil chiru "Re li Dios li Inc'a' Naubil Ru". Li Dios li nequelok'oni laex chi inc'a' nequenau ru, a'an ajcui' li yoquin chixch'olobanquil xyalal cheru. ²⁴ Ut a'an ajcui' li Dios, li quiyib'an re li ruchich'och' ut chixjunil li c'a'ak re ru cuan. A'an laj echal re li choxa ut li ruchich'och'. A'an inc'a' nacuan sa' junak cab yib'anbil xban cuink. ²⁵ Chi moco a' ta li cuink naq'uehoc c'a'ak re ru re a'an. A'an ban naq'uehoc ke li kayu'am ut a'an naq'uehoc li kamusik'. A'an li naq'uehoc chixjunil li c'a'ru cuan. ²⁶ Riq'uin jun chi cuink quixyo'obtesi chixjunileb li cristian li cuanqueb sa' ruchich'och'. Ut a'an yal re jo' najtil te'cuank li junjunk sa' ruchich'och'. Ut a'an ajcui' quiq'uehoc re lix na'ajeb li junjunk chi tenamit. ²⁷ Quixbañu chi jo'can re nak li junjunk te'xsic' li Dios ut mare te'xtau nak te'xsic'. Ut relic chi yal moco ch'a'aj ta xtaubal cui te'xsic' chi anchaleb xch'ol. ²⁸ A'an naq'uehoc kayu'am ut sa' xc'aba' a'an nak yo'yoco ut noco-ec'an. Jo' quixye jun laj bichanel sa' eyank: —Relic chi yal nak lao ralal xc'ajol li Dios, chan. ²⁹ Jo'can nak cui lao ralal xc'ajol li Dios, inc'a' naru takac'oxla nak li Dios chanchan ta li oro, malaj li plata chi moco li pec li yib'anbil yal riq'uin xc'a'ux ut xna'lebeb li cuink. ³⁰ Li Dios inc'a' quixq'ue sa' xbeneb li tenamit lix maqueb sa' eb li cutan nak inc'a' que'xtau ru li xyalal. Abanan anakcuán naxjultica chiruheb chixjunileb li tenamit nak te'xyot' xch'ol te'xjal xc'a'ux. ³¹ Li Dios ac xxakab jun li cutan re tarakok atin sa' xbeneb chixjunileb li cuanqueb

sa' ruchich'och'. Ut quixxakab li ani tarakok q̄tin sa' t̄iquilal. Quixc'ut chiku nak tz'akal yāl xban nak quixcuaclesi cui'chic chi yo'yo sa' xyānkeb li camenak, chan laj Pablo. ³² Nak eb li cuanqueb xna'leb que'rabi li yo chixyebal chirix lix cuaclijiqueb li camenak chi yo'yo, cuan que'se'en re ut cuan ajcui' que'yehoc re: —Takaj takabi cui'chic li c'a'ru yocat chixyebal sa' junak chic cutan, chanqueb. ³³ Ut chirix a'an, laj Pablo qui-el sa' xyānkeb. ³⁴ Cuanqueb ajcui' li que'xc'ul xch'ol li quixye laj Pablo ut que'xpāb li Jesūs. Sa' xyānkeb li que'pāban cuan laj Dionisio. A'an jun reh̄eb li que'taklan sa' li tenamit. Ut quipāban ajcui' jun li i xkxDámaris xc'aba'. Ut cuanqueb ajcui' cuib oxib chic que'pāban.

18

Eb laj pābanel li cuanqueb Corinto que'xtiquib xch'utubanquil ribeb chi lok'oninc

¹ Nak ac xc'ulman a'in, laj Pablo qui-el Atenas. Ut co Corinto. ² Ut aran quixtau jun li cuink aj judío. Aj Aquila xc'aba'. Ponto xtenamit. Inc'a' najter xc'ulunic Italia rochben lix Priscila li rix-akil. Que'el aran Roma xban nak laj Claudio li Acuabej quixye nak chixjunileb laj judío te'elk sa' li tenamit a'an. Laj Pablo co chirula'anquileb. ³ Ut quicana rochbeneb chi c'anjelac xban nak juntak'et li c'anjel neque'xbānu. Neque'yibān t'icr re muhebal. ⁴ Sa' li hilobāl cutan rajlal naxic laj Pablo sa' li cab li neque'xch'utub cui' ribeb laj Judío. Aran quiatinaq riq'uineb ut quixch'olob xyālal chiruheb laj judío jo'queb ajcui' li mācua'eb

aj judío. ⁵ Nak ac xe'suk'i chak laj Silas ut laj Timoteo Macedonia, laj Pablo quixk'axtesi rib chi junaj cuá chixch'olobanquil lix yáalal reheb laj judío nak li Jesúś, a'an li Cristo, laj Colonel li yechi'nbil xban li Dios. ⁶ Abanan eb a'an inc'a' que'cuulac chiru li yo chixyebal laj Pablo. Que'oc chi maje-cuānc. Jo'can nak laj Pablo quixchik'chik'i li rak' ut quixye reheb: —Cui lāex inc'a' texcolek', a' yal ere. Sa' eben lāex cuan li māc. Lain māc'a' inmāc xban nak ac xinye ere li xyāalal. Chalen anakcuán lāin tinch'olob xyāalal reheb li mācua'eb aj judío, chan. ⁷ Jo'can nak laj Pablo qui-el sa' xyankeb ut co chi cuānc sa' rochoch jun li cuink mācua' aj judío. Aj Justo xc'aba'. Li cuink a'an naxlok'oni li Dios. Li rochoch cuan chixc'atk li cab li neque'xch'utub cui' ribeb laj judío. ⁸ Laj Crispo, li nac'amoc be sa' li cab li neque'xch'utub cui' ribeb, quixpāb Li Kācua' rochbeneb li cuanqueb sa' li rochoch. Nabaleb aj Corinto que'pāban nak que'rabi resil li colba-ib. Ut que'cubsic xha'eb. ⁹ Sa' jun li k'ojoyin li Kācua' quixc'utbesi jun li visión chiru laj Pablo ut quixye re: —Matxucuac chi atinac. Ch'olob ban li xyāalal chiruheb li tenamit. ¹⁰ Lāin cuānkin ącuiq'un. Mā ani tabānunk raylal ącue xban nak nabaleb li cualal inc'ajol sa' li tenamit a'in, chan li Dios re laj Pablo sa' li visión. ¹¹ Jo'can nak laj Pablo quicana aran jun chihab riq'uin cuakib po ut yo chixch'olobanquil xyāalal li rātin li Dios chiruheb.

*Laj Galión li cuan chi taklānc aran Acaya quixye
nak laj Pablo māc'a' xmāc*

¹² Nak laj Galión cuānchi taklānc aran Acaya, eb laj judío que'xc'ub ru chi ribileb rib nak

te'xchap laj Pablo. Que'xchap ut que'xc'am sa' popol re nak t̄arakek' atin sa' xben. ¹³ Ut que'xye: —Li cuink a'in yo chixyebal reheb li tenamit chanru nak te'xlok'oni li Dios. Li na'leb li naxye a'an, moco naxc'uluban ta li chak'rab, li q'uebil ke xbaneb laj Roma, chanqueb. ¹⁴ Oc raj re chi atinac laj Pablo nak quichak'oc chak laj Galión ut quixye reheb laj judío: —Ex aj judío, cui ta xk'et xchak'rabeb laj Roma malaj ut cui ta cuan junak inc'a us xbañu, tento raj tinch'i ch'i'i cuib cherabinquil. ¹⁵ Abanan cui yal chirix atinac ut c'aba'ej ut chirix le chak'rab yoquex chi jitoc chirix, tento nak laex t̄esic' xyalal. Lain inc'a' nacuaj rakoc atin chirix li c'a'ak re ru a'in, chan. ¹⁶ Ut quirisiheb sa' li popol. ¹⁷ Eb laj griego que'xchap laj Sóstenes li nataklan sa' li cab li neque'xch'utub cui' ribeb laj judío. Que'xsac' ut que'xtacuasi chiru li popol ut laj Galión mac'a' quixye.

Laj Pablo quisuk'i cui'chic Antioquia ut co cui'chic rox sut chirula'aninquileb laj pabanel

¹⁸ A'ut laj Pablo toj quicana aran nabal cutan. Tojo'nak quixchak'rabiheb laj pabanel ut qui-el. Co chiru ha' toj Siria rochbeneb lix Priscila ut laj Aquila. Aran sa' li tenamit Cencrea quixbes li rismal. A'an retalil nak quixbañu li c'a'ru quixyechi'i re li Dios. ¹⁹ Nak que'cuulac Efeso laj Pablo quixcanabeb lix Priscila ut laj Aquila ut co sa' li cab li neque'xch'utub cui' ribeb laj judío chixch'olobanquil lix yalal chiruheb laj judío. ²⁰ Ut eb a'an que'xtz'ama chiru nak toj t̄acanak chic ca'ch'inak riq'uineb. Abanan laj Pablo inc'a'

quixsume canac. ²¹ Quixchak'rabiheb ban ut quixye reheb: —Tento nak tinxic chixnumsinquil li nink'e Jerusalén xban nak cuulac re xk'ehil. Lain tinchalk cui'chic eriq'uin cui jo'can naraj li Dios, chan. Ut qui-el aran Efeso. ²² Nak quicuulac Cesarea, co Jerusalén. Ut nak ac xq'ueheb xsahil xch'oleb laj pabanel, co Antioquia. ²³ Inc'a' najt quicuan aran nak co ut quinume' sa' eb li na'ajej Galacia ut Frigia ut yo chixq'uebal xcacuila xch'oleb laj pabanel.

Laj Apolos quixch'olob xyalal nak li Jesús, a'an li Cristo

²⁴ Quicuulac Efeso jun li cuink aj judío, aj Apolos xc'aba'. Alejandría xtenamit. K'axal naxnau atinac chi chabil ut naxnau chi us li tz'ibanol sa' li Santil Hu. ²⁵ Quixtzol rib chi us ut naxnau chanru xpabanquil li Kacula'. Ut quixq'ue xch'ol chi atinac chi tz'akal xch'olobanquil resil li Jesús, usta ca'aj cui' quixnau chirix li cubi ha' li quixbanu laj Juan. ²⁶ Qui-oc chi atinac chi cau xch'ol sa' li cab li neque'xch'utub cui' ribeb laj judío. Nak que'rabi lix Priscila ut laj Aquila li yo chixyebal, que'risi xjunes laj Apolos ut que'xch'olob li xyalal chi tz'akal chiru. ²⁷ Nak ac yo xc'oxlanquil xic laj Apolos aran Acaya, eb laj pabanel que'xq'ue xcacuila xch'ol re taxic. Ut que'xtziba jun li hu ut que'xtakla reheb laj pabanel li cuanqueb aran. Que'xye reheb nak te'xc'ul chi sa sa' xch'ol. Ut nak quicuulac aran, laj Apolos quixtenk'aheb chi chabil li ac xe'paban xban rusilal li Dios. ²⁸ Ut quiratinaheb laj judío chi cau xch'ol chiruheb chixjunileb li tenamit. Ut quixch'olob xyalal

chiruheb chi tz'akal nak li Jesús, a'an li Cristo, jo' tz'ibānbil sa' li Santil Hu.

19

Eb lix tzolom laj Juan que'xc'ul li Santil Musik'ej aran Efeso

¹ Nak laj Apolos cuan Corinto laj Pablo quinume' sa' eb li na'ajej toj quicuulac Efeso. Ut aran quixtauheb jun ch'utaleb laj pābanel. ² Quixye reheb: —¿Ma quec'ul li Santil Musik'ej nak quexpāban? chan laj Pablo reheb. Ut eb a'an que'xye: —Inc'a' nakanau nak cuan ta li Santil Musik'ej, chanqueb. ³ Ut laj Pablo quixye reheb: —¿Chanru nak quicubſic əha'? Eb a'an que'xye: —Li cubi ha' li xkac'ul, a'an li quixbānu laj Juan, chanqueb. ⁴ Laj Pablo quixye reheb: —Laj Juan quixcubsiheb xha' li que'xyot' xch'ol ut que'xjal xc'a'ux. Quixye reheb nak te'pabank sa' xc'aba' li Jesucristo li tol-elk mokon, chan. ⁵ Nak que'rabi a'an, que'xtz'ama li cubi ha' ut quicubſic xha'eb sa' xc'aba' li Kacua' Jesús. ⁶ Laj Pablo quixq'ue li ruk' sa' xbeneb ut que'xc'ul li Santil Musik'ej. Que'atínac sa' jalan atinobal ut que'xye resil li c'a'ru quic'utbesic chiruheb xban li Dios. ⁷ Cuanqueb tana cablaju chi cuink li que'pāban sa' xyānkeb.

Eb laj pābanel que'xtiquib xch'utubanquil ribeb chi lok'oninc aran Efeso

⁸ Chiru oxib po laj Pablo quixch'olob li xyātal chiruheb laj Efeso chi mac'a' xxiu sa' li cab li neque'xch'utub cui' ribeb laj judío. Quixyal xk'e xc'utbal chi tz'akal lix yātal lix nimajcual cuanquilal li Dios. ⁹ Cuanqueb li que'xcacuubresi

xch'oleb ut inc'a' que'raj pābanc. Que'oc chixmajecuanquil li evangelio chiruheb chixjunileb. Jo'can nak laj Pablo quixcanab xch'olobanquil li xyalal aran sa' li cab li neque'xch'utub cui' ribeb laj judío. Ut quixc'ameb laj pābanel chirix. Ra-jalal cutan quixc'ut li xyalal chiruheb sa' li cab li natzoloc cui' jun li cuink aj Tirano xc'aba'. ¹⁰ Cuib chihab quixbānu chi jo'ca'in. Ut chixjunileb li cuanqueb Asia, eb laj judío, jo'eb ajcui' li mācua'eb aj judío, que'rabi li rātin li Kācua' Jesús. ¹¹ Ut li Kācua' Dios quixq'ue xcuانquil laj Pablo chixbānunquil li sachba ch'olej. ¹² Usta ca'aj cui' lix t'icr ut lix sut laj Pablo neque'xq'ue sa' xbēneb li yaj, neque'q'uira. Ut neque'el li māus aj musik'ej riq'uineb. ¹³ Cuanqueb aj judío neque'xye nak neque'xnau risinquileb li māus aj musik'ej ut neque'xbeni ribeb chixbānunquil. Que'xyal xpatz'bal xc'aba' li Kācua' Jesús sa' xbēneb li cuan māus aj musik'ej riq'uineb ut que'xye: —Sa' xc'aba' li Jesús li naxjultica laj Pablo, tinye ere elenkex riq'uin li cuink a'an, chanqueb. ¹⁴ Cuukubeb chi cuink li yoqueb chi bānunc re a'in. Ralaleb jun li cuink aj judío, aj Esceva xc'aba'. A'an li xbēnil aj tij. ¹⁵ Sa' jun li cutan jun li māus aj musik'ej quichak'oc ut quixye reheb: —Ninnau ani li Jesús, ut ninnau ajcui' ani laj Pablo. Ut lāex, ḥānihex? Ut ḥāni xq'uehoc ecuanquil chi isinc māus aj musik'ej? chan reheb. ¹⁶ Li cuink li cuan māus aj musik'ej riq'uin, quixcut rib sa' xbēneb. A'an k'axal cui'chic cau rib chiruheb. Tacuasinbileb ut pejeleb chic li rak'eb nak que'elelic sa' li cab a'an. ¹⁷ Chixjunileb li cuanqueb Efeso que'rabi resil li c'a'ru quic'ulman, jo' aj judío jo' eb ajcui'

li mäcua'eb aj judío. Quichal xxiuheb chixjunileb ut k'axal cui'chic que'xq'ue xlok'al li Käcua' Jesú. **18** Ut nabaleb li que'päban que'chal ut que'xxoto lix mäqueb chiru li Dios chiruheb chixjunileb li cuanqueb aran. **19** Nabaleb laj tul que'chal ut que'xc'am chak lix huheb li nac'anjelac chiruheb re tulac ut que'xc'at chiruheb chixjunileb li tenamit. Nak que'xbir rix lix tz'ak chixjunil li que'xc'at, qui-el lajéb roxc'al mil (50,000) chi tumin plata. **20** Ut li rätin li Käcua' yo chi elc resil yalak bar ut yo ajcui' chi c'utunc xcuanguil li Dios. **21** Nak ac xnume' chixjunil a'in, laj Pablo quixc'oxla xic toj Jerusalén, nak acak xbeni chak Macedonia ut Acaya. Quixye: —Nak acak xinnume' aran, tento ajcui' tinxic Roma chiribaleb laj pabanel li cuanqueb aran, chan. **22** Jo'can nak quixtaklaheb Macedonia laj Timoteo ut laj Erasto, li neque'tenk'an re. Ut laj Pablo toj quicana aran Asia.

Laj tenol ch'ich' xic' que'rabi li c'a'ru quixye laj Pablo

23 Ut sa' eb li cutan a'an quiticla jun nimla ch'a'ajquilal xban nak nabaleb yoqueb chixpäbanquil li Dios. **24** Jun li cuink aj tenol plata, aj Demetrio xc'aba'. A'an naxyib riq'un plata li coc' ochoch re lix Diana lix dioseb. Ut nabal li tumin neque'xc'ul li neque'trabajic rochben. **25** Quixch'utubeb chixjunileb li neque'c'anjelac chiru jo'queb ajcui' chixjunileb laj tenol plata ut quixye reheb: —Laex nequenau nak riq'un li c'anjal a'in nakabänu, nakac'ul nabal li katumin. **26** Ac erabiom resil nak laj Pablo ac xtacchi'i nabaleb li cuanqueb aran Efeso jo' ajcui' sa'

chixjunil li tenamit xcuent Asia. Ac nequenau nak yo chixyebal reheb nak moco dioseb ta li yal yibanbil xban cuink. ²⁷ Mare anchal tasachk li kac'anjel xban a'an. Ut mare anchal tatz'ektanak

ajcui' xlok'al li rochoch lix Diana li kalok'laj dios. Mare tasachk lix cuanquilal li kadios li neque'xlok'oni chixjunileb aran Asia, jo' ajcui' li cuanqueb sa' chixjunil li ruchich'och', chan laj Demetrio. ²⁸ Ut eb li ch'utch'uqueb aran c'ajo' nak que'josk'o' nak que'rabi li c'a'ru quixye. Que'xjap reheb chixyebal: —¡Nim xcuanquil lix Diana li kadios lao aj Efeso! chanqueb. ²⁹ C'ajo' nak que'josk'o' li tenamit. Inc'a' chic jultiqueb re c'a'ru neque'xbanu. Jun xiquiqueb nak coeb chixsic'bal laj Gayo ut laj Aristarco li que'chal chak Macedonia rochben laj Pablo. Ut quelonbileb nak que'c'ame' toj sa' li na'ajej li neque'xch'utub cui' ribeb. ³⁰ Ut laj Pablo quiraj raj xic chi atinac riq'uineb li tenamit, abanan eb laj pabanel inc'a' que'xcanab chi xic. ³¹ Cuanqueb cuib oxib li ramig laj Pablo li neque'c'amoc be sa' li tenamit. A'aneb aj Roma. Eb a'an que'xtakla xyebal re laj Pablo nak inc'a' taxic sa' li na'ajej li neque'xch'utub cui' ribeb li tenamit. ³² Chixjunileb li que'xch'utub ribeb aran yoqueb chixjapbal reheb ut inc'a' chic jultiqueb re li c'a'ru neque'xye. Lix q'uialeb li tenamit inc'a' que'xnau c'a'ut nak que'xch'utub ribeb aran. ³³ Ut que'risi sa' xyankeb li tenamit laj Alejandro. A'an quixtaksi li ruk' re te'xcanab chokinc. Quiraj raj atinac re xcolbal rib chiruheb li tenamit. ³⁴ Nak que'ril nak a'an aj judío junaj xyab xcuxeb chixjunileb chixyebal: —

¡Nim xcuanquil lix Diana li kadios ləo aj Efeso! chanqueb. Ut ca'ch'in chic mə cuib or que'xjap reheb chixyebal a'an. ³⁵ Nak ac xk'unbesiheb li tenamit laj tz'ib li nac'anjelac sa' popol, quixye reheb: —Laex aj Efeso, ¿ma cuan ta bi' junak inc'a' naxnau nak li katenamit Efeso, a'an li nac'ac'alen re li rochoch lix Diana, li kalok'laj dios? Chixjunileb neque'xnau nak li jalām unction a'an chalenak chak sa' choxa. ³⁶ Li kadios inc'a' taruk xsachbal ru. Jo'can nak meq'ue ejosk'il. C'oxlahomak rix chi us li c'a'ru tebanu. ³⁷ ¿C'a'ut nak xec'ameb chak li cuink a'in arin? Eb a'an inc'a' yoqueb chixmuxbal ru le dios, chi moco yoqueb ta chixmajecuanquil. ³⁸ Cui ut laj Demetrio ut eb laj tenol ch'ich' li neque'c'anjelac riq'uin cuan junak ani te'xjit, teto li popol ut cuanqueb aj rakol atin. Te'jitok aran re nak taruk tayibak ru lix ch'a'ajquilateb. ³⁹ Cui ut teraj xc'ubanquil junak c'a'ak re ru, takach'utub kib ut sa' xyalal takac'ub ru. ⁴⁰ Anakcuán xiu xiu cuanco. Cui nocoe'xjit riq'uin li mululij ib yoco, ut cui eb laj Roma li neque'taklan sa' kabən te'xpatz' ke c'a'ut nak yoco chixmululinquil kib, məc'a' naru takacol cui' kib, chan. ⁴¹ Ut nak quirake' chixyebal a'in, quixchak'rabiheb li tenamit.

20

Laj Pablo co Macedonia ut Grecia

¹ Ut nak ac xnume' li mululij ib, laj Pablo quixbokeb laj pabanel riq'uin. Quixq'ueheb xna'leb, quixk'aluheb, quixchak'rabiheb ut co Macedonia. ² Nak ac xrula'aniheb li cuanqueb sa' li na'ajej Macedonia, ut nak ac xq'ueheb xna'leb

chi chabil, co aran Grecia. ³ Oxib po quicuan aran Grecia ut xic raj re Siria chiru ha' nak quirabi resil nak eb laj judío te'xram sa' xbe. Jo'can nak co cui'chic Macedonia. ⁴ Qui-ochbenic toj Asia xbaneb laj Sópater li ralal laj Pirro, Berea xtenamit; laj Aristarco ut laj Segundo, Tesalónica xtenamiteb; ut laj Gayo, Derbe xtenamit; rochbeneb laj Timoteo, laj Tíquico ut laj Trófimo, Asia xtenamiteb. ⁵ Eb a'an coeb chi ubej ut aran Troas coe'roybeni. ⁶ Lao toj kanumsi li nink'e nak nacua'e' li caxlan cua mac'a' xch'amal. Chirix a'an coo aran Filipos chiru ha'. Nak ac xnume' ob cutan coxe'katau aran Troas, ut cocana cuukub cutan aran. ⁷ Ut sa' xbén li cutan re li xaman, ch'utch'ubqueb laj pabanel chi cua'ac sa' comonil. Laj Pablo yo chixtzolbaleb. Ac cuulajak naxic. Tuktu k'ojojin toj yo chi atinac. ⁸ Cuanqueb nabal li xam lochloqueb sa' li na'ajej bar ch'utch'uco cui' toj sa' xbén li cab. ⁹ Jun li saj al, aj Eutico xc'aba', c'ojc'o sa' li ventana. Xban nak quinajto' k'ojojin laj Pablo chi atinac, quicube xcuara laj Eutico, ut quit'ane' chak sa' rox tasal li cab. Toj tak'a quinak. Ut camenak chic nak que'xcuaclesi. ¹⁰ Laj Pablo quicube tak'a, quixc'utzub rib sa' xbén li al, quixk'alu ut quixye reheb: —Meq'ue ec'a'ux. Yo'yo, chan. ¹¹ Quitake' cui'chic, quixjachi li caxlan cua, ut que'cua'ac. Ut qui-oc cui'chic chi atinac. Ac xsakeu chic nak quixcanab atinac. Chirix a'an qui-el sa' xyankeb ut co. ¹² Ut li al yo'yo nak que'xc'am. Ut c'ajo' nak quisaho' sa' xch'oleb. ¹³ Lao coo toj Asón chiru ha' chixc'ulbal laj Pablo. A'an co chi ch'och'el xban nak jo'can quiraj. ¹⁴ Nak cocuulac Asón kanume'c'am laj

Pablo ut coo Mitilene. ¹⁵ Sa' xcab li cutan coo chiru ha' ut cocuulac sa' xca'yabal Quío. Jo' cuulajak chic co-el aran ut cocuulac aran Samos. Ut coxohilank sa' li tenamit Trogilio. Toj sa' li cutan jun chic cocuulac Mileto. ¹⁶ Laj Pablo ac cuan sa' xch'ol nak inc'a'tanumek' Efeso re nak inc'a'tabayk Asia. Yo chixsebanquil rib xban nak t̄araj cuanc sa' li nink'e Pentecostés aran Jerusalén.

Laj Pablo quixchak'rabiheb li neque'c'amoc be sa' xyānkeb laj pabanel aran Efeso

¹⁷ Nak toj cuan Mileto quixtakla chak xbokbaleb li neque'c'amoc be sa' xyānkeb laj pabanel aran Efeso re te'xic riq'uin. ¹⁸ Ut nak que'cuulac riq'uin aran Mileto, quixye reheb: —Laex nequenau nak chalen cuoquic Asia sa' xyālal cuanquin sa' eyānk. ¹⁹ Nak yoquin chi c'anjelac chiru li Kacua' quincubsi incuanquil ut quinyābac xban li raylal ut li yalec' li quichal sa' inben xbaneb laj judío. ²⁰ Lain xinch'olob chi tz'akal li xyālal cheru. Mac'a' ximuk cheru. Quinch'olob ban xyālal chiruheb li tenamit jo' ajcui' sa' eb li cab. ²¹ Yoquin chixjulticanquil chiruheb laj judío ut chiruheb li macua'eb aj judío, nak te'xyot' xch'ol ut te'xjal xc'a'ux chiru li Dios ut te'pabank sa' xc'aba' li Kacua' Jesucristo. ²² Anakcuán tenebanbil sa' inben xban li Santil Musik'ej xic Jerusalén. Ut inc'a' ninnau c'a'ru tinc'ul aran. ²³ Ca'aj cui' ninnau nak li Santil Musik'ej quixc'ut chicuu nak sa' li junjunk chi tenamit tinnumek' cui', tinc'ul raylal ut tine'xq'ue sa' tz'alam. ²⁴ Abanan lain mac'a' ninxucua, chi moco ninra lin yu'am chok' cue injunes. Abanan nacuaj nak tinchoy lin c'anjel chi sa sa' inch'ol.

Ut ninnau nak taklanbilin xban li Kacula' Jesús chixyebal resil li evangelio li quixq'ue li Dios xban li rusilal. ²⁵ Lain xinch'olob chak xyalal lix nimajcual cuanquinal li Dios sa' eyank læx. Ut ninnau ajcui' nak ma jun chic ere læx tajlok cuu. ²⁶ Jo'can nak anakcuan lain ninye ere nak lain mac'a' inmac cui læx inc'a' texcolek', ²⁷ xban nak ac xinch'olob chi tz'akal re ru li na'leb li taklanbilin cui' xban li Dios. ²⁸ Jo'can nak ilomak erib chi us læx ut ilomakeb laj pabanel li xe'q'uehe' cheril xban li Santil Musik'ej, li quixlok'eb riq'unin lix lok'laj quiq'uel. Cherilak laj pabanel jo' nak naril chi us lix carner li pastor. ²⁹ Lain ninnau nak tinelk sa' eyank, chanchanakeb laj xoj nak te'chalk li jalaneb xna'leb chixpo'bal ru le pabal. Eb a'an inc'a' te'ril xtok'obal eru. ³⁰ Ut sa' eyank ajcui' læx cuankeb li te'oc chixyebal c'a'ak re ru inc'a' yal re xk'unbesinquileb laj pabanel re te'xic chirixeb. ³¹ Yo'on cuankex ut chijulticok' ere nak chiru oxib chihab, chi k'ek chi cutan yoquin chi yabac ut inc'a' xinhilan chixch'olobanquil ena'leb chejunjunkal. ³² Anakcuan ut ex herman, texink'axtesi sa' ruk' li Dios ut li ratin li quixq'ue chak ere xban lix rahom chitenk'ank ere chi q'uic sa' le pabal. Ut a'an ajcui' taq'uehok ena'aj sa' xyankeb li sic'bileb ru xban li Dios. ³³ Laex nequenau nak lain inc'a' xinrahi ru lix tumin jalan, chi moco lix biomal, chi moco li rak'eb. ³⁴ Ut nequenau ajcui' nak lain xinc'anjelac riq'unin cuuk' re xsic'bal li c'a'ru cue jo' ajcui' li c'a'ru rebeb li cuanqueb cuochben. ³⁵ Riq'unin chixjunil li xinbanu, xinc'ut cheru chanru xtenk'anquileb li te'raj tenk'ac. Chijulticok' ke li quixye li Kacula'

Jesús: K'axal us li q'uehoc chiru li c'uluc, chan.
 36 Ut nak quirake' chixyebal chixjunil a'in, laj Pablo quixcuik'ib rib ut qui-oc chi tijoc rochbeneb chixjunileb. 37 C'ajo' nak que'yabac chixjunileb. Que'xk'alu laj Pablo ut que'rutz' ru. 38 C'ajo' xrahil que'rec'a nak que'rabi li ątin li quixye laj Pablo nak inc'a' chic te'ril ru. Ut nak co, coxe'xcanab chak chire li palau cuan cui' li jucub.

21

Eb laj pabanel que'xye re laj Pablo nak inc'a' raj taxic Jerusalén

1 Nak coe'xcanab laj pabanel chire ha', co-oc sa' li jucub ut coo toj Cos. Ut sa' xcab li cutan cocuulac Rodas. Chirix chic a'an, cocuulac Pátara. 2 Aran quikatau jun li jucub xic re Fenicia. Co-oc chi sa' ut coo. 3 Nak yoco chi xic Siria conume' sa' xjayal li tenamit Chipre, li nacana sa' katz'e. Chirix chic a'an cocuulac Tiro ut aran quicanaban ik li jucub. 4 Aran katauheb cuib oxib laj pabanel ut cocana cuukub cutan riq'uineb. Ut eb laj pabanel que'xye re laj Pablo nak quic'ute' chiruheb xban li Santil Musik'ej nak inc'a' taxic Jerusalén. 5 Nak ac xnume' li cuukub cutan, co-el sa' li tenamit Tiro ut coo. Ut que'coeb laj pabanel chikacana-banquil rochbeneb li rixakil ut lix coc'aleb. Nak cocuulac chire li palau, cocuik'la ut co-oc chi tijoc. 6 Nak corake' chi tijoc, quikachak'rabiheb ut coo sa' li jucub. Ut eb a'an que'suk'i cui'chic sa' li rochocheb. 7 Nak cocuulac Tiro corake' chi bęc chiru ha' ut coo sa' li tenamit Tolemaida. Quikaq'ue xsahil xch'oleb laj pabanel li cuanqueb aran ut cocana jun cutan riq'uineb. 8 Jo' cuulajak chic

coo Cesarea. Nak cocuulac aran, coo sa' rochoch laj Felipe laj yehol resil li colba-ib. A'an jun reheb li cuukub li que'siq'ue' ruheb Jerusalén re te'xtenk'aheb li apóstol. ⁹ A'an cuan cahib xrabin toj tuk' ixeb. Eb li xka'al a'an neque'yehoc rātin profeta. ¹⁰ Ac cuan cutan kacuulajic aran Cesarea nak quicuulac jun profeta quichal chak Judea, aj Agabo xc'aba'. ¹¹ Li cuink a'an quicuulac chikilbal. Quixchap lix c'amal xsa' laj Pablo. Quixbac' li ruk' ut li rok riq'uin. —Jo'ca'in xc'ut chicuu li Santil Musik'ej, chan. —Laj echal re li c'amal sa' a'in tabaq'uek' li ruk' ut li rok xbaneb laj judío aran Jerusalén ut taq'axtesik sa' ruk'eb li mācua'eb aj judío, chan. ¹² Nak quikabi li c'a'ru quixye, lāo ut eb li cuanqueb aran quikatz'ama chiru laj Pablo nak inc'a' taxic Jerusalén. ¹³ Abanan laj Pablo quichak'oc ut quixye ke: —¿C'a'ut nak yoquex chi yabac ut chixq'uebal xrahil inch'ol? Lāin cau inch'ol, moco ca'aj cui' ta re tinbaq'uek'. Re aj ban cui' nak tincamsik aran Jerusalén sa' xc'aba' li Kacua' Jesús, chan. ¹⁴ Lāo inc'a' coru chixjalbal ru lix c'a'ux laj Pablo. Jo'can nak māc'a' chic kaye re. Chi-uxk ta jo' naraj li Kacua', chanco.

*Laj Pablo co Jerusalén chiribal laj Jacobo li
nac'amoc be chiruheb laj pabanel*

¹⁵ Chirix chic a'an quikacauresi kib ut coo Jerusalén. ¹⁶ Cuanqueb aj pabanel aj Cesarea coeb chikix. Quikac'ameb sa' li rochoch laj Mnasón Chipre xtenamit. Ac najter aj pabanel. Ut aran cohilan. ¹⁷ Nak cocuulac Jerusalén, eb laj pabanel coe'xc'ul chi saheb sa' xch'ol. ¹⁸ Jo' cuulajak chic laj Pablo co chiribal laj Jacobo ut lāo coo chirix. Ac

ch'utch'uqueb aran chixjunileb li neque'c'amoc be sa' xyānkeb laj pābanel. ¹⁹ Ut nak ac xq'ueheb xsahil xch'ol, laj Pablo quixserak'i reheb chixjunil li quixbānu li Dios sa' xyānkeb li mācua'eb aj judío nak yo chi c'anjelac sa' xyānkeb. ²⁰ Nak que'rabi a'in que'xbantioxi chiru li Dios. Ut que'xye re laj Pablo: —Lāat nacacuil, at herman, jarub mil eb laj judío ac xe'pāban. Ut chixjunileb a'an neque'xq'ue xch'ol chixbānunquil li naxye li chak'rab. ²¹ Ac xe'rabi resil nak lāat yocat chixc'utbal chiruheb laj judío, li cuanqueb sa' xyānkeb li mācua'eb aj judío, nak inc'a' te'xbānu li circuncisión reheb li ralal xc'ajol, chi moco te'xbānu li c'a'ru c'aynakeb xbānunquil laj judío. ²² ¿C'a'ru takabānu? Anakcuán te'rabi resil nak lāat cuancat arin. ²³ Bānu li c'a'ru yōco chixyebal ącue. Cuanqueb cahib chi cuink sa' kayānk te'rakek' xbānunquil li c'a'ru que'xyechi'i chiru li Dios. ²⁴ C'ameb li cuink a'in chācuix. Ącuochbenakeb nak tābanu li c'a'ru tento xbānunquil xban nak ac xe'rake' xbānunquil li c'a'ru que'xyechi'i chiru li Dios. Tach'ajobresi ącuib lāat ut taq'ue chi besec' li rismaleb ut tātoj lix besbaleb. Chi jo'can te'xq'ue retal nak moco yal ta li yoqueb chixyebal chācuix. Bānu chi jo'can re nak te'xnau nak inc'a' yocat chixk'etbal li chak'rab. ²⁵ Ac xotz'ibac riq'uineb li que'pāban sa' xyānkeb li mācua'eb aj judío. Ac xkatakla xyebal reheb nak inc'a' tento te'xbānu li circuncisión. Li c'a'ru tento te'xbānu, a'an a'in: inc'a' naru te'xtzaca li tzacaemk mayejanbil chiruheb li yibānbil dios, chi moco te'xtzaca li quic', chi moco te'xtiu xtibel li yatz'bil xul. Ut inc'a' te'co'bētak te'yumbētak, chanqueb re laj

Pablo. ²⁶ Cuulajak chic laj Pablo quixc'ameb li cahib chi cuink chirix. Ut quixch'ajobresi rib rochbeneb nak qui-oc sa' li templo chixyebal re-heb c'a'ru cutanquil te'xq'ue lix mayej li junjunk re nak tatz'aklok ru li xch'ajobresinquil ribeb li que'xbanu.

Laj Pablo quichape' sa' li templo xbaneb laj c'anol be sa' xyankeb laj Judío

²⁷ Nak ac numec' re li cuukub cutan, cuanqueb laj judío que'chal chak Asia. Nak que'ril laj Pablo sa' li templo, que'josk'o' ut que'xtiquib jun li ch'a'ajquibal sa' li tenamit ut que'xchap laj Pablo. ²⁸ Japjoqueb re chixyebal: —Ex aj Israel, choetenk'a. A'an a'in li cuink li napo'oc xna'lebeb li tenamit yalak bar chixtz'ektanquil li katena-mit, jo' ajcui' li chak'rab li quixq'ue ke laj Moisés. Ut naxtz'ektana li templo a'in. Jo' cui' anchal xrocsiheb li macua'eb aj judío sa' li templo ut riq'uin a'an, xmux ru li Santil Na'ajej, chanqueb. ²⁹ Que'xye a'an xban nak que'ril ru laj Trófimo aj Efeso chirochbeninquil sa' li tenamit. Sa' xch'oleb a'an nak laj Pablo qui-ocsin re laj Trófimo sa' li templo. ³⁰ Jo'can nak k'axal cui'chic quichal xjosk'ileb li tenamit. Japjoqueb re nak que'xchap laj Pablo ut quelonbil que'xbanu re, nak que'risi sa' li templo. Ut que'xtz'ap li oquebal chi junpat.

Eb laj Roma que'xcol laj Pablo chiruheb laj judío

³¹ Oqueb raj re chixcamsinquel nak quiyehe' chak re li coronel nak chixjunil li tenamit Jerusalén yoqueb chixmululinquel ribeb xbaneb xjosk'il. ³² Ut li coronel quixc'ameb nabal li soldado chirix jo' ajcui' li cuanqueb xcuanquil

sa' xbeneb li soldado, ut coeb sa' anil bar ch'utch'ueqb cui' li tenamit. Nak li tenamit que'r'il li coronel rochbeneb chak li soldado, que'xcanab xtacuasinquil laj Pablo. ³³ Ut li coronel quixchap laj Pablo. Quixtakla xbac'bal riq'uin cuib chi cadena. Ut quixpatz' ani a'an ut c'a'ru xmāc. ³⁴ Ut li tenamit jalan jalānk yoqueb chixyebal ut inc'a' nach'ola ru li c'a'ru yoqueb chixyebal. Li coronel quiril nak inc'a' quixtau c'a'ru tz'akal xmāc. Quixtakla xcanabanquil laj Pablo sa' li cuartel. ³⁵ Nak que'cuulac cuan cui' li gradas, pakpo nak quic'ame' xbaneb li soldado xban nak li tenamit yoqueb xjosk'il sa' xben ut inc'a' neque'xcanab chi numec'. ³⁶ Li q'uila tenamit yoqueb chi xic chirixeb ut japjoqueb re chixyebal: —¡Camsihomak li cuink a'an! chanqueb.

Laj Pablo quiatinac re xcolbal rib

³⁷ Nak ac oqueb re chirocsinquel sa' li cuartel laj Pablo, quixye re li coronel: —¿Ma tāruk tatcuatina junpatak?— Ut li coronel quixye: — Nacanau pe' atinac sa' li atinobal griego. ³⁸ ¿Ma mācua' laat li cuink laj Egipto li quitiquiban jun ch'a'ajquīlal inc'a' mas najter? ¿Ma mācua' laat catc'amoc reheb li cahib mil chi cuink aj camsinel sa' li chaki ch'och? chan. ³⁹ Quichak'oc laj Pablo ut quixye: —Inc'a'. Lajin aj judío. Yo'lajenakin sa' li tenamit Tarso li cuan xcuent Cilicia. Na'no ru lin tenamit. Tintz'ama chācuu nak tinacanab chirātinanquileb li tenamit, chan. ⁴⁰ Ut nak quiq'uehe' xlesens chi atinac xban li coronel, laj Pablo quixakli sa' li gradas. Quixtaksi li ruk' re nak te'xcanab chokinc. Ut nak que'xcanab chokinc, laj

Pablo qui-oc chi ątinac sa' rątinobaleb laj judío ut quixye reheb:

22

¹ Ex cuas cuitz'in, ut läex li nequexc'amoc be sa' xyānkeb laj judío. Abihomak li tinye ere anakcuan re xcolbal cuib, chan. ² Que'rabi nak yo chirātinanquileb sa' rątinobaleb. Que'xcanab chokinc ut que'rabi li c'a'ru quixye. Ut laj Pablo qui-oc chi ątinac. ³ —Relic chi yal nak lain aj judío. Yo'lajenakin Tarso xcuént Cilicia. Ut arin quinq'ui Jerusalén. Quintzol cuib riq'uin laj Gamaliel chirix li chak'rab li quiq'uehe' chak reheb li kaxe'tonil yucua'. Chi anchal inch'ol ninq'ue xlok'al li Dios jo' yoquex läex anakcuan. ⁴ Xic' neque'cuil li neque'pəban re li aq'uil na'leb a'in toj retal quinq'ueheb chi camsic. Quinchapeb ut quinq'ueheb sa' tz'alam, jo' cuink jo' ixf. ⁵ Li xbenil aj tij, jo' ajcui' eb li neque'taklan sa' xyānkeb laj judío, neque'xnau nak tz'akal yal li yoquin chixyebal. Eb a'an que'xq'ue jun li hu cue retalil nak que'xq'ue inlesens chixchappaleb laj pabanel li cuanqueb Damasco, ut tinc'ameb chak chi prexil arin Jerusalén re te'rahobtesik.

Laj Pablo quixserak'i reheb chanru nak quipqaban

⁶ Abanan nak ac cuulac cue Damasco, ca'ch'in na chic mä cua'leb, mäc'a' sa' inch'ol nak quinixsut jun li chanchan xam k'axal saken quichal chak sa' choxa. ⁷ Quint'ane' chi ch'och' ut quicuabi jun xyäb cxux quixye cue, "At Saulo, at Saulo, ¿c'a'ut nak yocat chinrahobtesinquil?" chan cue. ⁸ Lain

quinchak'oc ut quinye, “¿Anihat laat, Kacua?” chanquin. Ut a'an quixye cue, “Lain li Jesús laj Nazaret li yocat chixrahobtesinquil,” chan cue. ⁹ Li cuanqueb cuochben que'r'il chi tz'akal li chanchan xam ut c'ajo' nak que'xucuac. Abanan inc'a' que'rabi li atin li quiyeh'e cue. ¹⁰ Quinpatz' re, “Kacua', ¿c'a'ru tacuaj tinbānu?” Ut li Kacua' quixye cue, “Cuaclin. Ayu Damasco ut aran tayehek' acue chixjunil li c'a'ru tenebanbil sa' aben re tabānu,” chan. ¹¹ Ut lain inc'a' chic niniloc xban nak k'axal nalementz'un li chanchan xam. Chilonbilin aj chic xbaneb li cuanqueb cuochben nak coín toj Damasco. ¹² Jun li cuink aj Ananías xc'aba' quicuulac chicuilbal. Naxbānu jo' naxye li chak'rab li quiq'uehe' re laj Moisés. Chabil neque'xye chirix li cuink a'an chixjunileb laj judío li cuanqueb aran. ¹³ Nak quicuulac cuanquin cui', quixakli chinc'atk ut quixye cue, “At hermano Saúl, chat-ilok cui'chic,” chan cue. Ut sa' ajcui' li honal a'an qui-ilok cui'chic li xnak' cuu ut quicuil ru laj Ananías. ¹⁴ Ut quixye cui'chic cue, “Li Dios li que'xlok'oni chak lì kaxe'tonil yucua', a'an quisic'oc chak acuu re nak tānau ut tabānu li c'a'ru naraj a'an. A'an naraj nak tacuilo ru li jun li Tic Xch'ol ut tacuabi li c'a'ru tixye acue. ¹⁵ Laat taye reheb chixjunileb li c'a'ru xacuabi ut li c'a'ru xacuilo. ¹⁶ ¿C'a'ut nak nacabay acuib? Cuaclin. Li Dios tixcuy tixsach la mac nak tayaaba lix c'aba'. Ut c'ul li cubi ha',” chan cue. ¹⁷ Chirix chic a'an, quinsuk'i cui'chic Jerusalén. Nak yoquin chi tijoc sa' li templo, quic'utbesic chicuu jun li visión. ¹⁸ Ut quicuil li Kacua' nak quixye cue, “Seba acuib. Elen chi junpat arin Jerusalén xban nak arin Jerusalén

inc'a' te'raj rabinquil li xyālal li tāch'olob chiruheb chicuix laín," chan cue. ¹⁹ Laín quinye re, "At Kācua', chixjunileb neque'xnau nak laín coín sa' li junjunk chi cab li neque'xch'utub cui' ribeb laj judío chixchapbaleb laj pābanel re nak te'q'uehek' sa' tz'alam ut te'saq'uek'. ²⁰ Nak que'xcamsi laj Esteban li quich'oloban li xyālal chācuix, laín cuanquin ajcui' aran. Yoquin chirilbal ut quisaho' inch'ol riq'uin lix camic. Ut laín ajcui' quin-iloc re li rak'eb li que'camsin re," chanquin re. ²¹ Ut li Kācua' quixye cue, "Ayu xban nak laín tatintakla chi najt sa' xyānkeb li mācua'eb aj judío," chan cue, chan laj Pablo. ²² Ut nak li tenamit que'rabi nak tāxic riq'uineb li mācua'eb aj judío, c'ajo' nak que'po'. Inc'a' chic que'xcuy rabinquil xban nak yo xjosk'ileb. Ut japjoqueb reheb chixyebal: — Camsihomak li cuink a'in. Inc'a' us nak yo'yok, chanqueb. ²³ Yoqueb chixjapbal reheb ut yoqueb chixk'ichbal li rak' ut yoqueb chixcutbal li poks sa' ik' xban xjosk'ileb. ²⁴ Ut li coronel quixtaklaheb li soldado re te'xc'am sa' cuartel laj Pablo. Quixye reheb nak te'xsac' re nak tixye xyālal c'a'ut nak japjoqueb reheb li tenamit chixyebal chi jo'can. ²⁵ Nak ac xe'xbac', laj Pablo quixye re li capitán li cuan aran: —¿C'a'ru naxye li chak'rab? ¿Ma naru xsac'bal junak cuink aj Roma chi toj maji' rakbil atin sa' xbén? chan. ²⁶ Quisach xch'ol li capitán nak quirabi li c'a'ru quixye laj Pablo. Co sa' anil ut quixye re li coronel: —¿C'a'ru tābanu riq'uin li cuink a'in? A'an tz'akal aj Roma, chan. ²⁷ Ut quichal li coronel ut quixye re laj Pablo: —Ye cue li xyālal. ¿Ma laat aj Roma?— Ut laj Pablo quixye

re: —Lain.— ²⁸ Quichak'oc li coronel ut quixye: — Lain nabal li tumin xinq'ue re nak tinc'ulek' chok' aj Roma, chan. Ut laj Pablo quixye re: —A'ut lain chalen chak sa' inyo'lajic, lain ajcui' chak aj Roma, chan. ²⁹ Jo'can nak que'xcanab laj Pablo xjunes. Inc'a' chic que'xrahobtesi. Jo'can ajcui' li coronel. Qui-oc xxiu nak quixnau nak laj Pablo a'an tz'akal aj Roma xban nak que'xbac' riq'uin cadena.

Laj Pablo quic'ame' chiruheb li neque'taklan sa' xbeneb laj judío

³⁰ Jo' cuulajak chic li coronel quixtakla xhitbal lix bac'bal laj Pablo. Ut quixtakla xbokbaleb lix bénil aj tij ut eb li neque'taklan sa' xbeneb laj Judío ut quixxakab laj Pablo chiruheb. Quiraj xtaubal xyalal chi tz'akal c'a'ru xmäc laj Pablo nak yo xjibal xbaneb laj judío.

23

¹ Laj Pablo quixca'yaheb li neque'taklan sa' xbeneb laj judío ut quixye reheb: —Ex cuech tenamitil, lain c'ojc'o inch'ol riq'uin li xinbánu chiru li Dios chalen toj sa' li cutan anakcuan, chan.
² Laj Ananías li xyucua'il aj tij quixye reheb li cuanqueb chixc'atk laj Pablo nak te'xsac' sa' re.
³ Ut laj Pablo quixye re: —A' li Dios t̄asac'ok ącue laat. Chanchanat jun li tz'ac bonbil ru. Laat chunchucat aran chi rakoc ątin sa' inben jo' naxye li chak'rab. Ut laat xak'et li chak'rab nak xatakla insac'bal, chan. ⁴Eb li cuanqueb chixc'atk que'xye re: —Laat yocat chixhobbal li xyucua'il aj tij li nac'anjelac chiru li Dios, chanqueb. ⁵ Quichak'oc laj Pablo ut quixye reheb: —Ex cuech tenamitil,

chinecuy, inc'a' ninnau nak a'an ta xyucua'il aj tij. Tz'ib'anbil retalil sa' li Santil Hu naxye chi jo'ca'in: Inc'a' tatz'ektana li nataklan sa' le tenamit. (Ex. 22:28) ⁶ Nak quixq'ue retal laj Pablo nak sa' xyankeb li ch'utch'uqueb aran cuanqueb aj saduceo ut cuanqueb ajcui' aj fariseo, quixye reheb chi cau xyab xcux: —Læx aj judío, cuech tenamitil, lain aj fariseo. Ut aj fariseo ajcui' inyucua'. Xban nak ninpab nak te'cuaclik cui'chic chi yo'yo li camenak, jo'can nak yo' xrakbal atin sa' inben lain, chan laj Pablo. ⁷ Ut nak quixye a'in, inc'a' chic junaj xc'a'uxeb laj fariseo ut eb laj saduceo ut que'oc chixcuech'inquil rib. ⁸ Eb laj saduceo inc'a' neque'xpab nak neque'cuacli cui'chic chi yo'yo li camenak, chi moco neque'xpab nak cuan ángel, chi moco neque'xpab nak cuan Musik'ej. Abanan eb laj fariseo neque'xpab chixjunil a' c'a'ak re ru a'in. ⁹ Ut neque'xejejnac chixcuech'inquil ribeb. Ut eb laj tz'ib xcomoneb laj fariseo yoqueb chixcolbal rix laj Pablo. —Mä jun mäc nakatau chirix li cuink a'in. Mare anchal junak musik'ej, mare anchal junak ángel x-atinan re. Inc'a' naru topletik riq'uin li Kacua', chanqueb. ¹⁰ K'axal cui'chic que'xcuech'i ribeb. Quichal xxiu li coro nel ut quixc'oxla nak mare te'xpedasi laj Pablo. Quixbokeb li soldado ut quixtaklaheb chirisin quil laj Pablo chiruheb re te'xc'am cui'chic sa' li cuartel. ¹¹ Chiru li k'ojojin a'an li Kacua' quixc'ut rib chiru laj Pablo ut quixye re: —Cauhak ach'ol, at Pablo. Jo' nak xach'olob li yal chicuix arin Jerusalén, jo'can ajcui' nak toxach'olob li yal chicuix aran Roma, chan.

Eb laj c'amol be sa' xyankeb laj judío que'xc'ub ru chanru nak te'xcamsi laj Pablo

¹² Cuulajak chic cuanqueb laj judío que'xch'utub ribeb ut que'xc'ub ru c'a'ru te'xbənu. Que'xye riq'uin juramento nak inc'a' te'cua'ak chi moco te'uc'ak cui inc'a' te'xcamsi laj Pablo.

¹³ Numenakeb na ca'c'al chi cuink li que'xc'ub ru xcamsinquil laj Pablo. ¹⁴ Que'coeb riq'uineb li xbenil aj tij ut riq'uineb li neque'c'amoc be sa' xyākeb laj judío ut que'xye reheb: —Lao xkac'ub kib ut xkabənu li juramento nak inc'a' totzacənk cui inc'a' takacamsi laj Pablo. ¹⁵ Jo'can nak laex rochbeneb li neque'taklan sa' xbeneb laj judío yehomak re li coronel nak tixtakla chak arin laj Pablo cuulaj. Ye re nak teraj tenau tz'akal xyalal chirix. Lao ac xkacauresi kib re nak takacamsi nak toj maji' nac'ulun arin, chanqueb. ¹⁶ Ut lix yum li ranab laj Pablo quirabi li c'a'ru yoqueb chixc'ubanquil. Co riq'uin laj Pablo sa' cuartel ut quixserak'i re li c'a'ru yoqueb chixc'ubanquil chirix. ¹⁷ Jo'can nak laj Pablo quixbok jun li capitán ut quixye re: —C'am li al a'in riq'uin li coronel xban nak cuan c'a'ru tixye re, chan.

¹⁸ Ut li capitán quixc'am li al riq'uin li coronel ut quixye: —Laj Pablo li prex xinixbok ut xtz'ama chicuu nak tinc'am chak acuiq'uin li al a'in. Cuan c'a'ru tixye əcue, chan. ¹⁹ Ut li coronel quixchap chi ruk'. Quixc'am xjunes ut quixpatz' re: —¿C'a'ru tacuaj xyebal cue? chan re. ²⁰ Ut li al quixye: —Eb laj judío xe'xc'ub ribeb re xtz'amanquil chəcuu nak tətakla cuulaj laj Pablo re taxic chiruheb li neque'taklan sa' li templo. Xe'xye nak toj cuan c'a' re ru te'raj te'xtau xyalal chirix. A'an

moco yal ta. Raylal ban te'raj xbənunquil re. ²¹ Məbañu c'a'ru te'xye xban nak numenak ca'c'al chi cuink te'ramok re sa' be re xcamsinquel. Eb a'an que'xc'ub rib. Que'xbənū li juramento ut que'xye nak inc'a' te'cua'ak chi moco te'uc'ak cui inc'a' te'xcamsi laj Pablo. Anakcuán yoqueb chiroybeninquel c'a'ru taye ləat, chan li al. ²² Ut li coronel quixchak'rabi li al ut quixye re nak mə ani aj e tixye li c'a'ru quixye resil re.

Laj Pablo quic'ame' chiru laj Félix li acuabej

²³ Li Coronel quixtakla xc'ambal cuib li capitán ut quixye reheb nak te'xcauresi cuib ciento chi soldado, ut lajeb xcac'äl li te'xic chirix cacuay ut cuib ciento li cuanqueb xlans re te'xic toj Cesarea sa' beleb or re k'ojojin. ²⁴ Ut quixye ajcui' nak te'xcauresi li cacuay li tāxic cui' laj Pablo. Te'r'il chi us re nak mact'a' tixc'ul nak te'xc'am riq'uin laj Félix li acuabej. ²⁵ Ut quixtz'iba ajcui' jun li hu re tixtakla chirixeb. Naxye chi jo'ca'in: ²⁶ Lain laj Claudio Lisias. Nintakla xsahil ač'ol, at acuabej Félix. Ləat li k'axal nim əcuanquil. ²⁷ Li cuink a'in li yoquin chixtaklanquil əcuiq'uin quichape' xbaneb laj judío. Oqueb raj re chixcamsinquel nak quebintau ut quinmak' chiruheb lain cuochbeneb li soldado xban nak quinq'ue retal nak a'an tz'akal aj Roma. ²⁸ Ut quicuaj raj xnaubal c'a'ru xmac nak yoqueb chixchapbal. Jo'can nak quinc'am chiruheb li neque'taklan sa' xyənkeb laj judío. ²⁹ Lain quiq'ue retal nak yoqueb chixjitbal yal xban lix chak'rabebe a'an. Ninnau nak mact'a' xmac re te'xcamsi, chi moco re te'xq'ue sa' tz'alam. ³⁰ Ut xcuabi ajcui' resil nak eb laj judío que'xc'ub ru

chanru nak te'xcamsi. Jo'can nak quintakla chi junpät acuiq'uin. Xinye ajcui' reheb li yoqueb chi jitoc chirix nak te'xye acular c'a'ru xmäc. Chacuil acular, chan re li acuabej sa' li hu li quixtakla laj Claudio. ³¹ Eb li soldado que'xc'am laj Pablo jo' quiyeh' reheb. Que'xc'am chi k'ek toj sa' li tenamit Antípatris. ³² Ut sa' li cutan jun chic eb li soldado li que'coeb chi rok que'suk'i cui'chic sa' li cuartel. Ut eb li cuanqueb chirix cacuay que'coeb riq'uin li acuabej chixcanabanquil laj Pablo. ³³ Nak que'cuulac Cesarea, que'xk'axtesi li hu re li acuabej, ut que'xk'axtesi ajcui' laj Pablo. ³⁴ Ut li acuabej nak quiril xsa' li hu, quixpatz' re laj Pablo bar xtenamit. Nak quirabi nak a'an aj Cilicia, quixye re: ³⁵ —Chälkeb cuan laj jitol acular, tojo'nak takabi c'a'ru ämäc, chan re. Ut quixtakla laj Pablo sa' rochoch laj Herodes. Aran que'xtz'ap sa' jun li na'ajej ut que'xc'ac'ale re nak inc'a' tælelilik.

24

Laj Pablo quiatinac re xcolbal rib chiru laj Félix

¹ Nak ac xnume' chic qb cutan, quicuulac Cesarea laj Ananías li xyucua'il aj tij. Cuanqueb rochben cuib oxib li neque'c'amoc be sa' xyänkeb laj judío, ut cuan jun naqtinac chirixeb, aj Tértulo xc'aba'. Que'cuulac riq'uin li acuabej chixjitbal laj Pablo. ² Nak quic'ame' laj Pablo, laj Tértulo quioc chixjitbal laj Pablo chiru laj Félix li acuabej ut quixye: —Kacua' Félix, sa' ąc'aba' laat cuanco sa' tuktuquil usilal. Xban nak chäbil nacattaklan sa' kabén, jo'can nak yoco chi usac sa' li katenamit.

³ Riq'uin a'in nasaho' kach'ol chikajunilo yalak bar sa' li na'ajej a'in. Ut nakabantioxi chacuu, at acuabej Félix. ⁴ Nintz'ama chacuu nak tābanu usilal ke. Tācuabi taxak li oc ke chixtz'amanquil chacuu. Junpat ajcui' tatkach'i'ch'i'i. ⁵ Lao xkaq'ue retal nak li cuink a'in k'axal yibru xna'leb. Naxtiquib ra xic' sa' xyānkeb chixjunileb laj judío sa' chixjunil li ruchich'och'. Ut a'an najolomin re li jun ch'utal aj Nazareno neque'xye re. ⁶ Quiraj raj xmuxbal ru li katemplo. Jo'can nak xkachap, ut quikaj raj xrakbal ətin sa' xbən jo' naxye li kachak'rab. ⁷ Abanan laj Lisias li coronel qui-oquen chirix ut sa' josk'il quixmak' chiku. ⁸ A'an quixye nak laj jitol re tento te'chalk əcuiq'uin. Taruk ajcui' tāpatz' re a'an re tānau chi tz'akal li c'a'ru yoco chixjitbal cui', chan. ⁹ Ut eb laj judío li que'cuulac rochben, que'xye nak yal li yo chixyebal laj Tértulo. ¹⁰ Ut li acuabej quixbok laj Pablo ut quixye re nak tāqatinak. Ut laj Pablo quixye: —Lain ninnau nak nabal chihab əcupoquic chok' aj rakol ətin sa' li tenamit a'in. Jo'can nak chi māc'a' inc'a'ux tinye li c'a'ru tincol cui' cuib. ¹¹ Lāat naru tattz'ilok ətin chirix li tinye. Cablaju cutan anakcuan inc'ulunic chi tijoc aran Jerusalén. ¹² Lain inc'a' yoquin chixyo'obanquil ra xic' sa' xyānkeb li tenamit. Mā ani nintac-chi'i, chi moco sa' li templo, chi moco sa' li cab li neque'xch'utub cui' ribeb laj judío, chi moco sa' li tenamit. ¹³ Ut eb laj jitol cue inc'a' naru neque'xye nak yal li c'a'ru yoqueb chixyebal xban nak māc'a' junak retalil naru naxc'ut nak yal. ¹⁴ Lain tinye xyālal əcue. Ninlok'oni li Dios li que'xlok'oni

chak li kaxe'tonil yucua'. Ninpab li evangelio li neque'xye nak moco yal ta. Ninpab chixjunil li tz'ibabil sa' li chak'rab li quiq'uehe' re laj Moisés, jo' ajcui' li que'xtz'iba li profetas. ¹⁵ Lajin cau inch'ol chixpabanquil li Dios jo' neque'xbanu li yoqueb chi jitoc cue. Lajin ninpab ajcui' nak te'cuaclik cui'chic chi yo'yo li camenak, jo'li tiqueb xch'ol jo' ajcui' li inc'a' tiqueb xch'ol. ¹⁶ Jo'can nak ninq'ue inch'ol chixbanunquil li us re nak mac'a'ak inmac chiru li Dios chi moco chiruheb li cuas cuitz'in. ¹⁷ Q'ula chihab ma anihin sa'lin tenamit Jerusalén. Jo'can nak xinsuk'i chi mayejac chiru li Dios ut re xq'uebal ca'ch'inaklix tenk'anquileb li neba' li cuanqueb aran. ¹⁸ A'an a'in li yoquin chixbanunquil nak quine'xtau sa'li templo laj judío li que'chal chak Asia. Toje' xinrake' xbənunquil li c'a'ru quinyechi'i chiru li Dios. Ac xinbanu li nabānuman re xsantobresinquil cuib. Moco nocotububnac ta chi moco yoco ta chi yo'obanc ch'a'ajquilal. ¹⁹ Eb laj judío li que'chal chak Asia, a'aneb raj li xe'chal arin chinjitbal chacuu cui cuan ta c'a'ru tine'xjít cui'. ²⁰ Xyehakeb anakcuan chacuu li neque'taklan sa'xbəneb laj judío li cuanqueb arin cui cuan c'a'ru inc'a' us xinbanu nak quine'xc'am chiruheb laj rakol ətin. ²¹ Ca'aj cui' a'in lin mac chiruheb: Nak xakxoquin chiruheb, quinye chi cau xyab incux nak te'cuaclik cui'chic chi yo'yo li camenak. Sa' xc'aba' a'an nak oc ere chixrakbal ətin sa' inben, chanquin reheb, chan laj Pablo. ²² Laj Félix ac rabiom resil li pabal a'an. Yal re xbaybaleb nak quixye: —C'ulunk cuan laj Lisias ut tinchoy xtz'ilbal rix li yoquex chixyebal, chan.

²³ Ut quixtakla cui'chic laj Pablo sa' li na'ajej li tz'aptz'o cui' xbaneb. Ut quixtakla ajcui' xyebal re li capitán nak tixq'ue xlesens chiratinanquileb lix comon li jo' q'uial te'raj chalc chirula'aninquil ut chixq'uebal c'a'ru re. ²⁴ Inc'a' chic q'uila cutan chirix a'in nak quicuulac cui'chic laj Félix rochben lix Drusila li rixakil. Li ixf a'an aj judío. Laj Félix quixbok laj Pablo riq'uin re nak tixch'olob chiru chanru xpabankuil li Kacua' Jesucristo. ²⁵ Ut nak laj Pablo yo chixch'olobanquil lix yalal li tiquilal, li cuyuc ib, ut li rakba qatin chalel, quichal xxiu laj Félix. Quixye re laj Pablo. —Anakcuán ayu. Nak tixq'ue rib chicuu tintakla cui'chic abokbal, chan. ²⁶ Sa' xch'ol laj Félix nak tatuminak ru xban laj Pablo re taisik sa' tzalam. Jo'can nak nabal sut quixtakla xbokbal ut quiatinaq riq'uin. ²⁷ Xban nak quiraj nak us taçanak riq'uineb laj judío, jo'can nak quixcanab chi prexil laj Pablo. Nak ac xnume' cuib chihab, laj Félix qui-el chok' acuabej ut qui-oc laj Porcio Festo chok' rekaj.

25

Laj Pablo quic'ame' chiru laj Festo li acuabej li toj qui-oc sa' xcuanquil

¹ Oxib cutan chic roquic chok' acuabej laj Festo, nak qui-el Cesarea ut co toj Jerusalén. ² Ut que'cuulac riq'uin laj Festo eb li xbenil aj tij ut eb li neque'c'amoc be sa' xyankeb laj judío re xjitbal laj Pablo. ³ Que'xtz'ama chiru laj Festo nak tixbánu li usilal, tixtakla cui'chic Jerusalén laj Pablo xban nak que'xc'oxla xrambal sa' be re xcamsinquil. ⁴ Quichak'oc laj Festo ut quixye reheb: —Laj Pablo

ac cuan chi prexil aran Cesarea ut c'ac'alenbil chi us. Ut chi səb tinxic ləin aran, chan. ⁵ Ut quixye ajcui' reheb: —Eb laj c'amol be sa' eyənk te'xic chicuix. Cui cuan xmäc li cuïnk a'in, che'xitak, chan reheb. ⁶ Quicuan tana chic cuakxakibak malaj ut lajebak cutan chic sa' xyānkeb ut quisuk'i Cesarea. Sa' xcab li cutan nak quic'ojla sa' li na'ajej li narakoc cui' atin, quixtakla xc'ambal laj Pablo riq'uin. ⁷ Nak quicuulac, quisute' xbaneb laj judío li que'chal Jerusalén. Junes raylal que'xye chirix laj Pablo nak que'xjit. Abanan inc'a' qui-el chi yal li c'a'ru que'xye xban nak mäc'a' junak c'a'ru tixc'ut nak yal li yoqueb chixyebal. ⁸ Ut laj Pablo qui-oc cui'chic chi ətinac re xcolbal rib chiruheb ut quixye: —Chi moco lix chak'rabeb laj judío chi moco lix templo li Käcua' quinsach xcuquil. Chi moco cuan ta junak mäc xinbənu chiru li acuabej César, chan. ⁹ Laj Festo quiraj nak us təcanak riq'uineb laj judío. Jo'can nak quixye re laj Pablo: —¿Ma təcuaj xic toj Jerusalén ut aran tarakmäk ətin sa' əben chicuu? chan re. ¹⁰ Laj Pablo quixye: —Cuanquin chiru li rakba ətin li cuan sa' xcuənt li acuabej César. Jo'can nak arin ajcui' tarakek' ətin sa' inben. Ac nacanau ajcui' laat nak mäc'a' inmäc chiruheb laj judío. ¹¹ Cui ut cuan junak mäc xinbənu re nak tento tine'xcamsi, chine'xcamsihak. Lain inc'a' ninxucua li cəmc. Abanan cui inc'a' yal li yoqueb chixyebal chicuix, ma ani tərük tak'axtesink cue sa' ruk'eb a'an. Lain tintz'ama nək li acuabej César li k'axal nim xcuquil tərakok ətin sa' inben, chan laj Pablo. ¹² Ut laj Festo quiatinac riq'uineb laj q'uehol na'leb. Tojo'nak quixye re laj Pablo: —Cui li acuabej César

tacuaj t̄arakok ̄atin sa' ̄aben, naru ajcui' tatintakla riq'uin, chan.

Laj Festo quixserak'i re li rey Agripa li c'a'ru yo chixc'ulbal laj Pablo

¹³ Ac xnume' na chic cuib oxib cutan nak li rey Agripa ut lix Berenice li ranab que'cuulac Cesarea chirula'aninquil laj Festo. ¹⁴ Ac cuan cutan xcuulajiqueb aran, nak laj Festo quixch'olob chiru li rey li yo chixc'ulbal laj Pablo: —Jun li cuink quicanabac̄ chi prexil xban laj Félix, chan re. ¹⁵ Ut nak quincuulac Jerusalén que'chal cuiq'uin lix b̄enil aj tij ut eb li neque'c'amoc be sa' xyānkeb laj judío. Que'xtz'āma chicuu nak tinrak ̄atin sa' xb̄en ut tinteneb cāmc sa' xb̄en. ¹⁶ Abanan lain quinye reheb nak eb laj Roma moco c'aynakeb ta chixtenebanquil cāmc sa' xb̄en junak cuink yal chi jo'can. Tento nak cuānk chiruheb laj jitol re, re nak tixcol rib a' yal c'a'ru tajitek' cui'. ¹⁷ Nak que'c'ulun arin eb laj c'amol be sa' xyānkeb laj judío, inc'a' quinbay. Sa' li cutan jun chic ticto coin sa' li na'ajej li ninrakoc cui' ̄atin. Ut quintakla xc'ambal laj Pablo. ¹⁸ Sa' inch'ol lain nak k'axal nim li māc quixbānu. Abanan nak que'c'ulun arin li yoqueb chi jitoc re, inc'a' que'jitoc chirix jo' quinc'oxla. ¹⁹ Li c'a'ru yoqueb cui' chixjitbal, a'an chirix lix pābāleb, ut chirix jun li cuink Jesús xc'aba', ac camenak ut laj Pablo naxye nak yo'yo. ²⁰ Lain inc'a' xinnau c'a'ru tinbānu riq'uin li ch'a'ajquilal a'in. Jo'can nak xinpatz' re laj Pablo ma t̄araj xic Jerusalén ut aran t̄arakmānk ̄atin sa' xb̄en. ²¹ Ut laj Pablo quixtz'āma chicuu nak t̄aroybeni re nak laj César

li acuabej li k'axal nim xcuanquil tarakok atin sa' xben. Jo'can nak xintakla cui'chic xtz'apbal sa' tz'alam toj tacuulak xk'ehil nak tintakla riq'uin li acuabej César, chan laj Festo. ²² Ut li rey Agripa quixye re laj Festo: —Lain nacuaj raj rabinquil li c'a'ru naxye li cuink a'an, chan. Ut laj Festo quixye re: —Cuulajc ajcui' naru tacuabi, chan. ²³ Cuulajak chic que'oc sa' li na'ajej li neque'rakoc cui' atin li rey Agripa rochben lix Berenice. K'axal chabil xtikibankanquileb. Rochbeneb li coronel ut eb li ninkeb xcuanquil sa' li tenamit. Ut laj Festo quixtakla xc'ambal laj Pablo. ²⁴ Quixye: —At rey Agripa ut chixjunilex li ch'utch'uumex arin, cue' li cuink li yoqueb chixjitbal chixjunileb laj judío li cuanqueb arin Cesarea jo'queb ajcui' li cuanqueb Jerusalén. Neque'xjap re chixtz'amanquil chicuu nak tacamsik. ²⁵ Abanan nak xin-oc chi rakoc atin sa' xben xinq'ue retal nak mac'a' xmac re tacamsik. A'an xtz'ama nak li acuabej César tarakok atin sa' xben. Jo'can nak xinye nak tento taxic Roma riq'uin li acuabej. ²⁶ ¿C'a' ta cui' ru tintakla xyebal re li acuabej chirix li cuink a'in? Jo'can nak xinc'am chak cheru laex ut chacuu laat, at rey Agripa, re nak tetz'il atin chirix. Mare chi jo'can cuan c'a'ru tintakla xyebal chirix. ²⁷ Ninnau nak moco us ta xtaklanquil junak prex chi inc'a' tataklaq xyebal c'a'ru xmac, chan laj Festo.

26

Laj Pablo quiatinac chiru laj Agripa re xcolbal rib

¹ Li rey Agripa quixye re laj Pablo: —Anakcuan naru tat-atinak re tacol acuib, chan. Ut laj Pablo

quixtaksi li ruk' ut qui-oc chi ątinac re tixcol rib.

² Quixye: —At rey Agripa, nasaho' sa' inch'ol nak taruk tinatinaq acuiq'uin re tincol cuib chiruheb laj c'amol be sa' xyankeb laj judío li yoqueb chi jitoc cue. ³ K'axal cui'chic us xban nak laat nacanau chixjunil li c'a'ru c'aynakeb xbanunquil eb laj judío ut nacanau chanru lix na'lebeb. Jo'can ut nak nintz'ama chacuu nak tacuy rabinquil li c'a'ru oc cue xyebal.

⁴ Chixjunileb laj judío neque'xnau chanru lin yu'am nak xincuan chak sa' lin tenamit chalen chak sa' insajilal ut toj anakcuán. Jo'can ajcui' aran Jerusalén neque'xnau cuu. ⁵ Eb a'an neque'xnau cuu chalen chak sa' inca'ch'inal. Cui te'raj, taruk te'xch'olob xyalal chicuix. Lain aj fariseo xcomoneb li neque'xq'ue xch'ol chixbanunquil chixjunil li naxye sa' li chak'rab jo' naraj li kapabäl. ⁶ Ut anakcuán laex yoqueb chi rakoc ątin sa' inben yal xban nak yoquin chiroybeninqul li quixyechi'i chak li Dios junxilaj reheb li kaxe'tonil yucua'. ⁷ Li cablaju xtepaleb laj Israel yoqueb chiroybeninqul nak te'xc'ul li yechi'nbil chak reheb xban li Dios. Chi k'ek chi cutan neque'xlok'oni li Dios. At rey Agripa, xban xyo'oninquel a'an nak yoqueb chinjital eb laj judío. ⁸ ¿C'a'ut nak laex inc'a' nequepab nak li Dios tixcuaclesiheb cui'chic chi yo'yo li camenak? ⁹ Yal nak junxil lain xinc'oxla nak us xrahobtesinquileb li neque'xpab li Jesús aj Nazaret. ¹⁰ Lain quinq'ueheb chi tz'apet' sa' tz'alam nabaleb laj pabanel. Ut q'uebil incuanquil chixbanunquil a'an xbaneb li xb'enil aj tij. Ut

nak neque'camsic laj pābanel, laín quin-oquen ajcui' chirixeb re te'camsík. A'in quilajinbānu aran Jerusalén. ¹¹ Nabal sut quintakla xsac'baleb sa' li cab li neque'xch'utub cui' ribeb laj judío. Quinpuersiheb chixmajecuanquil xc'aba' li Jesús. Xban nak c'ajo' injosk'il sa' xbeneb, quebintake yalak bar sa' eb li jalanił tenamit re xbanunquil raylal reheb. ¹² A'in yoquin chixbānunquil nak coin Damasco. Q'uebil incuanquil ut taklanbilin xbaneb li xbēnil aj tij. ¹³ Chacuabi at rey, li yoquin xyebal. Cua'leb re cutan nak quinixsut jun li chanchan xam sa' be. Li xam a'an quichal chak sa' choxa. Nalemtz'un. Naxk'ax ru nak nalem̄tz'un ru li sak'e. Quinixsut laín ut que'sute' ajcui' li yoqueb chi xic chicuix. ¹⁴ Nak cot'ane' chikajunil chiru ch'och', quicuabi jun xyab cux yo chi atinac cuiq'uin. Quixye cue sa' rātinobāleb laj judío, "At Saulo, at Saulo, ¿c'a'ut nak yocat chinrahobtesinquil? Yocat chixtacuasinguil acuib ajuñes jo' naxbānu li boyx li inc'a' na-abin chiru laj echal re nak yo chixberesinquil," chan cue. ¹⁵ Ut laín quinye re, "¿Anihat laat, Kācua?" Ut li Kācua' quixye cue, "Lain li Jesúś li yocat chinrahobtesinquil. ¹⁶ Anakcuan ut cuaclin. Lain xinc'utbesi cuib chacuu re nak tatinxakab chok' aj c'anjel chicuu. Laat tatch'olobānk xyālal li c'a'ak re ru xacuil jo' ajcui' li c'a'ak re ru toj tinc'utbesi chacuu. ¹⁷ Laín tincolok acue chiruheb li xic' neque'iloc acue, jo' eb laj judío, jo' eb li mācua'eb aj judío, ut tatintakla anakcuan sa' xyankeb li mācua'eb aj judío. ¹⁸ Chanchan nak tāteonk li xnak' ruheb nak tāch'olob li xyālal chiruheb. Chanchan nak te'elk sa' li k'ojojin ut

te'oc sa' cutan nak te'xtau ru li xyalal. Te'elk rubel xcuquil laj tza ut te'oc rubel xcuquil li Dios. Riq'uin inpabánquil laín, tacuyek' tasachek' lix maqueb, ut tacuánk xna'ajeb sa' xyánkeb li sic'bileb ru xban li Dios," chan cue li Kacua'. ¹⁹ Jo'can ut nak inc'a' xink'etk'eti cuib chiru li quixc'utbesi rib chicuu li quichal chak sa' choxa, at rey Agripa. ²⁰ Ut xbén cua quinch'olob xyalal chiruheb li cuanqueb Damasco ut Jerusalén. Chirix a'an quinch'olob xyalal chiruheb laj judío li cuanqueb Judea, jo' ajcui' chiruheb li macua'eb aj judío. Quinye reheb nak tento te'yot'ek' xch'oleb te'xjal xc'a'uxeb ut te'xk'axtesi ribeb re li Dios ut te'xbánu li us jo' xc'ulubeb li ac xe'pában. ²¹ Sa' xc'aba' a'an nak quine'xchap eb laj judío sa' li templo ut que'raj raj incamsinquil. ²² Abanan laín tenk'anbilin xban li Dios toj chalen anakcuan. Yoquin chixch'olobanquil li yal chirix li c'a'ru tac'ulmank. Ninch'olob xyalal chiruheb chixjunileb, li cuanqueb xcuquil jo' ajcui' li mac'a'eb xcuquil. Mac'a' junak aq'uil na'leb yoquin chixyebal. Li yoquin chixyebal, a'an ajcui' li que'xch'olob xyalal eb li profeta ut laj Moisés. ²³ Que'xye nak tento tacamsík li Cristo, laj Colonel li yechi'inbil xban li Dios, abanan a'an li xbén li tacuaclík cui'chic chi yo'yo sa' xyánkeb li camenak ut tixch'olob xyalal li evangelio reheb laj judío jo'queb ajcui' li macua'eb aj judío, chan laj Pablo. ²⁴ Nak laj Pablo yo chi atinac chi jo'can re xcolbal rib, laj Festo quixjap re chixyebal: —Loc acuu laat, Pablo. K'axal nabal li tzoloc xbabánu ut a'an yo chi locobresinc acuu, chan. ²⁵ Ut laj Pablo quixye re: —At Festo, k'axal nim

acuanquil. Lain moco loc ta cuu. Li c'a'ru yoquin chixyebal acue, a'an tz'akal yal. ²⁶ Li rey Agripa naxnau chixjunil li c'a'ak re ru a'in. Jo'can nak yoquin chi ątinac chiru chi mac'a' inxiu. A'an naxnau chixjunil a'in xban nak moco quic'ulman ta chi mukmu, chan. ²⁷ Ut laj Pablo quixye re li rey Agripa: —At rey Agripa, ¿ma nacapab li c'a'ru que'xtz'iba li profeta? Lain ninnau nak nacapab, chan laj Pablo. ²⁸ Li rey Agripa quichak'oc ut quixye re: —Riq'uin li c'a'ru xaye xak'unobresin inch'ol. Ca'ch'in chic ma xinpaban aban, chan. ²⁹ Ut laj Pablo quixye: —Xq'ue taxak acue li Dios nak tatpabank laat jo' eb ajcui' chixjunileb li yoqueb chi abinc cue anakcuán. Usta ch'a'aj cheru, usta inc'a', texpabank taxak jo' nak xinpaban lain, abanan inc'a' raj texbaq'uek' riq'uin cadena, jo' nak bac'boquin lain, chan. ³⁰ Ut nak quirake' chixyebal li ątin a'in, que'cuacli li rey ut lix Berenice jo' ajcui' laj Festo ut eb li que'c'oja chixc'atk. ³¹ Ut nak yoqueb chi elc sa' li na'ajej a'an, que'xye chi ribileb rib: —Li cuink a'in mac'a' xmac. Mac'a' junak mac xbanu re tacamsik chi moco re cuank sa' tz'alam, chanqueb. ³² Ut laj Agripa quixye re laj Festo: —Taruuk raj rach'abanquil li cuink a'in cui ta inc'a' xtz'ama nak tarakok ątin li acuabej César sa' xbən, chan li rey Agripa.

27

Laj Pablo quitaklac aran Roma

¹ Nak quich'ola li kaxiquic chiru ha' toj Italia, laj Pablo rochbeneb li jun ch'ol chic li cuanqueb chi

prexil, que'k'axtesic sa' ruk' jun li capitán aj Julio xc'aba'. A'an xcomoneb li jun ch'utal chi soldado re li acuabej César. ² Co-oc sa' jun li jucub li quichal chak sa' li tenamit Adramitio. Li jucub a'an ac xic re. Coo kochben laj Aristarco li quichal chak Tesalónica xcuént Macedonia. Li jucub tānumek' chixc'atk eb li na'ajej xcuént Asia. ³ Ut sa' li cutan jun chic cocuulac Sidón. Laj Julio quixbānu usilal re laj Pablo. Quixcanab chi xic riq'uineb laj pābanel li cuanqueb aran re nak tātenk'ák xbaneb. ⁴ Co-el aran Sidón sa' li jucub. Nak yoco chi xic, coxonumek' nach' riq'uin Chipre xban nak chiku yo chi chalc li ik'. ⁵ Conume' jun pac'al li palau cuan cui' li tenamit Cilicia ut Panfilia. Ut cocuulac sa' li tenamit Mira li cuan sa' xcuént Licia. ⁶ Aran quixtau jun li jucub li capitán re Alejandría. Ac xic re Italia ut corocsi sa' li jucub a'an re toxic. ⁷ Nabal cutan cobec chiru ha' chi timil. Ra sa nak cocuulac sa' xjayal li tenamit Grido. Xban nak k'axal cau li ik', jo'can nak quikajal kabe. Conume' cuan cui' li tenamit Salmón ut coo sa' li na'ajej Creta li sutsu sa' ha'. ⁸ K'axal ch'a'aj ut k'axal timil cocuulac sa' jun li tenamit "Chabil Oquebal" neque'xye re. Nach' riq'uin a'an cuan li tenamit Lasea. ⁹ Nabal cutan cobay sa' li na'ajej a'an ut xiu xiu chic li xic chiru ha' xban nak cuulac re li habalk'e. Jo'can nak laj Pablo qui-oc chixq'uebal xna'lebeb laj ch'e'ol jucub. ¹⁰ Quixye reheb: —Ex cuas cuitz'in, yoquin chixq'uebal retal nak li xic chiru ha' k'axal ch'a'aj. Nabal li raylal takac'ul chi jo'ca'in. Moco ca'aj cui' ta xiu xiu re li jucub ut li rik. Xiu xiu aj ban cui' chok' ke lāo, chan laj Pablo. ¹¹ Abanan li capitán inc'a' quixq'ue

xcuanquil li c'a'ru quixye laj Pablo. A' ban chic li c'a'ru que'xye laj ęchal re li jucub ut laj ch'e'ol re, a'an chic li que'xbənu. ¹² Ut xban nak mäc'a' junak na'ajej bar taruk te'xnumsi cui' li habalk'e chi sa sa' xch'oleb, li xq'uialeb que'xye nak us li elc aran cui taruk te'cuulak Fenice re te'xnumsi li habalk'e aran. A'an jun li tenamit xcuent Creta. Sa' li na'ajej a'an cuan cuib li oquebal re li jucub. Jun nacana sa' li suroeste ut li jun chic nacana sa' li noroeste.

Li cak-sut-ik' li quixq'ue nak yoqueb chi numec' sa' li palau

¹³ Nak ac yo li ik' li nachal sa' li sur, que'xc'oxla nak naru te'xic. Jo'can nak que'xtiquib xic. Yoqueb chi xic chire li palau nach' riq'uin li na'ajej Creta. ¹⁴ Junpät na chic nak quichal jun cacuil ik'. Lix cau ok li ha' yo chixsac'bal rib chiru li jucub. Euroclidón xc'aba' li ik' a'an li nachal chak sa' li noroeste. ¹⁵ Inc'a' chic que'xcuy xmetz'eu li cacuil ik' laj ch'e'ol re li jucub. Jo'can nak quikacanab kib re toxc'am. Ut li jucub quic'ame' xban li ik'. ¹⁶ Cocuulac cuan cui' jun siril li ch'och' Clauda xc'aba' sutsu sa' ha'. Ra sa nak coru xtaksinqul li ch'ina jucub li yo chi queloc xban li nimla jucub. ¹⁷ Nak kataksi sa' li nimla jucub, c'ajo' nak que'xucuac li cristian. Que'xc'oxla nak mare ta'ilk li jucub sa' li samaib. Que'xcubsi xt'icrul li jucub ut yoco chi xic chi jo'can. ¹⁸ Jo' cuulajak chic toj cau ajcui' li ik'. C'ajo' nak yo chirec'asinquil li jucub. Jo'can nak quikatiquib xjebbal li rik ut kacut sa' li palau. ¹⁹ Sa' rox li cutan quikisi sa' li jucub li c'a'ru nac'anjelac re li jucub, re nak inc'a' chic ąlak li jucub. ²⁰ Chiru nabal cutan inc'a'

qui-iloc li sak'e chi moco li chahim chiru k'o^{jyin}. K'axal cau li cak-sut-ik' ut xiu xiu cuanco. Inc'a' chic nakayo'oni nak tocolek' ta. ²¹ Ac xnume' nabal cutan ut maji' nakayal cua. Jo'can nak laj Pablo quixakli sa' xyiheb ut quixye reheb: —Ex cuas cuitz'in, k'axal us raj quinerabi ta. Inc'a' raj co-el chak Creta. Cui ta inc'a' xo-el, inc'a' raj xkac'ul li raylal a'in ut inc'a' raj xosachoc. ²² A'ut anakcuán tinye ere nak mexc'oxlac. Cauhak ban ech'ol xban nak ma^ñ ani ke t^ac^am^k. Ca'aj cui' li jucub t^asachk. ²³ Sa' li k'o^{jyin} a'in xc'utbesi rib chicuú jun x-ángel li Dios laj echal cue, li ninc'anjela ru. ²⁴ Li ángel xye cue, "Matxucuac, at Pablo, xban nak tento nak tatcuulak riq'uin li acuabej César. Xban xnimal rusilal li K^acua', ma^ñ jun reheb li cuanqueb acuochben te'camk," chan cue. ²⁵ Jo'can nak cauhak ech'ol, ex cuas cuitz'in. Lain cau inch'ol riq'uin li Dios nak t^ac'ulmank jo' xye cue li ángel. ²⁶ Abanan tento nak tocutek' xban li ha' sa' jun na'ajej sutsu sa' ha', chan laj Pablo reheb. ²⁷ Cuib xaman na yoco chi c'uluc raylal. Li ha' yo^ñ chikac'ambal yalak bar chiru li palau Adriático xc'aba' xban li cacuil ik'. Tuktu chic k'o^{jyin} nak eb laj ch'e'ol jucub que'xc'oxla nak ac cuulaqueb re chi ch'och'el. ²⁸ Que'xcubsi jun li c'am re xbisbal xchamal li ha'. Toj cuan cuaklaju xcac'äl metro xchamal nak que'xbis. Nak que'jiloc chic ca'ch'in, que'xq'ue cui'chic li bisleb ut cuukub xca'c'äl metro chic lix chamal. ²⁹ C'ajo' lix xiuheb xban nak que'xc'oxla nak ma^ñre t^acutek' li jucub sa' xy^ank pec xban lix cau ok li palau. Jo'can nak que'xq'ue sa' li ha' chirix li jucub cahib li nin^aki ch'ich' ancla xc'aba' re raj xxakabanquil li jucub.

Ut neque'raj ta ac xsakeeu. ³⁰ Ut eb laj ch'e'ol jucub que'raj elelic sa' li jucub. Que'xq'ue li ch'ina jucub sa' ha' ut que'xbanu ribeb nak te'raj xq'uebal li ch'ich' ancla sa' ha' chiru li jucub. ³¹ Laj Pablo quixye re li capitán ut reheb ajcui' li soldado: — Cui inc'a' neque'cana eb a'in sa' li jucub, laex inc'a' taruk texcolek', chan. ³² Jo'can nak eb li soldado que'xyoc' lix c'amal li ch'ina jucub ut que'xcanab chi sachc sa' li palau. ³³ Nak qui-oc chi cutanoc', laj Pablo quixq'ue xcacuilal xch'oleb chixjunileb ut quixye reheb nak te'cua'ak. Quixye reheb: —Cuib xaman anakcuán eroquic chi oybeninc ut chixcuybal esa' chi mac'a' nequetzaca. ³⁴ Nintz'ama cheru nak texcua'ak re nak cauhakex ut ma jun ere tacamk, chan reheb. ³⁵ Ut nak quixye a'an, quixchap jun li caxlan cua ut quixbantioxi chiru li Dios chiruheb chixjunileb li cuanqueb aran. Ut nak quixjach, qui-oc chixcua'bal. ³⁶ Riq'uin a'in quic'ojla xch'oleb chixjunileb ut que'oc ajcui' chi cua'ac eb a'an. ³⁷ Chikajunilo li cuanco sa' li jucub, cuanco cuib ciento riq'uin cuaklaju xcac'al (276). ³⁸ Nak ac xe'rake' chi cua'ac, que'oc cui'chic chixjebbal li rik li jucub ut que'xcut chi ha' li trigo re nak tasebok' li rjk. ³⁹ Nak quicutano' que'xq'ue retal nak cuanqueb sa' jun na'ajej inc'a' neque'xnau ru. Aran na-oc jun li nima' sa' li palau ut aran cuan jun li na'ajej sa' samaib chire li palau. Aran que'xc'oxla nak taruk te'xhiltesi li jucub. ⁴⁰ Que'xyoc' lix c'amal li anclas ut que'xcanab chi subunc sa' li ha'. Que'xcotz ajcui' lix bac'bal li ch'ich' li naberesin re li jucub. Ut que'xtaksi cui'chic li nimla t'icr li naramoc re li ik'. Ut yoqueb

chi xic chire li ha'. ⁴¹ Li jucub quic'ame' xban li ik' bar neque'xc'ul cui' rib li nima' ut li palau. Aran quit'il sa' samaib li ru'uj li jucub. Inc'a' chic qui-ec'an sa' xna'aj. Ut li jucub yo chi jorec' xban lix cau ok li palau. ⁴² Eb li soldado que'xc'oxla nak us te'xcamsiheb chixjunil li prex re nak inc'a' te'xcut rib chi numxic chiru ha' re te'xcol rib. ⁴³ Abanan li capitán quiraj xcolbal laj Pablo. Jo'can nak quixpo' ru lix c'a'uxeb li soldado ut quixye reheb nak li ani naxnau numxic xcutakeb rib xbən cua sa' ha' ut te'numxik re nak te'elk chi ch'och'el. ⁴⁴ Cuan li que'el chiru tz'alam che' ut cuan que'xchap c'a'ak re ru re li jucub. Jo'ca'in nak que'cole' chixjunileb ut que'el chi ch'och'el.

28

Laj Pablo quicuulac sa' li na'ajej Malta

¹ Nak ac cuanco chic chi ch'och'el, quikanau nak li na'ajej a'an, li sutsu sa' ha', a'an Malta xc'aba'. ² Li cuanqueb aran c'ajo' li usilal que'xbənu ke. Coe'xc'ul sa' xyalal chikajunilo ut que'xtz'ab jun xam xban nak c'ajo' li hab ut c'ajo' li que. ³ Laj Pablo quixxoc chak jun k'al li ruk' che' chaki ut quixq'ue sa' li xam. Jun li c'ambolay quielelic xban xtikcual li xam ut quixtiu li ruk' laj Pablo. T'uyt'u quicana. ⁴ Li cuanqueb sa' li na'ajej Malta, nak que'r'il li c'ambolay t'uyt'u chi ruk', que'xye chi ribileb rib: —Relic chi yal nak li cuink a'in, a'an aj camsinel. Xcole' chak chiru li palau, abanan inc'a' təcanabək chi yo'yo arin chi inc'a' tixc'ul xtojbal rix lix məc, chanqueb. ⁵ Ut laj Pablo quixchik' li ruk' ut li c'ambolay quit'ane' sa' xam ut məc'a' quixc'ul laj Pablo. ⁶ Eb a'an yoqueb

chiroybeninquil jok'e taqripok laj Pablo ut taqt'anek' chi camenak. Najt que'roybeni ut nak que'r'il nak maqc'a' quixc'ul, que'xjal lix c'a'uxeb ut que'xye: — Dios tana li cuink a'an, chanqueb. ⁷ Aran cuan xc'alebal laj Publio li cuan xcuانquil sa' li na'ajej Malta. A'an coxc'ul sa' xyalal ut riq'uin cohilan chiru oxib cutan. ⁸ Lix yucua' laj Publio t'ant'o sa' ch'at. Yo xtik ut yo xquic' sa'. Laj Pablo qui-oc sa' li na'ajej li cuan cui'. Quixq'ue li ruk' sa' xben nak quitijoc ut quiq'uirtesic. ⁹ Nak que'rabi resil nak ac xq'uirtesic lix yucua' laj Publio, nabaleb li yaj li cuanqueb sa' li na'ajej a'an, que'cuulac riq'uin laj Pablo ut que'q'uirtesic. ¹⁰ Riq'uin li usilal qui-ux reheb, k'axal cui'chic coe'xra ut que'xq'ue nabal c'a'ru ke. Ut nak ac xic ke nabal li c'a'ru ke que'xsi ke re taqc'anjelak ke chiru be.

*Laj Pablo quicuulac Roma ut quiatinac riq'uineb
laj c'amol be sa' xyankeb laj judío*

¹¹ Ut nak quinume' oxib po, co-oc sa' jun li jucub re Alejandría li yo chixnumsinquil li habalk'e sa' li na'ajej Malta. Li jucub a'an cuan retalil lix dioseb chiru. Cástor ut Pólux xc'aba'eb. ¹² Cocuulac sa' li tenamit Siracusa ut aran cohilan oxib cutan. ¹³ Chirix chic a'an coo cui'chic chiru ha' ut cocuulac sa' li tenamit Regio. Cuulajak chic quiticla li ik' li nachal sa' li sur. Yo li ik' chalen nak cocuulac sa' li na'ajej Puteoli. ¹⁴ Sa' li na'ajej a'an cuanqueb aj paqbanel katauheb. Eb a'an que'xtz'ama chiku nak tocanak cuukubak cutan riq'uineb. Ut chirix a'an coo cui'chic Roma. ¹⁵ Eb laj paqbanel li cuanqueb Roma que'rabi resil nak cuulac ke. Cuanqueb laj paqbanel que'chal chi c'uluc ke toj cuan cui' li c'ayil Apio xc'aba'

ut cuanqueb ajcui' que'c'uluc ke toj sa' li na'ajej Oxib Tabernas. Nak quiril ruheb laj pabanel, laj Pablo quixbantioxi chiru li Dios ut quic'ojla xch'ol.

16 Nak cocuulac Roma, li capitán quixk'axtesiheb li prex re li coronel. Ut laj Pablo quicanabac chi cuanc xjunes rochben jun li soldado li nailoc re. **17** Nak ac xnume' chic oxib cutan, laj Pablo quixbokeb li neque'c'amoc be sa' xyankeb laj judío li cuanqueb Roma. Nak acak xe'ch'utla quiātinac riq'uineb re xcolbal rib, ut quixye re-heb: —Ex cuas cuitz'in, laín inc'a' xinmācob chiruheb li cuech tenamitil chi moco xink'et lix chak'rabeb li kaxe'tonil yucua'. Abanan xinchape' Jerusalén xbaneb laj judío, ut xine'xk'axtesi sa' ruk'eb laj Roma. **18** Ut eb laj Roma nak que'rakoc ątin sa' inben, ma jun inmāc que'xtau re incamsinquil. Que'raj raj cuach'abanquil.

19 Abanan eb laj judío inc'a' que'raj quine'risi. Jo'can nak quintz'ama chiruheb nak li acuabej César t̄arakok ątin sa' inben. Moco chixjitbal ta lin tenamit xinchal. **20** A'an aj e nak xintakla ebokbal. Xcuaj rilbal eru ut xcuaj ątinac eriq'uin. Sa' xc'aba' li jun li nakayo'oni lāo aj Israel nak bac'boquin anakcuan riq'uin li cadena a'in, chan re-heb. **21** Ut eb a'an que'xye: —Lāo ma jun hu xkac'ul chalenak ta Judea, ut ma jun li kas kitz'in xc'ulun chajitbal chi moco chixyebal junak c'a'ak re ru inc'a' us chācuix. **22** Takaj rabinquil c'a'ru nacac'oxla chirix a'an xban nak kabiom nak yalak bar xic' neque'rabi li tijleb chirix li Jesús, chanqueb. **23** Jo'can nak que'xxakab jun li cutan re nak te'cuulak riq'uin sa' li cab li cuan cui'. Nabaleb que'cuulac riq'uin laj Pablo re nak tixch'olob

xyalal chiruheb chirix lix nimajcual cuanquilar li Dios. Quixnumsi li cutan chixch'olobanquil li xyalal chirix li Jesús jo' tz'ib'anbil sa' lix chak'rabilaj Moisés jo' ajcui' li que'xtz'iba li profeta re nak te'xpab li Jesús. ²⁴ Cuan que'paban re li c'a'ru yo chixyebal. Abanan cuan ajcui' li inc'a' que'xpab. ²⁵ Cuanqueb li inc'a' que'cuulac chiruheb li c'a'ru yo chixyebal laj Pablo, ut que'oc chi elc. Nak ac xiiqueb re, laj Pablo quixye li atin a'in: —Yal ajcui' li quixc'utbesi li Santil Musik'ej chiru li profeta Isaías chirixeb li kaxe'tonil yucua' nak quixye:

²⁶ Ayu ut taye reheb li tenamit chi jo'ca'in: Yo_{kex} chirabinquil, abanan moco tetau ta ru lix yalal li c'a'ru terabi; ut yokex chirilbal, abanan inc'a' teq'ue retal c'a'ru xyalal li c'a'ru teril.

²⁷ Xban nak cacuubresinbil lix ch'oleb li tenamit a'in, jo'can nak inc'a' te'xtau xyalal. Inc'a' saken te'abink ut inc'a' saken te'ilok re nak inc'a' te'xtau xyalal li c'a'ru te'rيل ut inc'a' te'xtau xyalal li te'rabi. Inc'a' te'xtau xyalal, chi moco te'xjal xc'a'ux, chi moco tebinq'uirtesi, chan li Dios. (Is. 6:9-10.)

²⁸ Jo'can nak chenauhak nak li resil li colbabib li naxq'ue li Dios quiq'uehe' reheb li macua'eb aj judío. A'an eb chic te'abink re, chan laj Pablo. ²⁹ Nak que'rabi a'in, eb laj judío que'coeb ut yoqueb chixcuech'inquil rib. ³⁰ Cuib chihab quicuan aran Roma laj Pablo sa' li cab li quixto'oni. Ut quixc'uleb chi sa sa' xch'ol chixjungleb li que'cuulac riq'uin. ³¹ Yo chixch'olobanquil lix yalal lix nimajcual cuanquilar li Dios ut yo

HECHOS 28:31

cxvi

HECHOS 28:31

chixyebal resil li Kacula' Jesucristo chi mäc'a' xxiu.
Ut mä ani quiramoc chiru xyebal.

**Li Santil hu
Bible in Q'eqchi' (GT:kek:Q'eqchi')**

copyright © 2000 Wycliffe Bible Translators, Inc.

Language: Q'eqchi'

Translation by: Wycliffe Bible Translators, Inc.

Q'eqchi' [kek], Guatemala

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Q'eqchi'

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
f1b065df-5ef5-5c8a-a273-af2b9aefff55